


श्रीराधाकृष्णाय नमः ।





विज्ञापन ।

प्रिय रसिक सिरोमणी महा मित्रों! जरा इसेभी बाँचकर आनंद लीजिये यह सुदबुद सबलंगाके सात जन्मकी वार्ता० नवरस पुरित वाटिकाकी सहल कीजिये इस्में (शृंगार वीर करुणाद्भुत हास्य भयानकाः विभत्स शान्ति वात्सल्य रसाः) अति मनोहररसिक छंद बद्ध व वार्तिक वर्णनकी है जिस्में० सातजन्म जैसे

(कवित छप्पै) प्रथमज रंभारूप दूसरो बजचर जानों ॥ तीजोरूप कुम्हार चतुर कपि फेर बखानों ॥ पूस्प सुगंधा नाम पांचवो नृपधर रहिये ॥ छटो अनसना नाम कूख दासीकी लहिये ॥ सब लंग अंग चंपक बरन जन्म सातवों जानिये ॥ शिवकरण कहे भावी प्रबल रंभ कथा बाखानिये ?

(इस प्रकार सातही जन्ममें पाक मोहोवत रहके पीछे इन्द्रलोक पहुँचकर मुक्तिको प्राप्त भये ऐसी चमत्कारिक रसीली वार्ता रचनाकर आप प्रिय मित्रोंको भेट करताहूँ सो स्वीकार करें और भिन्नाभिन्न भेद अनुचित वाक्य होयसो दयालुतासे क्षमा करें ।



आपका कृपाभिलाषी-

शिवकरण रामरतन दरकर,

(इन्दौर)

श्रीः

सूचीपत्र ख्याल व वार्ता ।

सहा शिवकरन रामरतन दरक मूंडवेवाला

“ इंदोर ” छापाखाना.

पाना

- | | |
|----|-------------------------|
| ४ | राजा भरतरी अमर फलका |
| ४ | राजा भरतरी सिंध सिकार |
| २ | राजा भरतरी पिंगला सती |
| ४ | अमर सिंधराठोड़ |
| ३ | रतन सिंध (रतन कंवर) |
| ४ | इंद्रसभाका ख्याल नाटिक |
| २ | नागोरी छेला सूरतकी मालन |
| १॥ | चूड़ीगर रंग भीनी |
| ३ | चिताश चित रंगी |
| १॥ | छेला छिंद गारी |
| १ | छेला पनहारी |
| २ | छेला दिलज्यान |

(२)

सूचीपत्र ।

आना

- १ सिंगी वाला वेद
१ सिंगी वाला जररा
१ पंकारखूमचे वाला
१ मिणियार
१ हीर रांझा छत्तिसा झूलना
१ राम देवका पंडा
१ इस्कवाज
१ खाखी
४ ठोलामारवण (ठोल कँवर)
४ चंदकँवर सेठानी ख्याल
३ चंदकवर वार्ता
४ पनावीरमदेका ख्याल
६ पनावीरमदेकी वार्ता
४ सुदबुद सब लंगाका ख्याल
१० सुदबुद सब लंगा सात जन्मकी वार्ता
४ फूलकँवरका ख्याल
३ फूलकँवर फूलमतीकी वार्ता

थाना

२	सेठ सेठानी पति विद्योगनी विलाप
२	जड़िया सेठानी
२	गांधी सेठानीका
२	मदन मनोहर सट सेठानी
२	हीणपुर्ष
२	छोटा कंथ
२	बूढावालम वृध विवाहपूजीती
१	ल्होड़ीसाकूत बुढेकीस्नियादीघर फूट
	फिसादी
१	लंपावाला
१	जंवरी सेठानी
१	पंथी पाडोसन
१	रंगलाल
१	मलंगसाँई
१	काकी जेठूत
१	काँसेटिया
२	मंहदी वाला

(४)

सूचीपत्र ।

आना

२	विधवादुरदसाका (आसक मस्ताना
२	बजाजका
२	गोपी चंद्रराजा
१।	मिरजामन मोहनी
१।	साला हली नणदोई
१।	आसाडावी
४	खीवा आभल
१	कलयुगका
३	चोवौली राणी
४	रतना हमीर
३	राजाचंद
३	मोहनाराणी
१॥	पतल बंधी भात छुडावनी

इस सिवाय वहीतसी पुस्तकें मौजूदहैं नाम
दारियाफत करना होय तो आध आनाका टिकट
भेजदो सूचीपत्र मुफत भेज दिया जायगा.

शिवकरन रामरतन दरक छापाखाना इंदोर.

श्रीः ।

सुदबुद सब लंगाकी वारता ॥

सात जन्म वर्णन ।



सहा शिवकरण रामरतन दरक माहेश्वरी
मारवाडी मूंडवेवाले कृत प्रारंभ ।

दोहा—श्रीसारद गुर गणपती लंबोदर गण
ईस ॥ विघन विदारण बुद्धिवर तोहिनिवाऊंसिस
॥ १ ॥ बंदूँ सारदमायके चरणकवलसुखदाय ॥ वर
अक्षर देईस्वरी भूलाँ हरफ भताय ॥ २ ॥
मूसे वाहन गज वदन हंसवाहन कर वीन ॥
अरज कहूँ कर जोरके दीजै बुद्धि नवीन ॥ ३ ॥
विघन निवारण बुद्धि वर गणपत सारद माय ॥
दध अक्षर मेटण सदा वाणी विमल कराय ॥ ४ ॥
बंदूँ जगके रसिक कवि पंडित चतुर प्रवीन ॥
कहूँ कथा सुदबुद तणी कउतक कला नवीन ॥
॥ ५ ॥ आदि कवी सुदबुद कथा कही हुती

(२) सुदबुद सब लंगाकीबारता ।

ततसार ॥ फिर मूढन कर परतपर लिख लिख
दई विगार ॥ ६ ॥ सुन दोहे कहुं चमकते ॥
कविमुख कठे सु अैन ॥ परिन मिले पूरे कहूं
तातैं परीन चैन ॥ ७ ॥ बहु ढूंढी पाईनहीं
परत पुरातन आद ॥ जोहि मिली सो अदपरी
अड बड अँड असाद ॥ ८ ॥ ईस्त बीस्त भेटी
अमिळ तुक खंडित अर्थहीण ॥ करी असव्य
अयानमिल पढ नहिं सकै प्रवीण ॥ ९ ॥ अव-
कछु म्हेंकथिबो चहूं पूर्व जन्म इतिहास ॥ आदि
सुनी विधि और यह लखि मतिकरियो हास ॥
॥ १० ॥ आदि मंगळा चर्णमें करी विनय शिव-
कर्ण ॥ कवि पंडित चातुर क्षिमाहि रखियो मौही
सर्ण ॥ ११ ॥ प्रथम जन्म पूरब कथा पूरी
मिलीन कौय ॥ कथिहूं पहला जनम छव साँभ-
लज्यौ नर लौय ॥ १२ ॥ कछुदोहे चंद्रायणे
जूने मिले अशुद्ध ॥ अवरनवेशिवकरणधर लि

येजौडकरशुद्ध ॥ १३ ॥ सात जनम सब लंगव
 षट सुदबुदके जान ॥ कथा रसिक शिवकरण
 केह कहँ जौड संधान ॥ १४ ॥ नगर नाम
 आभापुरी विमल सेठ ताठाम ॥ जिणवर
 रसियो जनमियो मदनचंद जिम नाम ।
 ॥ १५ ॥ लख लेखण कौडाँ कलम धनकौ
 अंतन पार ॥ नगरसेठ पदवी लई चकवे साहूकार
 ॥ १६ ॥ हुंडी चालै चहुं दिसाँ रतनाँ भरचा भँडार
 सदा अखूटी थिर रहै थाहर रिद्ध अपार ॥ १७ ॥
 हरख मदन जनम्यौ जदे वागा सौवन थार ॥
 घर घर रली बधावणां घर घर मंगल चार
 ॥ १८ ॥ मदन थके मुख देखताँ कदन करे मन
 भंग ॥ बदन छवी निरखत सदा सदन रमे
 रतिरंग ॥ १९ ॥ राई बधतौ तिलवधे दिन
 दिन तेज सवाय ॥ पंथचलताँ कामण्यां घरतज
 देखणजाय ॥ २० ॥ दौड पडे पग आखडे छवि

(४) सुदबुद सब लंगाकीवारता ।

निरखण की चाह ॥ पूत्र चुंघावत मातजे नार
तजे निज नाह ॥ २१ ॥ गौठ गूघरी नित करे
बागाँरंगवणाय ॥ तिण अवसर येक अपछरा
इन्द्र तणीं वँहँ आय ॥ २२ ॥ देख मदन मन
मौहियो विकलभई वसकाम ॥ अधिक पियारौ
इन्द्रसम रतिसम प्यारीवाम ॥ २३ ॥ पूष्यवीं
ण रंभा चली निरषी मदन कँवार ॥ असन
वसन भोजन तज्या नींद तजी घरनार ॥ २४ ॥
भयौ मौह वस बावरौ बस्यौ सघन बन जाय ॥
येक समैं सुर कन्यका औरुंहिं उतरी आय
॥ २५ ॥ पीतम कूं प्यारी मिली ॥ प्यारी कूं मि-
लपीव ॥ पीतम प्यारी मिलगया जैसें सक्कर घीव
॥ २६ ॥ हुई परस पर पूछना मृदुल वचन मुख
वात ॥ नैन सलूणा झिल रह्या मिलत भयौ कुस-
लात ॥ २७ ॥ वार्ता ॥ अठीतो इन्द्रकी अपछरा
मदन चंदकौं देखके मौहित हुई ॥ अठी मदनचंद

अपछराकों देखकर काम बस हुवौ और दौना-
के चसमा बाजी होने लागी ॥ और माहौ
माहरेमाँहीं पूछनाँहोवणकी चूष जागी ॥ इण
कह्यो आप कुणछौ अठीरंभाकह्यौ आप-
कुणछौ तरे इणारे सारी वात बत लावण
हुई ॥ जद रंभा बोली ॥ चंद्रायणाँ ॥ इन्द्रत
णाँ हूँ अपछरा चुगवा आई फूल ॥ कलमें देख्या
कँवरजी आप इन्द्र संतूल ॥ आप इन्द्र सं
तूल थासूँ मन लगियौ ॥ मोही मदन कँवार
मदन तन जगियौ ॥ उलटख्यौ दिल दरियाव
कराख्योनाँ रहै ॥ परिहाँ रहसूँ कदमाँ साँहक
रंभा थूंकहै ॥ २८ ॥ दोहा ॥ पीतम प्यारी मन
सिल्यौ ॥ मौही मदन कँवार ॥ रंगभीनी अंगसूँ
भेडी बीचन मावै हार ॥ २९ ॥ वार्ता ॥ अबे
अपछरा सूँ चरमवाजियाँ करै छै; मदन चंद
पुवानैनी रोमन हरै छै।नेहरे नत्सै रंग लूटै छै ॥

(६) सुदबुद सब लंगाकीवारता ।

तिलाणें तान तूटै छै ॥ रीझालू राग गावै छै ॥
अपछरानित आवैछै ॥ हाव भाव कटाक्ष दिखावैछै ॥
रंगभीनी प्रेमपावैछै ॥ रंभासूं नेह लागछै ॥
घराँ काधंध भागा छै ॥ परनाच्याँ पीव हिलिया
छै ॥ रंभासूं जीव मिलिया छै ॥ रंभावायक
॥ दोहा ॥ रेसाजन मति मौडज्यौ बाला पणको
नेह ॥ भरजौवन मद छाकसी रखे दिखावौ
छेह ॥ ॥ ३० ॥ मदनचंदबायक ॥ प्राण तजूं
पण नाँतजूं प्यारी थांसूं नेह ॥ बँधी गाँठ नेह प्रा-
णके तूटाँ छूटै देह ॥ ३१ ॥ वार्ता ॥ येकदिनरा
समा जौगमें ॥ रंभा और मदनचंदके आपसमें
हास्यविनोदहोयरथाछै जिणवखतमें रंभा इंद्र-
लौक की तारीफं घणीं करी तरेमदनचंदबोलियौ
इंद्रलौकतो म्हानें पिणदिखावौ जद रंभावौली ॥
रंभावायक ॥ दोहा ॥ इंद्रअखाडे मानवी कदेन
धरसीपाय ॥ सहज सुद्रमाँभौगवे. देव इंद्र पुर

जाय ॥ ३२ ॥ वार्ता ॥ जदमदनचंद्रपूछैछै ॥ के
सुद्रमाँ सहज काँई छै ॥ तरेरंभा कहै छै ॥ सुद्र
मानामें येक सहज छै ॥ जिणमें इंद्रकी सभाजुडै
छै ॥ आठ पोहोरलीला विलास होयबोकरै छै ॥
घणीं दूर लंबी चौडीछै ॥ जिण बीचमें इंद्रकोसिं
वासण छै ॥ सदानाटक अपछरांकरवो ईकरै छै ॥
और छपन मेघमाला हाजर रह वौईकरै छै ॥ इच्छा
भौज और इच्छा भोग प्रापतहौ जावैछै ॥ दोहा ॥
सहज सुद्रमाँदेव पुर भरे नखाली होय ॥ पुन्य
करे सोहि पूगसी सांभल ज्यौनर लौय ॥ ३३ ॥
॥ वार्ता ॥ सुद्रमानामें सहजमें असंख्यातो आगे
बैठाछै और असंख्या फेर जाय बैठतो भीडनै
होय ॥ और असंख्या ऊठ जायतौ खालीनै होय
॥ दोहा ॥ भूख प्यास लागै नहीं भोगे इच्छा
भोग ॥ असन वसन मन वांछि सुख सदाहरख
नहिं सौग ॥ ३४ ॥ वार्ता ॥ इतनी सुणताहीं

(८) सुदबुद सब लंगाकीवारता ।

मदन चंदतौ हट षकडनें रंभारा विवाणमें बैठ
कर इंद्र लौकनें विदाहुवो ॥ आगे मानव देहरी
अटकणघाटी आई जठे रंभा मदनचंदनें भँवरो
बणाय और कँवलकी कलीमे धरलीनों ॥ आगे
जायने पूस्व इंद्रके निजरकर वालागी जरेभँवरा
नेंकंचुवामै प्रवेश करलीनों ॥ अवेरंभा इंद्रसूं
तालीम वजायकर निरत करवाखडी हुई ॥
वाजंत्र जंत्र तंबूरा मृदंग वजावालागा सप्तस्वर
तीनत्रायसूं छवरागनें छतीसरागणियाँकी गांन-
विधाहौवालागी और तानमानसूं सुरतालरीमि
लावटहुई ॥ अवै रंगभीनी रंभानाचैछै ॥ सुरे
सइंद्रराचैछै ॥ वाजंत्रतानतोडैछै ॥ गाएयंकअं-
गयोडैछै ॥ दधकाराँधूसवाजैछै ॥ सुरेसईसराजैछै
धमरौल्याँमहलगूजैछै धमरौल्याँधरणधूजैछै ॥
॥ दोहा ॥ तालतिलाणावाजिया ध्रवपदअरुसं-
गीत ॥ ठठकचलाईठूमरी भ्रमनआयौचीत ॥

॥३६॥ चंद्रायणाँ दध कपडीधपथापियाँ नाचण
 लगीनिसंक ॥ कमरलचक्कीकामणी भँवरवजाईपंख
 भँवरवजाईपंखभिचीज्यौकंचली ॥ रंभामोडैअं
 गअसूंज्यौअंचली ॥ ढीलीपदमणनार ॥ यादपिव
 आइयो ॥ परिहांपड्यौरंगमें भंगक इंद्ररिसाइयो ३६ ॥
 ॥ भँवरोवेठौकंचुवै पांख रह्यौ भरणाथ ॥ गुपत
 धरचौपुनिबंधमें तोहि जातसुभावनजाय ॥ ३७ ॥
 ॥ वार्ता ॥ रंभानिशंकनिरतकरैछै ॥ औरलच
 ककवांणज्युंलुलेछै ॥ भँवरकंचुवैअसूंजियोछै ॥
 पंखभणकारनेगूंजियोछै ॥ तरेभँवरयादआयो ॥
 रंभानाचतीढीलीपडी रंगमें भंगपड्यौ ॥ जरे इन्द्र
 कौपनेजलदतालकरवाई तरेरंभावाजंत्राँनेदोहोक
 हैछै ॥ दोहा ॥ घणींगईथौडीरही ॥ जामें छिन
 छिनजाय ॥ पातरकहैपखावजीटुकियेकमधुरव
 जाय ॥ ३८ ॥ वार्ता ॥ रंभावाजंत्राँनेकहैछै ॥
 हेवाजंत्राँ रातघणींतोगई औरथौडी रहीछै ॥

(१०) सुदबुद सब लंगाकीवारता ।

जिणमैपिणछिनछिनवीतैछै ॥ थेटुकीयेकधीमा
वजावौ ॥ इतरीसुणवाजंत्र ठीलावजावालागा
जरेइन्द्रअस्वनीकँवार नामें वेदाँने हुकमकी
यौके रंभारेकाँईदरदऊठियौसू नाचतीनाचती
थाकी ॥ रौगकौनिदाँनकरौ ॥ जराँअस्वनीकँ
वारनिदानचिकतस्याकरनैपाछौइन्द्रनेदोहोकहैछै
॥ दोहा ॥ रौगदोषइणरेनहीं उपजीविथाअपार॥
काँचूमैकछुकुचनविन इन्द्रकरौनिरधार ॥ ३९ ॥
॥ वार्ता ॥ जरेइन्द्ररंभानेबुलायनेदेखेतौकंचवामें
भँवरछै तरेइन्द्रपूछैछै ॥ ॥ दोहा ॥ इन्द्रकहै
सुणभामनी ल्याईकेमबुलाय ॥ भँवरकठासुंआ
वियौ भँवरीदेतभुलाय ॥ ४० ॥ रंभावायक ॥
॥ दोहा ॥ पूष्पवीणवाहूंगई वागाँभँवरसुरेस ॥
भरझौरीजवभृगुलता आण कियौपरवेस ॥ ४१ ॥
॥ वार्ता ॥ जवइन्द्रभँवरानेकपटखंडसरौवरसैन्ह
वावणरोहुकमदीयौ ॥ तवहलकाराँजायन्हवायौ

जबकपटखंडसरौवरको जलपरसताँप्रवाणही भँव
 राकौमानवीहोयगयो ॥ कपटरूपदूरहूवौ ॥
 तरेहलकाराँ पाछौपकडने इन्द्रकेहजूरल्याया
 जदइंद्रउणपुरषनेँबुलायनेँपूछैछै ॥ दोहा ॥ गण-
 राकसदानवकनाँ केकोइवीरपिसाच ॥ भँवर
 वण्यौ किण कारणेँ ॥ कहदेमनकीसाच ॥
 ॥ ४२ ॥ वार्ता ॥ तरेमदनचंदहातजौडनेँ डर
 तौहाँपतो वोल्यौ प्रथ्वीनाथ हूँ तौ आभा पु-
 रीकौसाहाजनछूँ ॥ रंभाकीसाथ आपका दरस
 णकरवाआयोछूँ ॥ इतनी सुणरंभानेँ बुलायकर
 इंद्र पूछियोतरेरंभापाछीवौलीनहीं जबइंद्ररंभाको
 कसूरजाणकरश्रापदीनों कहीजावौथे म्रतलोक
 में जायनेँ अवौरवनमेंवनचरहौजावौ औरम्हासूं
 कपटकरने विषे सेवन करणौविचारियो जैसी
 तरहसातजनम कपटसूं विषे सेवनकरणरी बाँछा
 करौ औरथाँकौकारजमतसरौ ॥ सोरठा ॥

(१२) सुदबुद सब लंगाकीवारता ।

॥ चौरीसूंवरवास कपटसहितजारीकरौ ॥ जनम
सातवेंआय इंद्रपुरीमेंसंचरौ ॥ ४३ ॥ इंद्रत
णौ असराल श्रापघौरगतिनाँटलै ॥ ततखिणवाँ
दररूप उत्तयाआयउद्यानमै ॥ ४४ ॥ वारता ॥
रंभानेश्रापहौतांहीप्रतुलौकमैआयउतरिया अवे
सातजनमरीसंख्यावरणनकरूँछूं ॥ कवितछ
प्य ॥ प्रथमजरंभारूपदूसरोवाँदरजाणूँ ॥
तीजौरूपकुँम्हारचतुरकपिफेरबखाणूँ ॥ पूरुवसुगं
धानामपांचवैनुपवररहिये ॥ छटेअनसनानाम
कूखदासीकीकहिये ॥ सबलंगअंगचंपकवरण
जनम सातवौँजानिये ॥ शिवकरणकहैभावीप्र
बल रंभकथावाखाणिये ॥ ४५ ॥ इति सुदबुदसब
लंगाकीवारता सहाशिवकरण रामरतन दरक
माहेश्वरीमारवाडी मूंडवेवालेकृतरंभामदनचंदमि
लापइंदश्राप बंदररूपधारणनामप्रथमौप्रकास १

अथ सुदुदसावलंगाकी वारता बंदर जन्म
वर्णन द्वितियो प्रकास प्रारंभ ॥ वार्ता ॥

॥ अवे रंभा ओर मदनचंद इंद्रलोकसूचवने
मृतलौकरा माहाउद्यानवनमें आय बंदर बंदरी
हुवा ॥ येक मकर ध्वज नामेवडौवाँनरराज जि-
णरेपाटराणीं मगरमौचनानामबाँदरी जिणरे पे
टतो रंभा पडने जनमी जिणरौ नाम सुंदरी
दियौ ॥ तिकी माहा रूपरीशस गुणाँरीखान ॥
देहरी सुख माल ॥ लाज मर जादरी पाल ॥
अकलरी आगर नै बुधरी सागर ॥ इण अह
नाणाँ मकर ध्वजरे कन्याँ जनमी ॥ और अठी
अखे ध्वज नामे बंदरके पाटराणीं पदम प्रभा
नामे बाँदरीकी कूख मदन चंद पडनेँ जनम्यौं
॥ तिकौ माहा रूपवंत तेजवंत ॥ बुधरौ सा
गर ॥ और अकलरौ आगर ॥ गुणरौ गंभीर ॥
देहरौ दिग्गज ॥ सूर वीर इण धीर इण अहना

(१४) सुदबुद सब लंगाकीवारता ।

गाँ ॥ अखे ध्वजरे पूत्र जनम्यौं जरे दाई जायनें
बधाई दीनीं ॥ माहाराज आपके पूत्र जनम्यौं
॥ तरे अखे ध्वजजाय देखने नपुंसक अर्थात्
उण नैं हीजडौ करवालागौ ॥ कारण वांदरांका
कटकमें पुरष येकही रहवौ करै छै ॥ राजा
मारियां पछै जनमें सौही कटकरो राजा ॥ इण
वास्ते अखैध्वज पिण पुत्रनें कस्सी करणें
लागौ ॥ तरे पटराणीं पदम प्रभा हात जौडने
हाजर खमा खमा करनें अरज गुदराई ॥
प्रथीनाथ सैन्यापती योतो आपरो पाटवी पुत्र
॥ और बुढापामें परमेश्वरजी खिलावासारूदी
नौं छै ॥ सोइणनें तौपुरषराखियोचाहीजै ॥ तरे
उण पुत्ररौ नाम कटक ध्वज दीनौ ॥ और जुग-
राज पदवी देकर आपयेकांतवैठगयौं ॥ अबे कटक
ध्वज दिनदिन बढती राजधानी और चढती
जवानी ॥ जाणें हणू मानरौ पुत्रकनाँ पवनरौ पौतरौ

घणपरवारौनैघणामौटावनरौधणीं ॥ जिणराकट
 करी औपमाँअपार ॥ तिणरादलमैरूपवंतवांदरी
 थाँइसीजिणनेदेखनेकामदेवहीमौहितहुयजाय ॥
 इरुयादलरोधणी देहरौदराज रूपगुणआगर कठक
 ध्वजआपराकटकरीपालनाँकरैछै ॥ मकरध्वज
 औरकटकध्वजरा कटक न्यारान्याराछै ॥ आ
 पआपरीराजधानीमैअमलाफेलाकरछै ॥ आप
 आपरीहृदाँछौडनेयेकयेकराकटकमेनहिआवेछै ॥
 रातरिवखतपोहोरायतपोहोरादेवेछे ॥ खेंखाराँ
 ऊपरखेंखारा और ललकाराँऊपर ललकाराहौवेछे
 ॥ किताकदिनपछे अठीतौसुंदरीनामैवांदरी
 जौवनवंतीहुई ॥ अठीकटकध्वज नामैवंदर
 मगरुमीमै आयौ ॥ औरसुंदरीकेपिणजौवनछा
 यौ ॥ इणदौनारेनजरवाजियाँहौणेंलागी ॥
 दोहा ॥ आपआपरीहृदमै आपआपरीआँण ॥
 कटकध्वज अरु सुंदरी चसमचलावैवाँण ॥४६ ॥

(१६) सुदबुद सब लंगाकीवारता ।

॥ वार्ता ॥ येकसमयमें आपआपरी हदारा
दरखतांऊपरैवेठाछै ॥ आँवा जाम जमेरी
दाडम दाख पिस्ता विदाम खावैछै ॥ जिणस
मयसुंदरी आपरीहदराडाहालांऊपरै कटकध्वज
सूं नजीकआयवेठी ॥ औरकामबसहौयने दो
होकहेछै ॥ सुंदरीवायक ॥ दोहा ॥ प्यारी
कौमनपीवसूं पिवभनप्यारीमांह ॥ निजरचाँमेलौ
भलकरौ अंगसूंमेलौनाँह ॥ ४७ ॥ कटकध्वज
वायक ॥ दोहा ॥ साझनियाँसौजौजनाँ जाणैहि
यामँझार॥दुरजनियाँवरआँगणै जाणसमंदाँपार ॥
॥ ४८ ॥ सुंदरीवायक ॥ आजसियालैसी-
पडै बंदरमेलैचीस ॥ जिणराराजिंदघरनहीं
अंग भिडावैईस ॥ ४९ ॥ पलकपोहोरदिन-
मास सम मास वरस समजात ॥ डाकण
दौरी नीसरे पिवविन वैरणरात ॥ ५० ॥ कटक
ध्वजवायक ॥ जलमें वसे कमौदनीं चंदवसै

आकास ॥ जौजाहूकेसनबसे सौताहूकेपास ॥
 ॥ ५१ ॥ सुंदरीबायक ॥ हरीजम्हैरिसभरी
 भेजूंकिसकेहात ॥ नदीविछोवापडगया तलफ
 तलफजिवजात ॥ ५२ ॥ वार्ता ॥ दौयाँवनकेबीचमे
 नदी हलकी हलकी वहरहीछै ॥ पणदौनाँकिनाराँ
 हदाँबंधरहीछै ॥ अठीरोबंधरउठीनहिंजायसके
 नैँउठीरोबंधरअठीनहींआयसकै ॥ दोहा ॥ लो-
 हौलीकबंधीहदाँ इतउतधरैनपाय ॥ एकएककी-
 कारतज बंदरकदेनजाय ॥ ५३ ॥ कटकध्वजवा
 यक ॥ पीवविछोईकाँमणी नेणलगावेडाम ॥ देह-
 विछोवाभागसी राजीहौसीराम ॥ ५४ ॥
 ॥ ॥ वार्ता ॥ ॥ यूंकरताँघणाँदिनाँपछैएक-
 दिनरासमाजोगमैः मकरध्वजनेतोवीछूलडगयो
 सोमाहाजहरी पूलाझाल अग्नीअसराल नैँ संखि-
 याकोउपावणहार ॥ डंकरौंदराज लडियो
 लडताँईप्रवाणमकरध्वजतौ मुरछाखायनैँ पडियो

(१८) सुदबुद सब लंगाकीवारता ।

औरसारौकटक जडीबूटीऔषधीहेरबागया ॥
जिणवखतमेंसुंदरी पिणविछूरीऔषधीदूढेछी ॥
अठैकटकध्वजरोदाबलागौ ॥ इतराकमेंतौकटक-
ध्वजजायझपेटी औरसुंदरीनेंलेजायनैपरवतरी-
गुफामेंजायबडियौ ॥ दोहा ॥ आप अकेली
सुंदरी गईअवषधीलैन ॥ दावलग्यौकटकेसरौ
आयझपेटीअैन ॥ ५५ ॥ येकरातभेलारह्या
डरताँसच्यौनकाज ॥ देवलईडौनाँचढ्यौ सरवरबं-
धीनपाज ॥ ५६ ॥ वार्ता ॥ अबेदूसरेदिनबडी-
फजर मकरध्वजसावचेतहुवौ बीछूकौजहरऊत
च्यौ तरैकटकरीहाजरीलीधी ॥ साराठामकेठाम
लाधा ॥ पणसुंदरीनहिंपाई ॥ जरैचौकसकरवाई तरै
पतौलागो के सुंदरीनें तौकटकध्वजलेगयो ॥ इ
तरीसुणतांहीं प्रवाण मकरध्वजकेतो बीछूराज
हरसुंई लाखगुंणीं ज्वाला ऊठ वैठीहुई और
व्याकुलहोगयो तरैआवधलेकर झाड बाँटउखाड़

ताथकनैपूँछफटकारताथका कटकसमेत कटक
 ध्वजरा कटक ऊपर लडवानैचाल्या ॥ अठीकट
 कध्वजपणसैन्यासाझकर आवधसम्हालकरलड
 वाने तयारहुवौ ॥ इणाँदौनुंदलारीअणियाँमिलीनैजु
 छहौवालागौ ॥ दोहा ॥ दोऊँदलकिलकारिया
 हाकपड़ी हलकार कलहवाजियाँकाहला बंदर
 भिड़जूझार ॥ ५७ ॥ घड़घड़गालबजावता
 हातपटककरहल्ल ॥ उटकपड़ै तलऊथलै मूँ
 डभिडावैमल्ल ॥ ५८ ॥ आँणअखाडैआवडे
 गुडकरखायगुलेच ॥ बंदरबडवादीविषम पटक
 पछाडैपेच ॥ ५९ ॥ भिडभेटीमाथाभिडैभिडेखंभ
 असराल ॥ पगपंजाझटकेपटक जुडकरजुद्धजँ
 जाल ॥ ६० ॥ दाँतवटकाँवाजिया वाथ-
 वटकाँखाय ॥ हातझटकाँजूटिया लातपटकाँ
 पाय ॥ ६१ ॥ मूठगदासीपाहरे दूटमरौडै
 मूछ ॥ ऊठअचाँणकआवडे पटकपछाडै

(२०) सुदबुद सब लंगाकीवारता ।

पूँछ ॥ ६२ ॥ नटवादीज्युंऊचकै गजबीखायगुला
च ॥ दाँतवजावैदेँतसा ऊथलपडैउलाच ॥ ६३ ॥
हाकडाकभूतेससी इंद्रधडूकेआय ॥ ऊठअचाणक
आवडै गजबगुलाचाखाय ॥ ६४ ॥ वार्ता ॥
इणभाँतबंदराँकौजुद्धमाचियोछै ॥ जाणेकमाहा
देवप्रलयकालसमैनाचियोछै ॥ चहुँदिसाकटकउ
मडेछै ॥ जाणेंब्रषाकालरावादलाघुँमडेछै ॥ इत
राकमैतौअखेध्वजनैखवरपडी जदकटकमै आ-
यनैपूछनाकरैछै ॥ दोहा ॥ आँणअखेध्वजपहुं
चियौ सुणीं जुद्धकीवात ॥ पूत्रअनीतीजाणकर
करणलग्यौअपघात ॥ ६५ ॥ नीतिसिरौमणबुद्धि
बर बंदरचतुरप्रवीन ॥ कटकध्वजने काठियौ
देसनिकालौदीन ॥ ६६ ॥ लेसुंदरबंदरच
ल्यो राडमिटार्इअँन ॥ दोऊँदलसंपतभयौ बरता
यौसुखचैन ॥ ६७ ॥ वार्ता ॥ कटकध्वज
नैतौदेसनिकालौदीनौनै अखेध्वजपाछौआपरारा

जपरकायमहुवौ ॥ दोऊदलामेंसुखसंपतराजारा
जप्रजाचैनवरत्यौआपआपरीहदाँपकडी ॥ अठी
कटकध्वज सुंदरीनें लेयकर भागौ तरे पिछाडी
मकरध्वजकीफौजको बडौभारीकोहकसबद संह-
डबडाट सुणीजियौ जरेसुंदरीबौली अहौकंथ सन्न
आयपहुंचसी दूसरौकपटरूपधारौ ॥ ॥ दोहा
आपअकेलारहगया कटकबिलुंव्योलार ॥ भेस
वणावौ दूसरौ रूपबेकरीधार ॥ ६८ ॥ वार्ता ॥
अवैकटकध्वजऔरसुंदरीतौतुरतकुम्हारकुम्हारीव
णगया ॥ औरमकरध्वजरौकटकइणानेंदूढनैपा
छौफिरगयौ ॥ इतिसुदबुदसाबलंगाकीवारता सहा
शिवकरण रामरत्न दरक माहेश्वरी मारवाडी
मूंडवे वाला कृत वनचररूपबदलकरकुम्हारकु-
म्हारी रूपधारण वर्णनोनाम द्वितीयो प्रकास ॥२॥

(२२) सुदबुद सब लंगाकी वारता ।

अथ सुदबुद सब लंगाकी वारता तृतीयप्रकाश
॥ (॥ वारता ॥) ॥ अबेधरमदत्तनाम
तौकुम्हारऔरसीलसुलक्षणानामकुम्हारीवणकरय
हदोनूजायकरयेकसूमसिरौमणनामनग्रमें बसिया
जठैमृतकारावरतनवणायनैउद्रपूरणाकरैछै ॥ उ
णनग्रकाराजाकौनाम सूमसंतूष्टछै ॥ जिणरोमन
सूमाँहींसूँसंतूष्टरहैछै ॥ नैआछाआछासूमाँकीबिड
दावल्याँकहेछै औरधनपैदासकरणरीजुगताँकरैछै
नै, द्रव्यसूँ भंडारभरैछै ॥ तिणनग्रमेंयेकलाख-
घर, बडाबडाद्विग्गज, सूमाँकावसैछै ॥ जिणारी
अडाभीडखूणींसूँखूणीवसैछै ॥ इसारयतनेइस्पा-
हीराजा, तिकेपरायेघरांपरतलावै खाजा ॥दोहा॥
देखजियेपणदैनकछु, कौडीखरचनखाय ॥ जाचक
देख्याँजलवलै माँगैतौमरजाय ॥६९॥ वारता ॥
वंहसूमसिरौमणाँनगरीकासूम किस्याहेकछै ॥
जाणैमोतीडाँरीलूँव ऊजलाजाणै धौवीकीसी सूम

॥ मायारापौरसा ॥ जिकेदीखैचातुरचिकौरसा ॥
 मांड्याचूंड्यामौरसा ॥ हस्तमुखीगौरसा ॥ तिलकाँ
 खूतीखा ॥ औरभगतीसूँफीका ॥ कौराकनर
 सियापरसादियाभगत ॥ दोहा ॥ कौडीमेलहै-
 कौथली संपतभौंभलिपाय ॥ ईष्टनहींगुरपीरकाराखै
 द्रव्यछिपाय ॥ ७० ॥ नारपूत्रकौंदेनकछु माँगेतौमरि
 जाय ॥ काँमपडेतौरौयेदे सोसौसौगंदखाय ॥ ७१ ॥
 बुगळा भगत सुपेतठग वसैनग्रकेमाँय ॥ दीसं
 ताअतिफूटरा दानदयाकछुनाँय ॥ ७२ ॥ अभ
 खभखैपरधनतकै झूटीसौगंदखाय ॥ करचुगलीदे
 दुबलदुख नितनिरपतिग्रहजाय ॥ ७३ ॥ नाँगुरके
 नहिपीरके मातपिताकेनाँहि ॥ नाँहित्रियेसुत
 मित्रके जहाँमतलवतहाँजाँहि ॥ ७४ ॥ आया
 अतिआदरकरै रुकमनराखेरौस ॥ पैचन्हांख
 परपंचकर कपडालेवैकौस ॥ ७५ ॥ जालपटकै
 हरजुगत लखणनदेलवलेस ॥ कुवदकलहकपटी

(२४) सुदबुद सब लंगाकीवारता ।

कुमितदेहग्याँनउपदेस ॥ ७६ ॥ वार्ता ॥
॥ तिणनग्रमैँइस्पासूमवसै जिणरेआठप्रहरघात
हीघात ॥ जिणरादिलरीदेवतापिणनहिँलखैवाँ
त ॥ मित्ररौकारजकरवारीकहै ॥ नैँकामपाडि
याँआंखदुखायनैँवरमैँसोयरहै ॥ बखतटालनैँ
बाहारवीताँपछै वातपूछसुणनैँ हाक्यावाक्या
होयरहै ॥ इस्यावेईमान यारमार समइयो
डातंतसार नैँ पराया घरार डंडाथूणियाँरागिणन
हार ॥ हसबौलानैँकमतीतौला ॥ सौरठा ॥
समझलियोनिजसार धनहरबौकौडाँजुगत ॥ ग्रंथ
ग्यानपरचार मित्रमारमुखकर फिकर ॥ ७७ ॥
ऐसेसूमअपार सूमसिरौमणनग्रमैँ ॥ नृपसमेतन
रनार विनफासीवासीनकौ ॥ ७८ ॥ मानैँमंत्ररसाण
मनमाँहीँझूटीजचै ॥ निपटकपटरीखान सिद्ध
विगाडैँकरपरख ॥ ७९ ॥ फूँकिधरैँनिजपगग निपटनि
पुणआचारमैँ ॥ क्रौडठगाँयेकठगग दयादिखा

वेदुरितचित ॥ ८० ॥ वार्ता ॥ इणभाँतउण
 सूमसिरौमणान्नग्रसुंमहसीखिलवतआनंदसुंआ
 ठपोहोरंगरातारहैछै जठै एकदिनरासमाजौ गरै
 माँहजोगेस्वरांकीजमातआयऊतरी जिणजमातमें
 नवनाथ और चौरासीसिद्धतपस्याकररह्याछै ॥
 जिणमाँहैजोगीमछंदरनाथजिकाचेला गौरषनाथ
 जीभिक्ष्यानैनग्रमें गया ॥ दोहा ॥ ॥ फेरीदी
 नीनग्रमें फिरियाघरघरवार ॥ खालीभटकामारि
 याभिक्षादईकुम्हार ॥ ८१ ॥ वार्ता ॥ सारा
 नग्रमेंफिरभटकनैखालीजायऊभारह्या जरैगुरुम
 छंदरनाथजी येकघरकी भिक्षा देखकर क्रोधकरनै
 कह्यो अरे अघौरीसारीतूंभिक्षाखायगयो ॥
 जातूंअघौरीहौजा जराँगौरषनाथजी हातजौडनै गु
 राँनैदोहो कहैछै ॥ दोहा ॥ सूमवसैइणनग्रमें
 दातायेककुम्हार ॥ जिणदीनीहाजरकरी फिरियो
 घरघरवार ॥ ८२ ॥ सुंमनारनरइणनगरनरपत

(२६) सुदबुद सब लंगाकीवारता ।

अरुरणवास ॥ येकौयेकणआगला आणव
स्याइणवास ॥ ८३ ॥ मिठवौलाअरु मसकरा
कभूनदेवेछेह ॥ देवौतौसीख्यानहीं सौ किम
उत्तरदेह ॥ ८४ ॥ वार्ता ॥ तरेमछंदर
नाथजी ध्यानलगायकरदेखेतौ चेलौखालीवर
वरभवंतोफिररयोहै औरभिक्षाकोईघालीनहीं
॥ फगतथेककुम्हार कुम्हारीकेघरकीभिक्षालेकर
चेलौआयोहै ॥ इणभांत ध्यानलगायकर देखनै
जौगीमछंदरनाथजी फिटकारदीन्हीं ॥ दोहा ॥
जलौनगरदाताविनाँ काहावसैठिठकार ॥ ऊठच
ल्याछिटकारकर सिद्धहल्याफिटकार ॥ ८५ ॥
॥ वार्ता ॥ सिधौकीफिटकारलागताँहींप्रवाण
ज्वालाकौभवकौ बडावेगसूं नग्रमैंच्याहंसुणौ
दूधकोसोडफांण जाणैमेवकोसोडफांण ॥ धूवाँधौ
रऊठवैठौ ॥ कूम्हारकुम्हारीचकवकगया ॥ विण
समयमैँ कुम्हारकुम्हारीरौ कपटरूपतौमिटगयो

औरकूदकरपीछाही वाँदरावाँदरीहोगया ॥ दोहा ॥
 भगेदेखभयभीतहै लगैचहूँदिसलाय ॥ उडेफलं
 गाँडाकियाँ बंदरबुरी बलाय ॥ ८६ ॥ कूटकठावै
 कटकटै डचकबजावैडाक ॥ जाणकलंकापरजले
 हणवतभारेहाक ॥ ८७ ॥ सकलनग्रनरपर
 जलया बंदरवचियादौय ॥ स्वानमँझारीऊंदरा ॥
 रहणनपायाकौय ॥ ८८ ॥ सूँमसँचैधनधररहै की
 डीतीतरखाय ॥ नदीकिनारेहूँखडौ जडामूलसूँजा
 य ॥ ८९ ॥ वार्ता ॥ उणनग्रमैसूदौयजणाव
 चिया ॥ येकतोबंदरनैयेकवाँदरी ॥ कुम्हारकुम्हा
 रीरौकपटरूपछौडनैपाछावँदरबंदरी तृतिथरूप
 धारण ॥ इति सुदबुद सब लंगा की वारता
 सहा शिवकरण रामरतनदरक माहेश्वरी
 मारवाडी मूँडवे वाले कृत तृतीयप्रकाश ॥ ३ ॥

(२८) सुदबुद सब लंगाकीवारता ।

अथ सुदबुदसबलंगाकीवार्ताचतुर्थप्रकास ।

॥ वार्ता ॥ अवेयेवांदरौनेंवांदरी चाल्याचा
लथाउत्राखंडमें अश्वनीकँवाराँकायेकपूष्पपुंजना
मवगीचामैरमणीक जायगाँ देखनें जायवसिया ॥
जठैअनेकप्रकारकाफलफूलछै ॥ और रसकू
पिकानामयेककुंडछै ॥ जठैमाहासुखरौथल दे-
खनें आनंदसूं रहवालागा ॥ घणाँदिन पछैयेकचक
वौचकवीपिणआयउतरियो ॥ उणचकवाचकवी
रेदिनकातौमिलापरहै नैरातका विछौवापडजा
वै ॥ अबैयेकदिनरासमाजौगमें आधीरातराचक
वीवौली चकवापुरुपसरीखौनिरदईकोईनहीं देख
हूंकंथविछौहीअस्तरीब्रहातुरहौरहीहूं ॥ औरतूं येक
ही दरखतकीडाहालीरीआडमैऊभौहै पिण बौले
नहीं ॥ कदंकालपरदेसगयो हौयतौसमय पाय
पाछौ आवै ॥ पिण आपणों विछोहौकदमितै
तरेपाछौचकवौकहैछै ॥ चकवावायक ॥ सोरठा ॥

कहथारामनरीवात मनचिंत्याकारजकहूँ ॥
 दिनऊगैपरभात मनमानैसोहिमाँगज्ये ॥ ९० ॥
 चकवीवायक ॥ दोहा ॥ पीवपपइयौबौलियो कौ
 यलकहुकसुणाय ॥ रैणअंधेरीपीवविन बैरणकेम
 विहाय ॥ ९१ ॥ हेहितियाराचक्कवा क्युंकररेन
 विहाय ॥ नेहसघनघनसंचरै समँदहिलौळाखाय ॥
 ॥ ९२ ॥ वार्ता ॥ तरेचकवोबोली ॥
 ॥ दोहा ॥ देसविदेसाँनांग्यौ ॥ घरारत्थौ
 इणकाम ॥ हातविसतकेआंतरै दियाबिछौवाराम ॥
 ॥ ९३ ॥ चकवीवायक ॥ दोहा ॥ दिनडू
 बौदरियावमै केतगयोगटकाय ॥ चकवारैणननी
 सरै कोइअपुरववातसुणाय ॥ ९४ ॥ वार्ता ॥
 चकवोबोलीवातघरवीतीकहूँकेपरवीती ॥ चकवी
 बोली ॥ चकवीवायक ॥ ॥ दोहा ॥ घरवीतीसब
 यादहै परवीतीकौचाय ॥ अँदोयबंदरबंदरी जिणरी
 कथासुणाय ॥ ९५ ॥ वार्ता ॥ तबचकवाबंदरबंदरी

(३०) सुदबुद सब लंगाकीवारता ।

कीकथाआदसूंअंतताँईविस्तारपूर्वककही ॥ तरेच
कवीबोली ॥ चकवागईतिथतोवामणाँईनहिंवाची
॥ अवेइणाँरोकाँईहौतवहैसोकहौ तरेचकवोवो
ल्यौ ॥ अवेअेदोनूँइणरसकूपकामेँइणघडीऔरइ
णपुलमेंपडजायतोदेवाँगणाँऔरदेवताकोस्वरूप
हौयजाय ॥ औरइन्द्रकोश्रापमिटजाय ॥ यावा
तसुणताँहीसुंदरीनामैंबंदरीआपरापतीकटकध्वज
नै कहवालागी ॥ अहौकंथरसकूपमैँतुरतपडैतरे
बंदरकपटसूंबोल्याँ पहलीथेपडौ सूअस्तरही
जावसोतौ पछैँहूंपणआयपडसूं ॥ इतनीसुण सुंद
रीतोपतीकीआग्यापाय औररसकूपकामेँसररघ
मदेसीजायपडौ ॥ पडताँहींहाडफासलीचकनाचूर
हौगया औरवाँदरौअठीउठीफिरफिरनैँदावदेखबोई
कीयौ जाण्यौँहूंपडसूंतोम्हारावीहाडफाँसलीटूट
जासी इणतरहसूंबंदरतोताकामौकाकरतोहीरह
गयौ औरसुंदरीतोदिव्यस्वरूपवान देवाँगणाँसी

अस्त्रीहोगई ॥ इतराकमेंतौवेलौंवीतीऔर दिन
 पिणऊगवालागौ ॥ बंदरकूवामैंझाँकैतौबंदरी
 रूपपलटकर अस्त्रीमाहारूपवंतदेवांगणासीमाहा
 मौहनीस्वरूपहोगई, ॥ तरेबंदरबेलातापकरैछै ॥
 पणकाँईजौरचालेनही ॥ इतराकरासमाजागमेंये
 कवादीगरआयनिसरियौ ॥ इणबंदरनैरूपवंत
 देखकरजालपटकनैपकडलीयौ ॥ तरैबंधमैंप
 डियोडैबंदरसुंदरीनैकह्यौ ॥ हेसुंदर मनंतो
 वादीगरजालनांखनैपकडलीयांजायहैसूतंसुणजे ॥
 ॥ दोहा ॥ मित्रकपटकोइमतकरो होयजग
 तमेंहास ॥ कूडकमायौवांदरे पडीगलामैंफास
 ॥ ९६ ॥ कूडनबोलौमित्रतैं कपटनकीज्येजाँन ॥
 मित्रद्रौहशिवकरणकह धनकीरतकीहाँन ॥
 ॥ ९७ ॥ इति सुदबुद सवलंगाकी वारता सहा
 शिव करण रामरतन दुरक माहेश्वरी मारवाडी

(३२) सुदबुद सब लंगाकीवारता ।

मूंडवे वाले कृत वर्णन सुंदरीनाम बंदरी देवांगणों
रूपधारण बंदरबिछौहण नामचतूर्थप्रकास ॥४॥

॥ अथसुदबुदसबलंगाकीवारतापंचमप्रकास ॥

॥ वार्ता ॥ इतराकरासमाजौगमें त्रंवावती

नामनगरीकौराजाजक्षसेणसिकारनैनीसच्योछौ सो

त्रषावंतहोयनै बगीचामैआयउतरियो ॥ जरेजल

धारीजायनेकूपमैलोटीउरासियो तरेसुंदरीलोटीप

कडलीनों ॥ जठैजलधारीकहैछै ॥ दोहा ॥

भूतप्रेतनरनागहौ केकोइदेवस्वरूप ॥ म्हानैमती

डरावज्यौ अटै जक्षसैणहै भूप ॥९८॥ करैचाकरी

लखनिरप देवकरतहैसेव ॥ लाखजक्षलारैचलै भू

ताँरौकाँइभेव ॥ ९९ ॥ सुंदरीबायक ॥

॥ दोहा ॥ नाँमैभूतपरेतहूं ॥ नाँम्हैडाकण

देव ॥ हूंमानवतनअस्तरी करसुरपतरीसेव १००

जलधारीकरजौरकर कहीनृपतमूंजाय भूपतनिर

खीपदमणीं, लीन्हीं तुरत कठाय ॥ १०१ ॥ नृप
 पूछै तुम कवनहौ, कूपपड्या किणवाय ॥ रूपवंत
 विन वसन क्यूँ, जिणरौ अरथ भताय ॥ १०२ ॥
 इंद्रतणीं हूं अपछरा, पूस्व सुगंधा नाँव ॥ पूस्व-
 वीण पाछी फिरी, कूपपडी डिगपाँव ॥ १०३ ॥
 सुरंग वसन पहिराय कर, लीन्हीं रथ बैठाय ॥
 नृप मन साँनी काँमणीं और न आवैदाय ॥ १०४ ॥
 ॥ वार्ता ॥ इतरी सुणराजा जक्षसैण रथमें बैठाय
 आपकी त्रांवावती नाम नगरीमें ले आयौ ॥ आय
 महलाँ दाखल करी ॥ दोहा अबपट राणीं पद-
 मणी, कीन्हीं पडदा पेस ॥ माल खजेनाँ सुंपिया,
 आँणदु हाई देस ॥ १०५ ॥ वार्ता ॥ अबे राजाज-
 क्षसैणके पाटराणीं पूस्व सुगंधा हुई सारौमालः
 मुलक खजानाँ, राणीके सुपरतकीया, ॥ येक दिन
 राजा महलकी तयारीक रवाई, तरे पूस्व सुगंधा
 कही, प्रथ्वीनाथ म्हारे वास्ते तो नवौ महल तयार

(३४) सुदबुद सब लंगाकीवारता ।

कशावौ ॥ जरैतो आपरैनेँ म्हारे घरवास, नहीं तौ
नहीं ॥ तरे राजा तुरत कारीगर गजधरानेँ
बुलायनेँ आछौ म्हुरत दिखायकर, नवा महलकी
नीव दिराई ॥ महल तयार होवैछैनेँ दरबार नित
आयकर जावैछै ॥ हमेसाँ राणीं सुमिलवा आवै
छै ॥ निजरचाँ मिलाप करजावैछै ॥ येक दिन
राणीं बोली प्रथ्वीनाथ, म्हांनेँ तौ आवडै नहीं ॥
इण नगरी में कोई, ख्याल तमासौ नाटकबी नहिं
होतौ दीषै छै ॥ जरै दरबार कही, रौजीनाँ ख्याल
तमासा होवैछै ॥ तरै सुंदरी बौली, अबे जाँ कोई
ख्याल तमासौ नवौ आवैसो पहली म्हारा महल-
नीचै होय ॥ फिर नग्रमें हुवै ॥ इसी डूंडी फिराई
चाहीजै ॥ तरे राजा जक्षसैण तुरत डूंडी फिरायदी
नी ॥ अबै तौ नित नवा तमासा आवै छैनेँ खेल
खिलाडी मोहोराँ असर फियाँ रीझ मौजपा वैछै ॥
येक दिनरा समाजौ गमै बादी गर पिण, कटक

ध्वजनें लेयनें आण पहुँ तो ॥ बरुती में बंदर न-
चावण लागौ ॥ जरै लौग बौल्या पहली, राजम-
हलाँ नीचे जायनें ख्याल करौ, पछै सहर में
करज्यौ ॥ अठै दरवार डूंडी फिराई छै ॥ तरे
बादीगर राजमहलाँ रा झरौखाँ नीचे आय
डहरू बजायौ ॥ और बंदरनें नचावण
लागौ ॥ दोहा ॥ डग डग डहरू बाजियो,
श्रवणाँ सुणी भणंक ॥ दौडीपइमण देखवा,
लियो उसास सणंक ॥ १०६ ॥ वार्ता ॥ बादीगर
बंदरनें झरौखाँ नीचे खडौ कीयौ, राणी और क-
टक ध्वज रैनि जरमिली, राणी सिंलाँम करनें
खडौ रही ॥ तब बंदर पूरुव सुगंधानैँ औलख कर
निरमान्य हौ यनें पड गयो, ॥ जरे बादीगर फेर
खडौकर; और बंदरनें नचावण लागौ; तरै बंदर मा-
रका डरसूँ, नाचवा लागौ ॥ अवै बादीगर बंदरक
नाँसूँ महलाँ साम्हौँ मूजरौ करावालागौ ॥ तरै बं-

(३६) सुदबुद सब लंगाकीवारता ।

दर चयखूं तरफ़ फिर फिर नैं मुजरौ करैछे, पिण
राज महलाँ साँम्हौँ हात ऊँचौँ नहि करै ॥ जरै
बादीगर बड़ी रीस करनेँ कामडी दौयच्यार झा-
डी ॥ तरे राणी दोहो कहैछै ॥ सुंदरी बायक ॥
दोहा ॥ थारी घाली साझनां धण दुखियारी जौय
इंद्र सरापी अस्तरी, देख बिछौवा सौय ॥ १०७ ॥
चंद्रायणा ॥ कंथातूं कायर हुवो, साध न सकियो
फाल ॥ तौ सिर मारै कामडी, मौ सिर ऊठै झा-
ल ॥ मौसिर ऊठै झाल कसारा तन्नमें ॥ परिहां.
लेसूं तुरत छुडाय धीर धर मन्नमें ॥ १०८ ॥
वार्ता ॥ तरे बंदर रीस करने कटकटी बांटी और
पीठ फेर वेठौ ॥ तरे पूख सुगंदा फेर कहै छै ॥
सुंदरीबायक होहा ॥ किणपर बाँटैं कटकटी,
किणपर कीयौ रीस ॥ हात कमाया कामडा, कि-
णनेँ दीज्यै दौस ॥ १०९ ॥ ज्ये पड तौर सकू-
पमें, होतौ पुरुष प्रवीन ॥ तो दोनौँ रंग साँणता,

आठ पहर लवलीन ॥ ११० ॥ धीरौ रहजे बाल-
 मां, अब तोहि लेऊं बुलाय ॥ साझन मूँघा मौल-
 का माणकदेहुं तुलाय. ॥ १११ ॥ रे साजन
 मत वीसरै, पूरव भवकौ नेह ॥ दई विछौवा देदि
 या, जीव एक दोय देह ॥ ११२ ॥ वार्ता ॥ तरै
 राणीं पूरव सुगंधा आपरी दासी सुसरमणानेंहु
 कम फुरमायौ जाये दासी इण वादीगर कनासूं
 बांदराको मौल ठेरायनै लेआव ॥ इण बंदर
 न आपाँ पढाय कर श्री दरवारके निजर गुदरा
 वसाँ ॥ तरे दासी वादी गरनै दोहो कहैछै ॥
 दासी वायक ॥ दोहा ॥ वादीगरका डीकरा । कह
 बंदरको मौल ॥ सौंनौ रूपौ चाहिये, लेह बरावर
 तौल ॥ ११३ ॥ वादीगर सुख माँगिया दासी
 दाम दिलाय ॥ लेआई निज महलमें, काँमण कंथ
 मिलाय ॥ ११४ ॥ गंगाजल सँपड़ायकर चंदण
 चरच्यौ अंग ॥ भोजन येकण थालमें ॥ भेलावैठा

(३८) सुदबुद सब लंगाकीवारता ।

संग ॥ ११६ ॥ पग चंपी दासी करै पंखा पवन
फरास ॥ बंदर भूप वणा वियौ ॥ हाजर खडी ख-
वास ॥ ११३ ॥ वार्ता ॥ अवे सुसरमणां नाम
दासी तौ बंदरकी पग चंपीकरै छै ॥ और सुसरम
णाँको खाँवँद कूथ नामें दास फरास सौ पंखौ करै
छै और पूरुव सुगंधा नास राणी खवासी में हाजर
खडीरहैछै ॥ रातदिन कुसी किलौलमें बीतैछै ॥
ऊग्या आथवियाँरी खबर नहीं ॥ दोहा ॥
पूरुव सुगंधा नित करै रागरंग सिंण गार नार
वसायौ सहलमें नृपतजबंदर जार ॥ ११७ ॥
वारता ॥ आठपो होर रंग रलियाँ करैछै ॥ खूबी
खस बोइयाँ मूंप्यारा रौमन हरैछै ॥ फूलाँरी सहज
सुख पाल पीव पौढैछै ॥ थिर मारी मसौड संग
प्यारी पट ओढैछै ॥ आपसमें चसम वाजियाँ हो-
वैछै ॥ दिलदार दिलकी दुब्ध्या खोवैछै ॥ येक-
दिन रासमा जौगमें राजा जक्ष सेंण पूरुवसुगंधाकै

महलमें जुलसाई जनान खानौ सरूहोय जिण तर-
हकी दीसी ॥ तरे राजा महल रौजापतौ करायौ
चौकी पहरा नाका बंदी कराई ॥ फेरमास पखवा-
डा सूंजाय करदेखे तौ । आगे सूँसवाय जुलसाई
मालूम पड़ी ॥ जरे राजा जक्ष सैण महलमें छिपकर
पहरै वेठौ ॥ इतराकमें तौ मालण फूल और तेलण
तेलले यनै हाजर हुई सूफूलाँ सहज बिछी जरहीछै ॥
और पूस्व सुगंधा तेल फुलेल लगाय सौले शृंगार सा
झतीथकी आयनै महलाँ दाखलहुई कटक ध्वज बं-
दरनै शृंगार करायकर, चौपड रमवा लागी ॥ तरेरा-
जा जक्षसैण कौप कर खड गलेयनै मार वा चल्यौ
दोहा ॥ काठ खडगकर कौपियो नारी पर नृप
राज ॥ जाणक चिमकी बीजली, इंद्र धडू क्यौ
आज ॥ ११८ ॥ कुसी करंताँ कूदिया नव खंड
पड़िया झूर ॥ हाड फाँसली वीखरचा ॥ हाँगया चक
नाँ चूर ॥ ११९ ॥ पड़ताँ पद मण औ जगी,
दासी आई चीत ॥ कूख पड़ी निज दासिके, अं-

(४०) सुदबुद सब लंगाकीवारता ।

त समाँकी प्रीत ॥ १२० ॥ बार्ता ॥ पूष्य सुगंधा
और कटक ध्वज बंदर, दौनू जणां, नव खंड
महलसूं पडताँहीं हाड फांसली चूरीज गया ॥
और पडतां रेमनमें बासनां रही, जिण जिण जा
यगां जायजायनै, जनम धारता हुआ, सु बंदरनै,
राजा रा डरसूं, राजा या दरयौ ॥ सूकटक ध्वज
तौ उजीण नगरीका राजा साली बाहनके घरे
अवतरियौ ॥ और पूस्व सुगंधा नैदासी याद रही
सू आपरी दासीरा गर्भमें आय बास करियौ ॥
अंत समय मन जाय, जठैही जाय जनम धरणौं
पडैछै ॥ इणतरहसूं आप आपके मनकी इच्छा
परवाणों जनम लिया ॥

इति सुदबुद सब लंगाकी वारता बंदर तथा पूष्य
सुगंधा नृप कोप मृत्यु पायन आगे अनसना रूप
धारण वर्णन, सहा शिव करण रामरतन दरक. माहे-
श्वरी. मारवाडी मंडवे वाले कृत पंचमौं प्रकास ५॥

अथ सुदबुद सब लंगाकीवार्ता षष्ठमप्रकास प्रारंभः

दोहा ॥ पूरुव सुगंधा मरचवी, सुसर्मणाँकी कूख ॥
 बरस दवा दस अनसनाँ, अन तज काढी भूख ॥
 १२१ ॥ नाँ जनमत मुख थणलियौ, पियौ नहीं
 पयपान ॥ नहीं बाचा बौली बदन, जनम पाछलौ
 जान ॥ १२२ ॥ राजा साली बाहनके, पदम
 प्रभावति नार ॥ कूख पडचौ मरवाँदरौ, सुद
 बुद राज कुंवार ॥ १२३ ॥ शालीवाहन
 नृपतपै नगर उजीणीं माँय ॥ सिंह बकरी
 भेलीपिये हणै न कौई खाँय ॥ १४ ॥ पाट
 सिरौमणि पदमणी पदम प्रभावति नाम ॥
 गज गमनीं मूय लौचनीं चंपक वरणी वाम १२५
 ॥ वार्ता ॥ येकदिनरा समाजौगके माँह राजा
 शालीवाहन सिरे दरवार कराय विराजियाछै,
 जठै सत्तर खान और बहौतर उमराव हाजर छै ॥
 छत्रपतीरै छत्रसिर छाजे छै ॥ नै नोपत वधाइ

(४२) सुदबुद सब लंगाकीवारता ।

याँ वा जैछै ॥ चँवरँ रा फटकारा लागै छै ॥ नै,
जाचकारा दलीदर भागै छै ॥ भगतणियाँ नाचै,
नै कलावत गावै छै ॥ भाट भणै नै भौजग विड
दावै छै, ॥ परदे साँरी पेसकसियाँ चाली आवै छै ॥
और हालीसुवाली मुसद्दी अरज गुदरावै छै ॥ नि-
जराँ नौ छावराँ लिरजै छै ॥ नैरीझाँ मौजाँदिरी
जैछै ॥ न्याव निरधार छाणै छै, नै माँणी गरमौ
जाँ भाणै छै ॥ राजा सालीवाहन बडा प्रतापीक,
ज्यारौ सिध्वको सो तोसौ ॥ विडरियाँ पछै बुरो-
वलायको सोरोसौ सत्रुवाँसिर कालको सोडंड ॥
इरुपौ राजासूरवीर तिकौ देहरौ प्रचंड ॥ धर्मकी
ध्वजा और मरजाद रोमेरू ॥ वेरियाँ सिरसाल ॥
तिकौ देहरौ विसाल, रूपगुण आगर, और बुद्धरौ
सागर, ॥ जिणरी कचेडी बरकरार आठपहर
दिनरेंण अडाभीड वर्णीहीं रहैछै ॥ खुणींसू खुणीं-
वासै छै ॥ दुसमण विलखे सज्जन हासै छै ॥

इतराक मैं तो डौडीदार, मालूमकरी, प्रथ्वीनाथ
 कासीजीको पंडित जौसी जोतिष विद्यारौ पढि-
 योङ्गे प्रवीण आयो छै, ॥ सूकरम विपाक वरण
 न करैछै ॥ आगलातीन जनमाँरी और भूत भ-
 विष्यत वरत मानरी कहै छै ॥ इण रौ नगरी मैं
 बडौ आचरज होय रयौछै ॥ प्रस्नकरै जिणरौपा-
 छौ उत्तर बराबर देवै छै ॥ इस्यौ पंडित हाजर
 मालूम करावै छै ॥ तरे अरज सुण हजूरहुकम
 फुरमायौ, हाजर आवे ॥ तरे पंडित आय हाजरहूवौ
 ॥ नैं आसरी वाद दीनों ॥ तरै दरबार निमस कार
 कर आदर सहित बैठायो ॥ दोहा ॥ पंडित सौं
 नृप पूछियौ, मुसटी चिंतनयेक ॥ प्रसन्न देष भूँश्वर
 कहै, हौसी पूत्र वसेक ॥ १२६ ॥ सैणारै सिरसे
 वरौ सञ्जुनके सिरसाल सूरवीर रण रौपणौं, धर्म
 नीत प्राति पाल ॥ १२७ ॥ वार्ता ॥ पंडित कह्यो
 प्रथ्वीनाथआपरे पूत्र हौसी, जिणरौ नांव सुदबुद

(४४) सुदबुद सब लंगाकीवारता ।

कंवर दिराई ज्यै, तिकौ बडौ प्रतापीक, सूरवीर
रण रौपणों, गाहड रोगाडौ, कनाँ फौजाँ रौलाडौ,
इस्यौ पूत्र हौसी, पिण येक लच्छन, परास्रिकौ
पडसी ॥ तरेराजाजी फरमायौके, सगत सूँसुधर
जासी ॥ इत राकमैँ तौ हलकारे खबर दीन्हीं,
माहाराज सफराकैँ किनारै सिंघ गउ वानैँघेरियाँ
ऊभौछै ॥ इतरी सुणताँ प्रवाँणतौ जणैँ सौरमैँ
आग धरी, वासग नागको सोते सो, जाण ज्येका-
लको सो रोसौ ॥ खंभ फटकारताथ का नखडग
झटकारताथका, सिंघरी सिकार चढिया, इतराकमैँ
तौ दासी आय मालूम करी ॥ चद्रायणाँ ॥ राज-
अहेडे नीसरुचा, घेरी सगली बीड ॥ अरजमुणों
दासी कहै, चले राणीके पीड ॥ चले राणीके पीड
अरज अब धारज्ये ॥ सिंघ मार माहा राजक
तुरत पधारज्ये ॥ घरकौ जौसी तेडक बेलों
छाँटज्यौ ॥ परिहाँ, आवै सुदबुद नांव बधाई

वाँटज्यौ ॥ १२८ ॥ राजावायक ॥ दोहा ॥ सिंघ-
 मारघर आवरुयाँ जद बाँटाँला भूर ॥ रंग वधावा-
 गावज्यौ जदे बजासुयाँ तूर ॥ १२९ ॥ वार्ता ॥
 राजाजी सिंघकी सिकार पधारिया, जठे बडौ न
 वगजौ भृघराज, मार कूटकर खलहाँण कर, गाडा
 में घालनै, बडा घमँड ठाटसूँफते रानिसाँण घुरा-
 ताथका, पाछा उजीण दाखल हुवा, साथौ वधायौ
 वँटी ॥ केसरकसूँ वागली जिया, नौपताँ वुरी, तौपारी
 सिलकाँवधाइयाँ हुई, ॥ दाईनै लाख पसाव दे विदा
 करी, ब्राह्मण भोजन, वरणी पाठ अनुष्ठान हौवाला
 गौ ॥ गौठ गूघरियाँ गीतनाद नित नवा उचरंग
 था वैछै ॥ भाट भणैनै, भोजग विडदावैछै ॥ जठे
 तठे ठाट वाट, मंगला चार गावैछै, नै घर घर बंदर
 वाल बंधावैछै, ॥ कँवरजी राई वधता तिलवधे-
 छै, नै पगल्याचाल पाँ सधेछै ॥ दोहा ॥ राई व
 धता तिलवधे राज अंसरज पूत ॥ मात पितामनमौ

(४६) सुदबुद सब लंगाकीवारता ।

दवै, सुद बुद कँवर सपूत ॥ १३० ॥ वार्ता ॥
बारह बरस मैं कँवरजी हुवा, ॥ ज्याँरी औपमाँ
कामदेव सारखीछै जिणनै देख्याँ देवां गणाँही मौ-
हित हौजावैछै ॥ कँवर जीकी असवारी हौय जव
बडा बडा घराँकी पद मण्याँ देखण नै दौडैछै ॥
दोहा ॥ कंथ छौड कांमण भगै धायतजै निज बा-
ल ॥ कर दरसण पर सण हुवै बिन दरसण बेह्ला
ल ॥ १३१ ॥ केई कँवारी छौकरचाँ पूजै ईस्वर
गौर ॥ बंछै राज कंवारनूं दाय न आवै और
१३२ ॥ वार्ता ॥ इतरा कमैं तौ कछ भुजरा राजा
सूरज भांण रैवह रा नारेल आया ॥ कँवरजीरी
सगाई हुई ॥ धणां गाजावाजा बधावा गवीजिया
कितराक दिन पछै व्याव हुवौ तरै घणां घमंड
मूँ परणनै पधारिया ॥ तिकी सुंदर सुरकन्या नाम
असतरी बडी रूप गुण आगर बुद्धरी सागर सील
परायण गजगमनीं जिणसूँ कुसी किलौलाँ कर

रथाछै ॥ ज्युँ गोपियाँ में कान्ह और ताराँमें
 चंद्रमाँ नै असतरियाँमें अनंग ज्युँ राजैछै जिणरी
 गुंज अवगाज इंद्रज्युँ गाजैछै ॥ आठ पोहौर रंगर
 लियामें बीतैछै ॥ ऊगियाँ आथ वियाँरी खबरनहीं
 कँवर पदे सुख विलसैछै ॥ अवै पीतम प्यारी सूं मन
 मिलियाछै ॥ और रंग रैझरौ खे झिलियाछै ॥ दोहा
 पलकन छोडै पदमणी पीव रही विलमाय ॥ चमक
 पथरज्युँ लौहौके दिन दिन प्रीतसवाय ॥ १३३ ॥ इत
 सुदबुद सुख भौगवे उतरंभादुख भौग ॥ नाम धरायौ
 अनसनाँ लिख्यौ करम संजाँग ॥ १३४ ॥
 ॥ अवे कहूँ इणरीकथा कवि शिवकरण दरक ॥
 विगतवार सब संभलौ राखूं नहीं फरक ॥ १३५ ॥
 ॥ वार्ता ॥ अब अठी राजा जक्षसेण रीदासी सुस-
 र्मणाँके पेट पूष्य सुगंधा पडनै जनमी हुती ॥ तिके
 वरस वाराँमें हुई पण अनपाणीकौ अनसन, जल-
 मतीही लीन्हौ ॥ और मुखरी जीभसूं वाचावौले

(४८) सुदबुद सब लंगाकीवारता ।

नहीं ॥ जिणसूं नाँव अनसना पायौ ॥ दोहा ॥ रूप
रती मृवलौचनीं, रहण सुसील सुभाय ॥ मुखरी
जीभन ऊथले, पाणीं अनन खाय ॥ १३६ ॥
वरस द्वादस बी तिया, टगटग झांकेनैण ॥ नांथ
ण पियेन अनभखे नांमुख बौले वैण ॥ १३७ ॥
पाव पलक नहिं बीसरे पूरव भवरी बात ॥ सास-
सास सिक्करण कह, यादकरे दिनरात ॥ १३८ ॥
॥ वार्ता ॥ येकदिन रासमा जौगमें अनसना तो
न्हाय धोयने सूरजरे अरघ धूप दीप नैवैद्य सहित,
अरचा पूजन करनें, लारला जन मांरी यादकर
रहीछै नें हियामें ध्यान धर रही छै ॥ इतराकमें
तो जोगी गौरखनाथजी. मछंदर नाथजी राचेल।
नग्रमें भिक्षाके वासते आय नीसरिया तेंरे अनस-
नां जौगे श्वरांसूं आदेस कीयौ, तरें गौरखनाथजी
आसीस देनें कुशलात पूछी, और पूछियौके बार्द
पती कहां है, जरां अनसना कयो माहाराज, वह-

तौ नग्नउज्जणीरा राजा शालीवाहनरे घरे जन्म
 लीयौने हूँदुखियारण दुख भोगऊहूँ पती तोइण
 भाँत आनंद भोगवै छै ॥ दोहा ॥ शालीवाहन
 नृपतग्रह, जनम्यौ नगरउजीन, इहें दुखियारी
 दुखलह्यौ दइव विछौहा दीन ॥ १३९ ॥ वार्ता ॥
 तरे गौरखजती बौलिया वाईथारे अवे बेगोई मि-
 लाप हुयजासी ॥ जरे अनसनापगे लागी नैकह्यौ
 आपरा वचन फुरौ ॥ इतरीवात बतलावण जौगी
 कनें, अनसनाकैहौ तांहीं प्रवाँण, सुसर्मणां अनसना-
 गी माता दौडने जोगीका पग पकडलिया ॥ और
 णरी हगीगत पूछ्या लागी ॥ तरे जोगेश्वर लार-
 गी आद अंतसूँ प्रनालिका सहित वातकही ॥ इण
 रहकी वात सुणकर राज लौकमें बडोकौतक हुवौ
 ब सहरमें पिणवात हुई के गूगी सुखाँ बौली ॥
 रै अनसना नै राजा जक्षसैण बुलायकर पिछली
 गीगत पूछी ॥ नै अनसना मुख बौल कर राजा

(५०) सुदबुद सब लंगाकीवारता ।

नै सारी वार्ता कही॥और नग्रको सारोलोग देखण
नै आयौ ॥ दोहा ॥ हुवौ अचंबौ नग्रमें गूँगी मुख
बोलंत ॥ आगै हुईन हौवसी, सबनर यूंतौ लंत, ॥
॥ १४० ॥ वार्ता ॥ अवे राजा अन सनानै कहैछे
॥ दोहा ॥ जक्षसैण करजौड कहि, गुन्हों करावौ
माफ ॥ बरसदवा दस पारणै, अनजल लीजै आप ॥
॥ १४१ ॥ वार्ता ॥ जरै अनसनाँ बोली, कासी
विस्वनाथका दरसण करनै अनजल लेसाँ ॥ तै
राजलौक समेत कासी आया आयनै विस्वनाथ
और कालभैरवका दरसण कर पाछाडेरैआया ॥
दूसरे दिन अनसना तौ जाय नें करवत लीन्हों ॥
कही उजीण नगरीका पदमासाहरे घरे अबतरूँ
नाम सबलंग्या पाऊं ॥ सुदबुद कँवर सुंघरवास
इतरी सुणतांहीं अनसनारी माताजाय नें करवत
लीयौ ॥ सो पदमा साहरै घरे चंपक रायरी
कूख जनमू और नाम सुजाण राय पाऊं ॥ ने

सब लंग्यारी टहलमें रहूं ॥ इणतरे अठे इतरी
 बात राजा जक्ष सेंण सुण ताँहीं प्रवाण करवत
 लीयौके हूंपारा न गरकान गर सेठचौखराजके
 घरे अवतरूं, नाम रूपसी कंवर, और सबलंगानें
 परणूं ॥ इणतरे कहनें करवत लीनों ॥ अठी सु-
 सरमणां दासीरौ खावंद कुंथनांमें फरास, करवत
 लेयनें, उजीण नगरीमें, सुदबुद कंवर शी खवासी में
 रहूं ॥ और नाई चनणियों होऊं ॥ इणतरे, च्याखूं
 जणा करवत लेयने इच्छा प्रवाणें आप आपरेठिका
 णेंजन्म लियौ ॥

इति सुदबुद सबलंगाकी वारता अनसनाकासी
 करवत लेकर, इच्छा जनम धारण वर्णन
 स हा शिवकरण रामरतन दरकमोहेश्वरी
 मारवाड़ी मूंडवेवाला कृत, षष्ठम
 प्रकाश समाप्त ॥ ६ ॥

(५२) सुदबुद सब लंगाकीवारता ।

॥ अथ सुदबुद सबलंगा की वारता ॥

सहा शिवकरण रामरत्न दरकमाहेश्वरी मारवा-
डी मूंडवेवालाकृत सप्तम जन्म वर्णन लिख्यते ।

॥ वारता ॥ अठी दासी तौ करवत लेयने उ-
जीण नग्रका नग्र सेठ पदमा साह रेखासा दासी
चंपकराय, नामें तिकी माहारूप गुणकी रास,
तिणरी कूख पडने अवतरी ॥ जिणरोनांव सुजाण
राय हीनों ॥ तिकी पिण माहारूपवान, विचिक्षण
सर्वगुण संपन्न, दिन दिन अकिध तेज ॥ बधती
कला, इसीकन्या जनमी, ॥ उठी सुदबुद, कँवर,
तिकौ उजीण नगरीमें, राजा शालीवाहन रीपाट-
राणी पदम प्रभावतीनामें छै तिकांरी कूखमें जन-
मियौई छौ ॥ अठी जक्षसैण राजा करवत लेयने,
पारा नगरीमें, चौख राजसेठके घरे जनम लेयने,
नामरूपासा पायौ ॥ और चनणियों नाईरे घरे
जनमलेयने, रछौड़ी सम्हायकर, सुदबुद कँवरकी

चाकरीमें लागौ, ॥ अवे सेठ पदमासाहरे घरे,
 सावलंगा, सात बेटां ऊपर बेठी हुई, ॥ तिकौ सेठ
 किर्यौहे कछे ॥ केधनकौ आरपार नहीं ॥ लाखां
 परलेखण नैं क्रोडाँपर कमलम ॥ और असंख्या
 ऊपर धजा ॥ बडनामीं सेठ ॥ राजरौ प्रद्वान जि
 णारे घरे पुत्रिजनमीं ॥ जिणरो उछाव, पुत्रसूई
 अधिकमांनी ज्यौ ॥ और सौ बनथाल बजाया ॥
 साइयां वधाइयां वटी मंगल डौलवागा ॥ दोहा ॥
 घरघर बांटी गूधरी, घरघर बंदरवाल ॥ साहपद
 म घर अवतरी, सावलंग्या सुखमल ॥ १४२ ॥
 गोहूं बधती जौ बधे ॥ माँणक जिस डौरंग ॥
 पातलपेटी पदमणीं, चंपक बरणौं अंग ॥
 ॥ १४३ ॥ आँगण खेलै बापके, सखी सुजाणीं
 साथ ॥ रमताँ कूंकम पद मँडै, रसम जिसडा
 हाथ ॥ १४४ ॥ वार्ता ॥ अवे सब लंगा और
 सुजाण रायदासी, दोनांके येक जीव मिलर्यौ

(५४) सुदबुद सब लंगाकीवारता ।

छै ॥ घडीयेक अंतर नहिं पडे ॥ यूंक रताँ सब
लंगा वरस इग्यारारी हुई तरे पारा नगरमें, चौख
राज सेठ रा बेटा, रूपसी कँवर सूँ, सगाई हुई ॥
॥ दोहा ॥ रूप कँवरका रूपको कवीन लाधौ
पार रूप समंदर रूपरौ, कौट काम देव वार
॥ १४५ ॥ वार्ता ॥ अठी सबलंगा पिण
रूपरी रंभा छै ॥ जिणरी जंघ जाणजे, केलीरा
खंभा छै ॥ दोहा ॥ जंघ रंभ रा खंभसी, पींडीसु
घटै घाट ॥ बाह्याँ बेलण बेलियाँ, नाजुक निपट
निराट ॥ १४६ ॥ कमर छटा हद केहरी, रंगम
मौल्या अँन ॥ चीता लंकी मृघ नयन, कौयल मधुरा
वँन ॥ १४७ ॥ वार्ता ॥ अवे रूपसी कँवर रे पिता
रावररी, और साव लंगारे पितारा घररी जौडी
मिली ॥ कितराक दिन पछे येक दिन रासमाजौ
गमें, साव लंगा बौली सुजाण राय, कोई कारीगर
खवासने बुलायल्यावे, तौ म्हारानख लिरा वसूँ ॥

तरे सुजाण राय तुरत, महलां सुंनीची आई ॥
 आगे देखे तौ महाराज कँवारकौ खवास, चान-
 णियों, चाल्यौ आवे है ॥ जरे सुजाण राय खवा
 सजीनें काँई दोहो कहे छै ॥ सुजाण राय वायक
 ॥ दोहा ॥ लटपट बाँधौ पागडी, पेटी राखौ पास,
 कानाँ भौती जगमगे, किणरा राज खवास ॥ १४८ ॥
 खवास चान णियाँ वायक ॥ दोहा ॥ आँटपले
 टाँपाघडी पेटी म्हारे पास ॥ कराँ खवासी राजरी
 सुद बुद तणाँ खवास ॥ १४९ ॥ वार्ता ॥ तरैसुजाँण
 राय घणीं नरमाई सूंकही खवासजी आप म्हारा
 बाईजी रानखले देख्यौं काँई ॥ तरे खवास कही
 हाजर सेठजीकी लाड कँवरका नखजर लेदे स्याँ
 अवेसुजाँणराय, खवासजीनें साथे लेयनें, महलाँ आ
 य हाजर हुई ॥ आगे सब लंगा, हिंडै हींड रया छै ॥
 खवासजी महलाँरी खिड़कीमें बड़ताँही साँम्हौंदे
 खियोसू सबलंगासूं चौनिजर हौ गयानें सावलं

(५६) सुदबुद सब लंगाकीवारता ।

गाको रूप देखकर छिकडी गुमहुवा नैजाणें, मिर
धीकोसो झोलौं॥और सीतांगको सोडबोलौं॥कनाँ
भाँगकी सीलहर जाणें काला नागको सौजहर ॥
खवासजी तौ मुरछागत होयनै लौट पलेटाहौगया
गुडैछै ॥ जाणें कूकडी सूतरी ॥ कनाँ बाजीगरकी
सी कबूतरी ॥ महलारी सात बीसी पेडियाँ संगु
डतागुडता चानण चाकमें आवता ठहरिया ॥
अवै खवासजी तौ चित्ता पडियाछै ॥ जाणें बादी
गर सूवाद खेलवा अडियाछै ॥ दासी सुजाणराय
हवाघालनै साव चेत करैछै ॥ और सावलंगानें
कहेछै ॥ चंद्रायणाँ ॥ खासानाई कँवरकौ राम
वचावै राज जाहरहो सो जगतमें अनरथ
होसी आज ॥ अनरथ होसी आज जगत सब
जाणसी ॥ परिहाँ कोई न लषसी भेद भरम सब
आणसी ॥ १५० ॥ सब लंगावायक चंद्रायणाँ ॥
चौवारा दोयचपारक ऊँची मेडियाँ ॥ खड बड प-

व्यौ खवास गुडं तौ पेडिया ॥ चंगौहौय खवासव
 राँदिस जावसी ॥ परिहाँ म्हाँराजिवमें जीवजरैई
 आवसी ॥ १५१ ॥ वार्ता ॥ खवासजी घडी दोष
 सूँ साव चेत हुआ ॥ मुरछा खुली तरे सुजाण रा
 य पाणील्यायनें आँखियाँ छँटाई ॥ अवे रछौडी
 सम्हालनें ऊभारया तरे सुजाण राय बोली अवे
 आप सावचेतीसूं पगत्याँ चढौ तरे चनणियाँ काँई
 कहैछे ॥ दोहा ॥ परतन पाछौ पगधरूँ मूठ च-
 लावै नार ॥ उरघ्यौ पेटी पाघडी साले चौट अपार
 १५२ ॥ वार्ता ॥ तरे दासी पाछो कहेछै ॥
 दोहा ॥ मूठ चौट जाणें नहीं आखड पड्याख
 वास ॥ तल मुंडी पग ऊपरै दौरा आया सास
 १५३ ॥ महलाँ चाल खवासजी पड दौ देसूं ताँण
 मुख ठक बैठै पद मणीं जदनख लीज्यौ आँण
 ॥ १५४ ॥ वार्ता ॥ तरे खवासजी फेरपाछा डिगता
 डौलता पड़ता आखड़ता रूपरा रसीला सवलंगारा

(५८) सुदबुद सब लंगाकबिारता ।

रूपनें निरखवा सारू महलारी पेडियाँ चढवा
लागा जाणे धतूरा रौ जहर कना वासगरी सीलहर
खवासजी झौला खावता थका रूपरा लौभी पाछा
महलौं जाय दाखल दुआ, ॥ आगे सुजाण राय,
पडदौताणदीनौ, ॥ पडदामेंसूं हात वारै काढनै
नखलिरावेछे ॥ येक नख आंगणें पडगयौ, सू
आंगणें पडताहीं प्रवाण, आंगलीमें बलन लागगई
जरे सब लंगा कही, सुजाणराय, पाणीरौ रूपेट
भर ल्या, म्हारानख पाडीमें न्हाँख नहीं तौ हाथमें
बलन, पडीजायछे, जरे सुजाणराय गुलाब जलरो
प्यालौ भर हाजर करियौ, खवासजी, नख प्याला
में न्हाखेछे ॥ सुजाणराय, गिण गिणनें भेला कर
राखेछे ॥ जरे चनणियें मन सूबो कीयौ इणमें सूँ
नखतो चौरणा चहीजै ॥ तरै येक येक नखरी दोय
दोय फासा उतारणीं सरूकरी ॥ येक तौ रूपेटामें
न्हांखेछे, नें येक आपरी अंगरखीरी बांहमें उतारेछे

अठी सुजाणराय वीसूँ नख गिणनें रूपेटामें सूनि
 कालनें हथेलीमे मसलकर, गोली करलीनी ॥
 तिकी, जाणें मेंगरी गौलीकोसौ नरवास ॥ उण
 गोलीरो उजास जाणें विलोरी पखाण सारखोछे ॥
 अठी चोरी सूँआधा नख लेयनेखवास जी पिणवि
 दा हुवैछै ॥ तरैसुजाण राय खवासजीनें पांचमो
 हौर विदागीकी दीन्ही खवासजी डिगताडौल
 तापाछा घरैपूगा वडी च्पार अचेत रया ॥ घर
 का स्थाणाँ समजणाँ वेद भोपा मनायानें डौरा
 मादलिया कराया ॥ खवासजी सावचेत हुवा
 जितरे कतौ महाराज कँवाररो बुलावो आयो
 ॥ जराँ जाय हाज रहुवा चनणियांनै जेज घणीं
 लागी जिणसूँ कँवरजी रिसकरनें दोहौं केवेछे
 ॥ नें चनणियों पाछो कांई जुवाव देवेछै
 ॥ कँवरजी वायक ॥ दोहा ॥ साची कह देचन-
 णियाँ, कठे लगाई वार झाडूं तो नें ताजणाँ,

(६०) सुदबुद सब लंगाकीवारता ।

काठ खडग लयूं मार ॥ १५५ ॥ खवास वायक ॥
क्यांनै झूडौ ताजणाँ, क्यूं मारो छो आप ॥ रामब
चायौ ऊवरच्यौ, राजतणे परताप ॥ १५६ ॥
कँवरजी वायक ॥ काँइं तोय लीन्हौं डाकण्यां
नांख्यौ भूत मरोड ॥ कन बादी गर बादियो,
काले खादो तौड ॥ १५७ ॥ खवास वायक ॥
भूत भुजंग न डाकणीं, नां बादी गरलौट ॥ सेल
कलेजै सालियो, नैन चपेटाँ चौट ॥ १५८ ॥
कँवरजी वायक ॥ किण थारे भाला मारिया, किणें
चलाया बाँण ॥ माफ गुन्हाँ सौ बखसिया, साच
बता सहनाँण ॥ १५९ ॥ खवास वायक ॥ खौल
पलामूं कर दिया, यह लीजे सहनाण ॥ इसडा न
खणिण आँगल्याँ, विणें चलाया बाण ॥ १६० ॥
कँवरजी वायक ॥ फूटौ काच विलोरकौ, दीन्हौं
म्हारे हात ॥ झूटौ वौले चनणियाँ, अधिक फांसली
जात ॥ १६१ ॥ वार्ता ॥ कँवरजी नखदेखनै

बोल्या, ओतौ बिलौरी पाषाणरौ चूरौ छै ॥ तरे चन
 णिये अरज करी गरीवा निवाज हाताँ पगाँश नख
 छै ॥ जरे कंवरजी फरमायौ ॥ इणरी तारीफ
 काँई तरहसूँ मालूम पडै ॥ तरे खवास तुरतही
 गरमपाणीरो प्यालो भरायनें नखन्हांक दीन्हां,
 अवे नखतो पाणीमें न्हांखतां प्रवाण, गलनें नरम
 मेंणरे सरीखा होय गया ॥ जरे चनणिये हथेलीमें म-
 सलनें गोली बांधकर, कंवररे हाजर नजर गुदराई ॥
 खवास वायक ॥ दोहा ॥ हीरकणीसा चकमके, पो-
 तजिस्यो पुखराज ॥ नख छे नाजुक नारका, नैणाँ
 निरखी आज ॥ १६२ ॥ चंद्रायणां ॥ देस विदेसाँम्हें
 फिरचौ; जमीन देखी जोय सुंदर देखी सहरमें, इसी
 नदेखी कौय ॥ इसीन देखी कौयक नाजुक काँमणी ।
 हात घडी करतारक इधकी भाँमणी ॥ बोले अमृ-
 त वैणक आवे कौयली ॥ परिहां, खंड प्रखडौं नार
 इसी नहिं हायली ॥ १६३ ॥ सिंगलदीप निहारि

(६२) सुदबुद सब लंगाकीवारता ।

यौ, देख्यौ सहरबलखा ॥ साहपदम घरडी, करी देखी
येक पलक ॥ देखी येक पलक, साह घरडी करी ॥
खासा दासी लार सुजाणीं नीखरी ॥ गजगैवरकी
चालक ऊभी वाघणीं ॥ परिहाँ, चंदनके रे रूख
लिपट्टी नागणीं ॥ १६४ ॥ वार्ता ॥ खवास बौलि-
यौ, माहाराज, आपणा नगरमें इण अहनाणां अ-
सतरी देखा आये हूं ॥ जिणराहातां पगांरा ये बी
सूं नखछै ॥ तरै, महाराज कँवार खवासने काँई
दोहो कहैछै ॥ कंवरबायक ॥ चंद्रायणां ॥ काँई
आकासां उतरि, किमूं पतालां सेस ॥ इसी सरा-
वे कांमणीं, ऊझड हौगयो देस ॥ ऊझड हौगयो
देस, क वणियां जातनें ॥ परिहां तूँ नाईकी जात,
वधावै वातनें ॥ १६५ ॥ खवास बायक ॥ नहिं
आकासां उतरि जनमीं नहिं पताल ॥ सूवौ ल्या
यौ चांचमैं, फूलीचंपक डाल, फूलीचंपक डालक,
कलियां कुंदरी ॥ परिहां देख्यांहीं सुख होयक

लहर समंदरी ॥ १६६ ॥ कँवर बायक ॥ तूं महि
 मां इसडीकरे, जाणक झूठीवात ॥ कै किण मुखसूं
 संभली, सुपनों आयौ रात ॥ सुपनों आयो रात,
 नैन नहि देखियां, परिहां मनसूं वात वणाय करे
 मत सेखियां ॥ १६७ ॥ खवास बायक ॥ कर को
 मल कटिकेहरी, मृगनैनींसी नार ॥ खंजनमीनच
 कौरसे, हातघडी करतार ॥ भली येक भासनीं ।
 काला बादल मांह चमक्की दामनीं, बोले अमृत
 वणक, चंपेक्रोयली ॥ परिहां खंड प्रखंडा नारइसी
 नहिं होयली ॥ १६८ ॥ कँवरजी बायक ॥ कौन
 घरौं उतपतभई, कौणघरौं अवतार ॥ कडाकिलं-
 गी वकसदां, तुरत मिलादेनार ॥ तुरत मिलादे
 नार, कचंगी गौरडी ॥ किण घर राजकुँवार, किणां
 घर छौरडी ॥ साचीकह दे वात कपट मत राखज्ये ॥
 परिहाँ चाकर चतुर सुजाण झूठमत भाखज्ये
 । १६९ । वारता ॥ इसीतारीफ सुणनै, माहाराज कुँवार

(६४) सुदबुद सब लंगाकीवारता ।

चनणियाँनें काँई कहेछै ॥ चंद्रायणाँ ॥ सोनों चाँ
दी रतनघूं तुरी समपूं तोय ॥ खासा नाई रावलौ
नार मिलादे मौय ॥ नार मिलादे मौयक देखांनेण
सूं ॥ भावे बोलन बोल बकराँ बैणसूं ॥ निजराँ दे
हवताथ पटावखसावसाँ ॥ परिहाँ ॥ देखाँप
दमण नार पछे अन खावसाँ ॥ १७० ॥ दोहा ॥
तुज वाणीं श्रवणाँ सुणीं, करद कलेजे पार ॥ जौ
भुजचावे जीवणौ तुरत मिलादे नार ॥ १७१ ॥
॥ वार्ता ॥ कँवरजी तौ अनसन लेयने पौठरयाछै
और चनणियों कँवरजीने समझावेछै ॥ पृथ्वी
नाथ, थूकिणतरह सूं देखीजै नग्रसेठ पदमसीजी
रीलाड कँवरछै ॥ नें अकन कवारीछै ॥ तरै कँ-
वरजी खवासनें काँई केवेछै ॥ नें खवासपाछौ
काँई जुवाव देवेछै ॥ चंद्रायणाँ ॥ म्हेनहिंदांतण
बौड़स्यां चनण्यां साचीजाँण ॥ विनदेख्यांअ-
लनां भखां माहां कालकी आँण ॥ माहां कालकी

आँक निरखां नैणसूं ॥ परिहां पछै पिवाँलानीर
 वकारां वेंणसूं ॥ १७२ ॥ खवास बायछ ॥ बडाव
 रांकी डीकरी थे कांइ पकड्यौ गाढा ॥ मुसकलम्हानें
 कँवरजी इतकूवौ उत खाड ॥ इतकूवौ उत खा-
 डक मँहणों लाग सी ॥ परिहां नाई जात कर्मीण
 भरोसौ भागसी ॥ १७३ ॥ वार्ता ॥ खवास कँवर
 जीनें समझावेछे ॥ तरे खवासयेक अकलउपाय
 बोल्यौ ॥ कँवरजी साहब मिलवा कौ येक उपाव
 भताऊंछूं ॥ गुन्हौ माफकराव ज्ये ॥ जरै कँवरजी
 राजीहुयकर बौल्या तूंकह सीज्युंई करस्यौ ॥ तरे
 कही आप पंडितकौ भेष बणायनें पधारोतो मि-
 लाप होजाय तरे कँवरजी पंडित बणनें पधारिया ॥
 दोहा ॥ पीतांबर पटधारिया पहर खडाऊ पाय ॥
 पुस्तक लीन्हौं खाखमैं पदमण निरखणजाय १७४
 वार्ता ॥ कँवरजी जायनें सब लंगारे झरौखां नीचे
 ऊभारहिया आगे सबलंगा और सुजाण राय

(६६) सुदबुद सब लंगाकीवारता ।

झरौ खारे गौखाँ हवा लेरया छै ॥ इतरा कमें तौ
पंडितजी निजर आया ॥ दौनारै चसमां मिलि-
या ॥ तरे सब लंगा, कँवरजीनें देखकर मौहित
हुई ॥ और सुजाणींसँ बतलावेछै ॥ दोहा ॥ सुजां
णीं सुण दासीयां, सांभल येक समाज ॥ नैणां
इचरज देखियौ, इसडौ पंडित आज ॥ १७५ ॥
॥ वार्ता ॥ सबलंगा रोदोहो सुणनै, सुजाणीं बौ-
ली ॥ वाईजी, उजीण नगरीछै, जिणमें केईक
पंडित तौ आवेछै नै, केईक जावेछै ॥ इणरो काँ
ई इचराज करोछौ ॥ जरां सुजाणराय पंडितजीनें
काँई चंद्रायणींके वेछै ॥ नै पंडितजी, काँई पाछौ
जबाव देवेछै ॥ चंद्रायणां ॥ गलियांम्हारी आयक
बैठा वांमणां ॥ गल फूलंदीमाल, पधारचां पाँमणां।
पुस्तक लीनौहात, कमर रूमाल है परिहां ज्यां
पाया भरतारक नार निहाल है ॥ १७६ ॥ कँवर
जी वायक ॥ दोहा ॥ गौरीऊभी गौखड़ां, नैण

डमर करचां ॥ ज्यूं विणजारौ हालियौ, केसर
 भार भरचां, ॥ १७७ ॥ चंद्रायणां ॥ मृघसलूणां
 नैणक भँवरावंक है ॥ गत्तगयंदां चालक चीता
 लंक है ॥ नाक सुवाकी चाचविचीत्तर भाल है ॥
 परिहां, ज्याँघर ऐसी नारक कंथनिहाल है १७८
 ॥ सुजाण रायवायक ॥ चंद्रायणां ॥ सहर बडा
 उज्जीन जिनों दा बामणां ॥ पुस्तकलीन्हा हात
 पधारचा पाँमणां ॥ औठ सुरंग बनात दुपटा ल-
 लहै ॥ मूछभँवराँ वंकक टीकौ भाल है ॥ भर
 जौवन मुसताकक गौसा लाल है ॥ परिहां, जिण-
 घर येसा कंथक नारनि हाल है ॥ १७९ ॥ कंवर
 जी बायक ॥ सहर बडाउज्जीन जिनों दीकाँमणीं ॥
 जुलफ्याँ परकुर वान निजर वर सावणीं ॥ औठ
 ण दिखणीं चीरक लहँगालाल है झीणींकाजल
 रेखक विंदी भाल है ॥ नाक सुवेदी चाँच गुलाबी
 गाल है परिहां। ज्याँघर नाजुक नारक कंथनिहाल है

(६८) सुदबुद सब लंगाकीबारता ।

१८० अवे सावलंगा सुजाणरायसूंकाई दोहो कहैछै
चंद्रायणां॥डीगा गोरा पातला, जुलफ्याँ भँवर भ-
वंत ज्यांनित पूजी गौर ज्या, ज्यांघर इसडा कंथ॥
ज्यांघर इसडा कंथ, सुवै सुख नीदंसूं अंगसूंअंग भि-
डाय नवला वीदंसूं॥हितचितकी दोयबात कहिवडै
खोलिये ॥ परिहाँकर जोवन कुरवान विहसि मुख
बौलिये ॥ १८१ ॥ वार्ता ॥ सुजाण राय बौली
वाईजी साहब, रूपतो इणपंडितको बर साव-
णोछै. पिण असेंदा मुलकरौं दीसैछे ॥ जरै
सवलंगा कही, पंडतने तेड़ ल्याव ॥ थारोहात
दिखाय ॥ जद सुजाणराय पंडतजिने काँई दोहो
कहैछै॥सुजाणराय वायक ॥ सौरठा॥कांडंथे पठ्या
पुराण, काँई जाणौ जाँतिषकला ॥ स्थामूद्रिक
कनकौक, भैद भतावौ पंडिता ॥ १८२ ॥ पंडित
वायक॥पट नव वावनअंक, कलावहौतर म्हे पठ्या
गुणको गाहक नाँह, कहौ किणाँ नें दाखवाँ ॥

१८३ ॥ दोहा ॥ सूपसिलप जौतिस पढ्या, वैद्य
 क मंत्र रसाण ॥ इण नमरी मूरख घुजै ॥ गुणकी
 नहीं पिछाण ॥ १८४ ॥ वार्ता ॥ जरै सुजाणराय
 कही पंडितजी म्हारौ हात देखौ ॥ तरे सुजाणराय
 रौ हात देख नैकयौ केथारा सिरदार कोने थारौ
 येक जीवछै ॥ जरै सुजाणीं कयौ म्हारा वाईजी-
 को हात देखौ ॥ तरे पंडितजी दोहोकहैछै ॥ पंडि-
 त वायक ॥ दोहा ॥ कूण जात काँई नाँवहै किणघर
 लाड़ कँवार ॥ म्हानै संध्या साझणी कीज्यौ मती
 अँवार ॥ १८५ ॥ दासी वायक ॥ दोहा ॥ झटपट
 जलदी चाल स्यां चटकै देखो हात ॥ गटपटकौ
 काँई काँइ कामछै, करौ दुटिपी वात ॥ १८६ ॥
 ॥ वार्ता ॥ इतरी वात सुजाणराय की सुणतार्ही
 प्रवाण माहाराज कँवारतौ सावलंगारै महलां दाख
 लहुवा, और सुजाणराय आडी कनात बाँधने
 सावलंगाने कहै छै वाई साव आपरौ पिण हात

(७०) सुदबुद सब लंगाकीवारता ।

दिखावौ ॥ पंडितजी सारी विदियामें पढियौड़ा
प्रवीण हैं मूमनरी बात कहसी ॥ तरे सब लंगा
हात पड़दा में सूंबारे काठनें, हात जौड़ और
आदर कर, पंडितजीनें बैठाया छै ॥ अवै साब
लंगा कनात में सूँ हात दिखायौ ॥ तरे पंडितजी
हात देखनें कही, थारा मनमें दोषड़ चिताई रहवो
करे छे ॥ कौई पूर बला भवरौ प्रीतममनमें बसै
छै ॥ और थारी नवमाँ बरसमै सगाई हुईच हीजै ॥
वर पिण आपरी जौड़ी रौमिलै, परन्तु चित
प्रसन्न नाहिं हुवै ॥ हात देखताँ तौ इण तरहदी
खेछै फेर जनम पत्रिका देखनें फल कहस्यौं,
आवात सुणताँई साब लंगा मुस कायनें हात पड़
दामें खेंचलीयो ॥ और सुजाणीनें कह बालागी ॥
सुजाणीं तूं थारौ बीहात दिखाय ॥ जराँ सुजाणीं
रो हात देखनें, पंडितजी कही, थारेनें, इणारे पूर
बला भवरौ सनमंद छै ॥ इतनीं सुण साब लंगानि

सासौ न्हांखियो इतराक में तौ पंडितजी विदा
मांगी ॥ जराँ सुजाणराय, मोहोरांसूं थाल भरनें,
विदा देवा लागी ॥ तरे पंडितजी रौहजूरियो,
सुजाणनिं दोहौ कहै छै, ॥ हजूरिया बायक ॥
चंद्रायणाँ ॥ सुणौं सुजाणीं दासियाँ थारै नहीं अस-
रफ्याँ चाय ॥ भीखभवंता देखिया, इसड़ा पंडित-
नाँय ॥ इसड़ा पंडितनाँय, घरौ घर जाचसी ॥
पौथी पतड़ौ खौलक माडाँइँ वाचसी ॥ वेकुग
णाँकोइ और क झूटाँवैणका ॥ परिहाँ नहीं असर
क्याँ चाह, रसीलानैणका ॥ १८७ ॥ दोहा ॥
मोहोराँ मन मानै नहीं, करौ दान सनमाँन ॥
पंडित चाहै प्रेम रस, कछ भुजांगकौ दान ॥ १८८ ॥
वार्ता ॥ पंडितजी तौ काछ भुज और अंगकौ
दान मांग्यौ ॥ इतरी सुणताँ हीं सुजाणराय तौ
मुलकनै, पाछी फिरगई ॥ सब लंगानें सैन
सूं समझावै छै ॥ काँईक वड़का बौलनैँ डरावै

(७२) सुदबुद सब लंगाकीवारता ।

छै मनतौ भावै छै, नैं मूंड हलावै छै ॥ पंडितजी
और सावलंगा प्रेमरा पिया स्यौड़ा नैणें पड़दा
मैं सूँ प्यास बुझावैछै ॥ अवे सुजाणराय बोली
पंडितजी आज तौ आपपधारौ बड़ा भाभीजी
साहब पधारणरी बेलाँहौगई ॥ तरे पंडितजी मह
लाँसूं नीचा उतरिया सावलंगा सुजाणरायनें क-
यो सुजाण राय तूं पंडितजीरे साथ जायनें डेरौ
देख आव॥कठे उतरियाछै ॥ इणाँ कनेंसूं म्हारी
जनम पत्री करावसूं॥तरे सुजाणीं दौड़नें सत खंडे
महल जाय चढदेखे छै । पंडितजी तौ राज महलाँ
जाय दाखल हुषा ॥ दोहा ॥ दासी दौड़ी डागलां
जाय झरौखां दीठ ॥ राजमहलाँ पहुंचिया बड़ताँ
देखी पीठ ॥ १८९ ॥ बार्ता ॥ अवे सुजाणीं आय
नें अरज करी ॥ बाईजी साहवाँ डेरौ तौ हूं देख
आई हूं ॥ पिण काँईक छल बल हुवो दीषेछै ॥
तरे सब लंगा पूछियौ काँई खवर पड़ी जराँ कयो

राज महलँ दाखल हुवा सो सही तौ माहाराज
कँवरछै ॥ नैं साथै टहल वो छौ जिणरी सुरत जि
ण दिन आपरा नखलेवणनैं आयौ जिकण खवा-
सकी सीछे ॥ सावलंगा और सुजाण रायरैं आप
समें आलो चहोय रयो छे ॥

इति सुदबुद सवलंगाकी बार्ता कँवर सुदबुद
जोसी रूप सावलंगा मिल विछ डन वर्णन
सहा शिवकरण रामरतन दरक माहे
श्वरी मारवाड़ी मूंडवे वाले कृत
सप्तम प्रकाश ॥ ७ ॥

अथ सुदबुद सब लंगाकी वारता अष्टमप्रकाश प्रारम्भः ॥
वार्ता ॥ अठी माहाराज कँवार महलँ दाखल हु-
वा तरे महलँमें कँवराणी जी पूछना करी ॥ पृ
थ्वी नाथ आप मोड़ा किण कारण पधारिया और
आज तो आपरा दिल ऊपर खूबी और खुस्याली

(७४) सुदबुद सब लंगाकीवारता ।

जादा मालूम पडेछैं ॥ तरे कँवर बौल्या आजये
कनवी बात सुणीं ॥ जरे कँवराणीजी पूछियो काँ
ईसुणीं ॥ तरे कँवरजी सावलंगारी महमाँ घणीं
करी ॥ कही इसी अस्तरी आजतेई, नैतो हुईनें,
ओर कोई होसी ॥ दोहा ॥ नगर उजीणीं, म्हेव-
साँ.सहरनदीठो जोय ॥ पुंगल केसी पदमिणीं इस
डी हुईनहोय ॥ १९० ॥ नाँकोइ देवल पूतलीनाँ
कोइ रावल राज ॥ नाँकोइ देवा देवताँ देखीपद
मणआज ॥ १९१ ॥ कँवराणीं वायक ॥ चंद्रायणाँ
वाणचां केरी डीकरी छाछखी चँडो खाय दीसे
ऊंधा ओझरा किणरेआवे दाय किणरे आवे दाय
सहज चढऊंधसी ॥ हींग तेलरी वास कँवर काँई
सूँघसी ॥ १९२ ॥ कँवरजी वायक ॥ चंद्रायणाँ
सवलंग्या मृघ छाकियो लहर समंदा लेह ॥ उण
पगडाई आंगली थारी सगली देह ॥ थारी सगली
देह, उणाँपग अंगली ॥ हात घडी करतार छवीली

छंगली ॥ कंचन केसी ओप दमंके दामणी ॥ परि
 हौं देखी सुर्णानकौय अनौ खी कामणी ॥ १९३ ॥
 कँवराणी वायक ॥ चंद्रायणाँ ॥ विणजी करेज
 वाँणियाँ वैचै पलियाँ तेल ॥ थाँकै वाँकै आँतरौ
 आकाँनागर बेल ॥ आकाँ नागरबेला दोनाँके आँतरौ
 परनारचाँ संप्रीत तोवैस्या साँतरौ ॥ फूहड जात
 बकाल पलंगचढ ऊँघसी परिहाँ हींगतेलरी
 बास कँवरजीसूँघसी ॥ १९४ ॥ कँवरजी वायक ॥
 काया कंचन मन रतं न नेतरखडग खतंग ॥
 सावलंगा छा क्या मृघज्युँ ऊँभी मौडै अंगरकमर
 बल न्हाँखियाँ ॥ नाक सुवाकी चांच मृघसी आँ-
 खियाँ ॥ औढण पचरंग चीर कलंजा रूपरा ॥
 परिहा जाणक जडिया हीर हेसतन उपरा ॥
 ॥ १९५ ॥ वार्ता ॥ इसरी सुणताँ तौ कँवराणी
 जीनेँ रीसआई ॥ कह प्रथवी नाथ इसडीकाँई रूप
 वंतछै ॥ जिणरौ आपराजा वारौ कँवरबाखाण करौ

(७६) सुदबुद सब लंकाकीवारता ।

अलवत उण विनाँ अस्तरियाँ सुं देस भरियौछै॥
किस्यौ बीज बूडगयो ॥ आप बाणयाँरीछोकरी
की, इतरीकाँई बडाई करोछौ ॥ कँवरजी वायक
॥दोहा॥ छटादेखमन छाकियौ. जाणक चितरचो
मौर ॥ चीता लंकी चितचढी, दायन आवे और
॥१९६॥कँवराणी वायक ॥ काँइ आकासाँ उतरी
किसुं पतालासेस दायन आवे दूसरी काँइ उझड़
हौगयो देस ॥ १९७ ॥ कँवरजी वायक ॥ चंद्रा
यणाँ ॥ नाँह आकासाँ उतरी जनमीं नहिंपयाल
सूवौल्यायो चौंचमै, फूली चंपक डाल॥फूली चंप
क डालक कलियाँ कुंदरी॥हियौ हिलौला लेहक,
लहर समंदरी ॥ अजब जहूरा हूर कुरजाँ सौ रहै॥
परिहाँ, चंचल चतुर चिकौर कचितरचा मौरहै
॥ १९८ ॥ वार्ता ॥ इतरी सुणने कँवराणीं जीतो
अचंभे रया, और माहाराज कँवारसुं अरजकरी
प्रथ्वीनाथ इसड़ी छेतौ म्हे पिण देखस्याँ ॥ अठी

सावलंगानें, सेठजी चोखौ मोहोरत दिखायनै पढ
 णने बैठाणी और सुजाण रायदासी खवासीमें, थाल
 पूजाको लीयाँ हाजर खड़ी छै ॥ तरे गुराँकयौ
 गणेशजी, नै सारदारी पूजाकर, पाछै पाटै पढणनै
 बेठासू विद्यावेगी आवसी ॥ सबलंगा बायक ॥
 ॥ दोहा ॥ सरसत सारद सुमरिये गवरी पूत्रगणेश
 ॥ विदियादे परमेश्वरी, जौवन बालौ बेस ॥ १९९ ॥
 पाँच मोहोरछे ऊपरे, लियौ सिरी फल हात ॥
 बेटीपद माँसाहरी, सखी सुजाणी साथ ॥ २०० ॥
 सारद गणपत बीनवाँ, लुललुल लागौ पाय ॥
 विदिया गुरसुं बीनती, भूलाँ हरफ भताया २०१ ॥
 ॥ वार्ता ॥ सखीसुजाँण रायनै गुराँ साहबरी
 पौसाल पढेछै ॥ अबै येकदिनरा सभाँ जौगमें, कँवर
 सुदबुदनै, सावलंगा याद आई ॥ तरे आपराभरजी
 दान, चंनणियाँ खवासनै, फुर मायौके सब लंगा-
 कठे छै ॥ सूजायनै चौकस कर आव ॥ कँवरजी

(७८) सुदबुद सब लंगाकीवारता ।

वायक ॥ चंद्रायणाँ ॥ कर पदमण सूं बीनती,सन
मुख अरज सुणाय ॥ बेगौ आज्यै चनणियाँ, झट
पट जलदी जाय ॥ झटपट जलदी जाय, सँदेसौ
दीजिये परिहाँनैन सैन मिलजाय, इसी विधकी
जिये ॥ २०२ ॥ बार्ता ॥ इतरी बात कँवरजी
रीसुणनें खवास जाय खबर करीतौ, सब लंग्याने
सुजाण राय पठणनें पधारिया छै ॥ जरे चनणियें
भाल लगाई, डूढताँ २ आगे चौपड़का बजारमें,
चंद गुरूकी जायगांके झरौखाँ पढै छै ॥ साब
लंगापिण खवासनें देख कर औलखियौ ॥ खवास
वायक ॥ चंद्रायणाँ ॥ तुज कारण मुज मौकल्यौ,
लौभी लागौ लार ॥ अड़दा पड़दा खौलदे, देखणदे
दीदार देखणदेदीदार महौला लीजिये ॥ साब
लंगा श्रवजाँण कदरसणदीजिये ॥ भेज्यौ कँवर
अवारक थारै कारणें परिहाँ खासौ कँवर खवासक
ऊभौ वारणें ॥ २०३ ॥ मुजमुष तुजसौभासुणी,

लग्यौ कलेजै घाव ॥ अनसन लीन्हौं कँवरजी,
 तुज देखणरौ चाव ॥ तुज देखणरौ चाव, भणीं
 जण आवसी ॥ परिहाँ देख्यौई सुख होय पछे अन
 खावसी ॥ २०४ ॥ सावलंगा बायक ॥ काँइँ हट
 लागा कँवरजी, तूँ काँइँ पड़ियौलार अगल बग-
 ल कोइ सांभले, फैले बात अपार फैले बात अपार,
 कँवारी डावडी ॥ परिहाँ भाव जमौ सादेयक मारै
 भावडी ॥ २०५ ॥ खवास बायक ॥ जद तुज
 कर नख पर खिया कँवर अननहिं खाय ॥ किरपा
 कीज्यौ सुंदरी आयौ चित्त लगाय ॥ आयौ चित्त
 लगायक तेरे कारणै ॥ परिहाँ हाजर खडो खवा-
 सक डौडी वारणै ॥ २०६ ॥ साव लंगा बायक ॥
 अकन कँवारी छौकरीसमजूँ नहीं अजान ॥ हेबिधनाँ
 कैसेवणै बालक संग जवान ॥ बालक संगजवान कटुं
 बौला जसी ॥ परिहाँ भावज देसी बौल सिंघ्य ज्युंगा
 जसी ॥ २०७ ॥ खवास बायक ॥ तुजकारण तलफत फिरे

(८०) सुदबुद सब लंगाकीवारता ।

पिंजरव्यापी पीर ॥ चात्रगचंद चिकौरज्युं थूं मछली
विननीर ॥ थूं मछली विननीर सँदेसौ लीजिये ॥
परिहाँ टुकि येक नैन मिलाय इसारौ दीजिये ॥
२०८ ॥ सावलंगावायक ॥ विष घौलूं कूवैपडूँ
काँई करूं अप वात ॥ इणदुख किण विध ऊबरूं
साथणियाँ सुणवात ॥ साथणियाँ सुणवात चरौवर
भाँडसी ॥ परिहाँ बाप बीर लखजाय कमरणों मा
डसी ॥ २०९ ॥ वार्ता ॥ खवास खबर करनैपा
छौ जायकर कँवरजीनें हाजरी दीनीं ॥ खवास
वायक ॥ चंद्रायणाँ ॥ चंदगुरू चित्रसालमें अर
ज सुणों महाराज ॥ गई सुजाणीं साथले पदमण
पठ बाकाज ॥ पदमण पठवा काज गई म्हेसाँ भ
ली परिहाँ बैठीपडदामाय निजरसूनामिली ॥
२१० ॥ चौपडरा बाजारमें चंदगुरूकी पौल ॥
हाथी मंडिया वारणें करी ऊजली ठौल ॥ करी
ऊजली ठौलका पदमण कारणें ॥ पोहोरायत दो

यच्चार कऊभा वारणों ॥ डौडी पड़दा चिक क
 ना ताँवाँधियाँ ॥ परिहाँ तकै झरौखाँ माँह नैणस
 रसाँधियाँ ॥ २११ ॥ ज्याझ गुरूकी जायगाँ,
 साँम्हीं झिर भिटजाल ॥ बेटी पदमाँ साहरी, कँ-
 वर पढे चटसाल ॥ कँवर पढे चटसाल, रंगसूर
 गियाँ ॥ बेलण वेलीवाँह गुलाबी अँभियाँ ॥ नाँवा-
 ला पन जौर जवानी नाँझली, ॥ परिहाँ देख्याँ
 दरद अपार, विनाँ देख्याँई भली ॥ २१२ ॥
 ॥ वार्ता ॥ कँवरजी चंनणियाँरा समाचार सुणनें
 फुरमावैछै ॥ चंद्रायणाँ ॥ आपाँई पढवा चालस्याँ
 सुणज्ये बात खवास ॥ लेसाँ पाटी वरतणों, बैसाँपद
 मणपास ॥ बैसाँ पदमण पास, सबेरै चालस्याँ ॥
 कराँ नैन सुँसैन निजर भरन्हालस्याँ ॥ २१३ ॥
 ॥ वार्ता ॥ कँवरजीरौ हुकम हुवौ, आवैचंद विजै-
 जी ॥ जराँ येक दौड़ता दौय च्यार दौड़गया ॥
 जाय गुराँसावने कही, आपनें माहाराज कँवार

(८२) सुदबुद सब लंगाकीवारता ।

बुलवे छै, इतरी सुणतांहीं, गुरूजी तो हाक्या बा
क्या रहगया ॥ अंगवस्तर औंठे, जरांतो ओघौ
भूलजावे छै ॥ ओघौ उठावै जितरै अंगवस्तर भूल
जावेछै ॥ पाछौ ओघौ सम्हालै इतराक में छड़ी
भूल जावेछै ॥ इसीतरहसूं गुरांसाब तौ बडासा,
सराजाल में उलझ गया, रखेज कँवरजी पढावण
री नहीं कह देवै ॥ अठे तौ घरमें आगेही सौर
भरि थौछै ॥ अगनी रूपी कँवरजी कठै मावसी
॥ चंद्रायणाँ ॥ चालै डिगता डौलता, लिवी हात
में डाँग ॥ रुलती जाय पछे वड़ी, लफराँ लटकै
लाँग ॥ लफराँ लटकै लाँग, गुरूजी आइया ॥ बहुत
करी मनुहारक, पाट बिठा विया ॥ देख कँवर
को लौभहिया विचसा लियो, परिहाँ, आगे सौर
अपार पतंगौ चालियो ॥ २१४ ॥ बार्ता ॥ अवे
कँवरजी, दौय च्यार बात, आडी टेडी करनै,
कथौ माहाराज गुरूजी, म्हानै आप पढावौ

तरे गुरुजी बोल्या म्हेतौ बजरठौठछाँ ॥ येक
 आँक पठिया नहीं ॥ च्यार घर माहाज नाराछै
 जिणसुं गौचरी लपायनै ऊद्रपूरणा कराँछाँ ॥ और
 आपरी वस्तीमें बैठाछानै आपनै आसरी बाद
 देवाँछाँ ॥ पठिया होता तो आज निहाल होजाता ॥
 माहाराज कँवार पढ़णनै, आवता, नै गांवपटा
 बखसावता ॥ पिण विदिया परालबदरी आवैछै
 ॥ गुराँवायक ॥ चंद्रायणाँ ॥ बालपणै मायतम-
 रचा, अक्षर पढ़्यान येक ॥ भूख भवंता जगभ
 म्या, लियो बुठापै भेखरठौठम्है रहगया ॥ परिहाँ ॥
 देख्याराज कँवार विद्या विनगह गया ॥ २१५ ॥
 बालपणामै गुरमरचा, करचा रामजी खौट ॥ दादा
 गुरभणियाँ नहीं, जिणसुं रहगया ठौट ॥ जिणसुं
 रहगया ठौट, ककौभी नाँपठ्या परिहाँ, रम्याछौ
 कराँ माँहक, पाटीनाँ चैठ्या ॥ २१६ ॥ कँवरजी
 मायक ॥ चंद्रायणाँ ॥ ज्याज्ञ गुरुसुं बीनती, विदि

(८४) सुदबुद सब लंगाकीवारता ।

या सरस भणाय ॥ सुदबुद कँवर सुलच्छणाँ,
लुल लुल लगै पाय ॥ लुल लुल लगै पाय, बि
द्याके कारणै ॥ हाथीडा दोय च्यारबँधाऊंवारणै
॥ हाथ्याई सुखपाल झरौखा छाज सौ ॥ परिहाँ
लगै छत्रपति पाय राजगुरुवाजसौ ॥ २१७ ॥
गुराँ बायक ॥ सुण सुदबुद गुरजी कहे म्हारैभण
न मतिआव ॥ गज घौडा रथ पालखी म्हारै नहीं
खटाव ॥ म्हारै नहीं खटाव गरीबी चालछै ॥ इण
गामें दस बसि बडी पौसालछै ॥ आगेही इण साल
पढ्या नाहिं राजवी ॥ परिहाँ नवौ रकीणों नेग ल
गै बिनबाजवी ॥ २१८ ॥ चनणियाँ बायक ॥
दोहा ॥ बडी फजर दिन उगताँ पुख पांचम रवि
वार॥कह चनएयौं गुराँ आवसी पढवा राज कँवार
॥ २१९ ॥ गुराँबायक ॥ चंद्रायणाँ ॥ सुण सुद
गुरजी कहै साची दाखूं तौय ॥ अण भणियाँ उट
जाव सौ राजाडंड सी मौय ॥ राजाडंडसी मौय

विद्याकै कारणों ॥ विद्यानहीं भरपूर गुराँकै बार-
 गों ॥ येल मविन उठजायकधोखौ ल्यावसाँ परिहाँ
 तूराजाकौँ कँवरऔलभौ खावसाँ २२० कँवरवायक
 डंडे ज्यांनें म्हेडँडाँ थानें डंडे न कौथ ॥ हाकम
 बखसी पेसवा पायपडेला तौय ॥ पाव पड़ेला तौ
 य गरजाँ चालसी ॥ खूनी देसी छौड हुकम न-
 हिं टालसी ॥ सरणाँरी पौसालक डंकौ वाजसी ॥
 परिहाँ घडियावल वनघौर नौपतां गाजसी ॥
 २२१ ॥ गुराँ वायक ॥ राज कँवर बावे नहीं था
 छोटी पौसाल ॥ अठै भणीजै वाणियाँ थेसौटा
 भौपाल २पठौ चटसालियाँ ॥ राज गुराँरै महल झ-
 रौखा जालियाँ ॥ सहज पलंग पर जंकुडठै सब
 त्यारछैं ॥ परिहाँ राज गुरू पौसाल अठै दोय
 च्यारछै ॥ २२२ ॥ कँवरवायक ॥ चोझडिया ॥
 राज गुराँकी पौल पढण नहिं जावसाँ थाँकौ मान
 बढाय अठै नित आवसाँ ॥ थे साराँ सिरताज रा-

(८६) सुदबुद सब लंगाकीवारता ।

ज गुरु बाजसौ ॥ परिहाँ जतीन कोई जौड सिंघ्व
ज्युँ गाजसौ ॥२२३॥ दोहा ॥ म्हारै तौ गुर आपहौ
भावै पठन पठ ॥ करकौतल सिंण गारिया हात्याँ
जावौ चढ ॥ २२४ ॥ वार्ता ॥ गुरूजीतौ नेकारौ
करताहीजरया झटदेसी, गुरानें सिरौपाव दुसाला,
खीनखांप औठायनै, हातियारै हलकै चँवरारै फट
कारेधणाँ गाजाबाजासूं पौसाल पुगाया ॥ दूसरेदिन
दिन ऊगेही माहाराज कँवार बडाहगाँमसूंसौनारा
नारेलाँ पढवा पधारिया, ॥ आगै गुराँसा आयनै
चठसालरी तयारी करी ॥ गाडापचासेक तौ क
जोडोनै गाडापांच सात फाटा पुराणाँ चीथरा ब
खेरदीनाँ और मण दोय च्यार गौबरनै गुलरो भेलो
चकौकराय नै छँटायदीन्हौ ॥ जिणसुंमाखियारौभर
णाट और कुत्तारौ कूकार नैकागलारौ कुरलाट
और गढसूराँ राठाट ॥ इणतरह गुराँ चठसालरी
तयारी करनै पौलरौ दर बाजौ ढकायनै माथा ऊ

पर पलौ घाल कर बैठगया ॥ अठी महाराज कँवार
 की असवारी वाजाराँ घूमती आवेछै ॥ केई
 साहू कारांरी पौलाँ तौरणनेँ कलसवधावेछै ॥
 बाजार झाड बुहारनेँ औछाडीजि यौछै ॥ चनणियाँ
 वायक ॥ चंद्रायणाँ ॥ बडी फजर दिन उगता,
 पुख पांच मरविवारा ॥ सिद्धजौगधेँ चालिया, पढवा
 राज कँवार, पढवा राज कँवार सिरीफल हातहै ॥
 परिहाँ पूजारौ सामाँन लियो सब साथ है ॥ २२५ ॥
 दोहा ॥ कँवर भणीं जण चालिया, गुराँ तणीं पौसाल
 ॥ घरघर रलीवधावणाँ, बागासौ वन थाल ॥ २२६ ॥
 चंद्रायणाँ ॥ कर कंचन, नारेलले भरमोतियन
 कौथाल ॥ कँवर भणीं जण हालिया गुराँ तणीं पौसाल
 गुराँ तणीं पौसालक चाल्या चूँपसूँ ॥ परिहाँ,
 नहिंभण वाकी चाहकरी इयारूपसूँ ॥ २२७ ॥ करै
 गुराँसूँ बीनती, लुललुल लागै पाय ॥ सुदबुद कँ
 वर सुलक्षणाँ, पढिया ज्युँही पढाया पढिय ज्युँही

(८८) सुदबुद सब लंगाकीवारता ।

पढ़ाय, आया इण कारणै ॥ परिहाँ, सुदबुद राज
कँवारक ऊभावारणै ॥ २२८ गुरां वायक ॥ सुण
सूधा गुरजी कहै, अठेभणन मतिआव ॥ गज घोडा
रथ पालखी म्हारै नहीं खटाव म्हारै नहीं षटाव
हिया विच सालियौ ॥ परिहाँ आगै सौरअपा
रपतंगौ चालियौ ॥ २२९ ॥ चनणियाँ वायक ॥
अंवाड़ी सूं उतर कर पड़ै गुरांके पाय ॥ निजर
रकीणों रीत सूं हाजरकीनौं ल्याय ॥ हाजरकी नौं
ल्याय ॥ सालमै पेठिया परिहाँमाडाँइगणपण पूज
अणीं जण बैठिया ॥ २३० ॥ वार्ता ॥ कँवरजी
भणवानै बैठा परंतू गुरां साहबरे मनमें बडो
आलौच होरयो छै ॥ रखेज साव लंगानै नहीं
देख लेवै ॥ चंद्रायणाँ ॥ भणवा बैठा कँवरजी,
गुरां करै आलौच ॥ सब लंगानै देखसीं ॥
मनाँज मोटौ सौच ॥ मनाज मोटौ सौच गुपहीं
राखणीं ॥ परिहाँ इण पड़दरै माँहक बैठै डाकणीं

॥ २३१ ॥ वार्ता ॥ इण तरह कँवरनेँ कहकर गुराँ
 भणावणौ सखकीयौ सू भणतानैँ कितराक
 दिन बीता, परंतू, साव लंगासूं नैन मिलाप भी
 हुवौ नहीं ॥ येक दिनरा समाजौगमें गुरुजी तौ
 वडे मंदर पूजा करणनैँ गयाछै और सावलंगारी
 दासी सुजाण राय गौ खड़ा सू नीची गणपतीरी
 पूजा करणनैँ आई ॥ तरै कँवर सुजाण रायनैँ कहै
 छै ॥ म्हाँकी तरफरी पूजापिण थैई करी ज्यौ
 इतरे खवासचनणियों सुजाण रायनैँ कहै छै ॥ खवा
 सवायक ॥ चंद्रायणँ ॥ सखी सुजाणीं सांभलौ
 कहै चनणियों बात ॥ थारी वाई कारणैँ कँवर-
 चित्त अकुलात ॥ कँवरचित्त अकुलातक देखण
 चाव है ॥ देख्याहीं सुख होय मनाँ इमभाव है ॥
 कराँ आपसुं गरजअरज सुंग लिजिये ॥ परिहाँ
 टुकिये कदरस दिखाय क्रपा अस किजिये ॥ २३२ ॥
 सुजाण राय वायक ॥ सज्जन सेरी साँकड़ी परब

(९०) सुदबुद सब लंगाकीवारता ।

सजेम वसंत ॥ पाणीं उतर जायलौ गलिया
राँज्युं हंस ॥ गलिया राँज्युं हंस पछै पिस तावसौ ॥
लखै गुरूजी बात, औलभौ खावसौ थेमौटाभौ
पाल विचारौ चीतमें ॥ परिहाँ, हौत प्राँणकी घात
यशई प्रीतमें ॥ २३३ ॥ कँवर बायक ॥ कस
कत है निक सत नहीं, इन नैननकी
फास ॥ करक कलेजै कस रही, गलगल
गलगयो माँस ॥ गलगल गलगयो माँस फाँस
नाहिं नीसरे ॥ जिणै खिलाया नाग, विछूसूं नाँडरे
वाही विखरी बेल, धतूरै नाँमरे ॥ परिहाँ, लग्या
ब्रहैका बाण मरणसूं क्युँडरे ॥ २३४ ॥ दासीसु-
जाण रायबायक ॥ अरज करौ यह कँवरजी, सुणौं
बात नरराय ॥ लखपत म्हाँरी जातहै, अदपतही
रहजाय ॥ अदपतही रहजाय, नीर ढल जात है ॥
परिहाँ, पलक येकसुख पाय, पछै पिस तात है
॥ २३५ ॥ कँवर आपचर काधणीं, रूपरंग सुभ

वेस ॥ अकल सिरौमण गजगमण, परण्याँ पुंगल
 देस ॥ परण्याँ पुंगल देसक चंगी गौरियाँ ॥ दासी
 की परदासि जिसी यह छौरियाँ ॥ थेछौ राजकँवार
 जगतरा ईसहै ॥ परिहाँ, इणाँसरीसी नार, तुभारे
 बीसहै ॥ २३६ ॥ वार्ता ॥ इतनीं कहनें सुजाण-
 राय, सावलंगा कनें गई ॥ तरे सब लंगा पूछियो
 पूजाकर आई ॥ जब सुजाण राय बोली, हाँवाई
 साव, पूजा तौकर आई ॥ पणवाईजी साव, घुँडी
 खौली, जराँ सावलं गासिर धूँणनें चुटकी बजाई ॥
 तरेसुजाँण राय बोली, माहाराज कँवार भणै;
 जिण गौखड़ा आगे वादीगर, सरप और नौलकी
 लडाई रौ तमासौ कररयोछै ॥ सूदेखवा लायक
 छै ॥ जब सावलंगा, झरौखे आई ॥ तरे खवास्त
 चानणियोँ, कँवरनें कहैछै के माहाराज कँवार,
 ऊपराने देखीजै ॥ जद कँवरजी ऊपर देखियो,
 आगे सावलंगा, झरौखे ऊभीछै ॥ कँवरजीसुं चौ

(९२) सुदबुद सब लंगाकीबारता ।

निजरचाँ हुई ॥ खवास वायक ॥ दोहा ॥ सुजा-
णीं सुणदासियाँ, ये मन रंजन गंज ॥ आज कठा-
सूं देखियो, मनकौ माँडण कंज, ॥ २३७ ॥ बाद-
ल भलकी बीजली, काजल रलकी रेख ॥ गौरी
मुलकी गौखड़े दाँताँ चमकी मेख ॥ २३८ ॥ चौ-
झड्या ॥ ऊंचा महल अवास झरौखा जा-
लियाँ ॥ पढता राजकँवारक पड़दा ताँणि-
याँ ॥ गलधोतियनकी माल सुगंधी बाडियाँ
परिहाँ करै सुजाणीं बातकदे देतालियाँ ॥ २३९
॥ वार्ता ॥ इतराकरा समाँ जौगमैं गुरूजी मौटा
मंदरमूं पाछाआया नैहाजरी लेवा लाग़ा जठै कँ-
वरजीरी पाटी वाचनें मौटा आखरौरी तुरत नवी
माँडी देखनें परी पटकी ॥ और सावलंगा कनें
जायनें हाजरी लेवालागा तरै सावलंगा कहैछै ॥
सावलंगावायक ॥ चंद्रायणाँ ॥ बालूं जालूं पढणों
हीयामैंन सम्हाय ॥ कौंचौघूं इणबातके लाज मरे

मरजाय ॥ लाज मरे मरजाय क ताला जरगया ॥
 पग थ्यां ऊपर चून आप पिण धरगया पगमंड
 वारै काजक चौकस कर गया ॥ परिहाँ ज्यां
 नैं सात सिलॉम महलमैं फिर गया ॥ २४० ॥
 वार्ता ॥ इतरी बात सब लंगारी सुणनैं गुरूजी
 पाछा कँवर कनें आयनै कांई कहैछै केहे कँवर
 तूं कदेई झरौखा काँनीं जाज्यै मती ॥ आज पछे
 कदेई उठीनैं पगही धर बाकी मनमैं ल्याजै मती
 इण झरौखारेमाँहैं येक जिंदरहैछै ॥ आप पधारौ
 लातौ डरसूं ताप चढ जावैलौ ॥ तरे कँवर पूछि-
 यौ ॥ इण झरौखामै कुंण पढैछै ॥ जराँ गुरूजीक
 हैछै ॥ दोहा ॥ आंधी वहरी कौढणीं, अवगुण
 भरचा अनेक ॥ थे राजारा डीकरा, साँम्हीं निज
 रन देख ॥ २४१ ॥ देख्यांसूं गटकौ करै ॥ डाक
 ण बुरी बलाय ॥ कह गुरजी सुदबुद सुणौं मह-
 लाँ दिस मतजाय ॥ २४२ ॥ कँवरवायक ॥ चं-

(९४) सुदबुद सब लंगाकीवारता ।

द्रायणाँ ॥ जे रूपालौ आदमी गुण बिनकामन
कौय ॥ मुख मलके राम्यानमै काची करदन हो
य ॥ काची करदन होय क पडदा ताणियाँ ॥ परि
हाँ, साचकहौ गुरु कुणहै चतुर सुजाणियाँ २४३
सुणगुरजी सुदबुद कहै है भणवारी चाय ॥ सौपा
टी मदमणभणै उसडी मौय भणाय ॥ उसडीमौ
यभणाय कृपा अब कीजिये ॥ परिहाँ येक जुवाँ
मिलजाय इसी लिख दीजिये ॥ २४४ ॥ गुराँवाय
क ॥ सुणसूदा गुरजी कहै इणसाँम्हों मतिजौय ॥
काणीं खौडी कौठणीं डाकण बैठी दौय ॥ डाक-
णवैठी दौय बुरासाघाटकी ॥ परिहाँ लंबा लंबा
दांतक गंजी टाटकी ॥ २४५ ॥ पिग पंगूलूल्ही
कराँ ॥ बहरी बुरी बलाय ॥ नैन झरै लालाँ पडै
किणरै आवै दाय ॥ किणरै आवै दायक बैठना
करी परिहाँ कूबी कुलछ कुरूपकफाटा बाकरी ॥
२४६ ॥ कँवर वायक ॥ छटादेख मन छाकियौ

रेसमजिसी उमीर ॥ चीतालंकी चित चढी सिरचि
 त रंगौचीर सिरचितरंगो चीर कसूं मल औठणीं
 परिहाँ सबज कनातां सांह किसीविध कौठणीं ॥
 २४७ ॥ गुरां बायक ॥ काणीं खौडी कौठणीं का
 ली जिसडीकाग ॥ चख चूंदी बौली श्रवण नकसे डौ
 मुखझाग नकसेडौ मुखझाग कपड दौयूं करां ॥
 परिहां सग पण करै न कौय डरां लाजां मरां ॥
 २४८ ॥ कँवर बायक ॥ जेनररी इयालौयणां बातांरी
 झन कौय ॥ मुख मलकेशस्थानमें काची करदन
 होय काचीकरदनहोय नरदहै सारकी ॥ परिहाँ ब्यू
 करदेवौ भताय वस्तहै पारकी ॥ २४९ ॥ गुरां बा
 यक ॥ अण दीठी ही ठीकहै दीठांसूं भ्रमजाय ॥
 जैसें लडू बूरके खासत खापिसताय ॥ खासतखा
 पिसताय स्वाद नहिं आवसी ॥ परिहाँ दीठां आसी
 सुगपछै पिस्तावसी ॥ २५० ॥ करै विणजणीं बा
 णियां पलियांवे चैतेल ॥ थांकांवांके आंतरौ आकां

(९६) सुदबुद सब लंगाकीवारता ।

नागरबेल ॥ आकाँ नागर बेल क मोटौ आँतरौ ॥
परिहाँ हंस करै किणवायक कागाँनातरौ ॥ २५१
॥ कँवरवायक ॥ कह सुदबुद गुरजी सुणौ अरथ
भतावो झौथ ॥ कंचन केरे पींजरै काग किसी
विध होय ॥ कागकिसी विध होय कबोलै कौय
ली ॥ परिहाँ ऊँची किवी कनात निजरभर जौय
ली ॥ २५२ ॥ वार्ता ॥ इणतरह कँवर सुदबुदरेऔर
गुराँसाहरे आपसमें बात बतलावण हुई फेरकित
राकदिन पछै येक दिन कँवरजी वौल्या, के आ
ज काल गरमीरा दिन छै ॥ नें दुपेरका तावडौ
घणौ तपेछै सूसाबलंगानें नीचेका डहलान में पठ
णनैं बैठाण देवौ तरे गुरुजी, साबलंगाने येक नीचे
काड हलान मै, और बी सहूकाराँकी छौकरियाँ
पढतीछी, जठै पड़दा कनात खिचायनें, साबलं-
गानें पिण पढणनैं, विठाणदी, और उणही डहला
नमें, येक तरफ कँवरजी पढैछै ॥ पिण आडापड़

दांसू निजरांमे लौवी हौणो बंद हौ गयो, तरे सुद
 बुद आपरासजीदान चानणियां खवासनें कहे छै
 ॥ कँवर वायक ॥ दोहा ॥ नीचील्याया देखवा
 निजरचां मेलौनाँय ॥ चानणियां सुदबुद कहे
 नैणां देह मिलाय ॥ २५३ ॥ वार्ता ॥ तरे
 चनणिये खवास, रछौडी माँथसूँ कतरणीं काढनें,
 कनात में चलाई, सूवारी करदीनीं ॥ अवै वारी
 माँहसूँ, चसमवाजी हौवा लागी ॥ तरे सबलंगा
 पाटा ऊपर दोहौ मांडनें सुजाण शयरे हात, पाटी
 कँवरनें वचावणनें भेजी, ॥ दोहा ॥ हरी जम्हेरी
 रसभरी, भेजूं किणरे हात ॥ नदी विछौवा पड़र-
 या जीव तुमारे साथ ॥ २५४ ॥ वार्ता ॥ तरे
 कँवरजी पाछौ दोहो लिखनें भेज्यौ ॥ कँवर वाय-
 क ॥ दोहा ॥ सनतौ जाणै उडमिलूँ, परविन
 उड़चौन जाय ॥ कहाकहूँ करतारनें, परनहिं दई
 लगाय ॥ २५५ ॥ परें विधातानां दई, करदीनें

(९८) सुदबुद सब लंगाकीवारता ।

किंण काज ॥ ये दोय और लगावतो झपटक
पोती वाज ॥ २५६ ॥ वार्ता ॥ तरे साव लंगा
कँवरको दोहो वाचने, पाछौ दोहौ लिखियौ ॥
साव लंगा बायक ॥ साझन चतुर सुजाण हौ,
गुणवंता गंभीर ॥ इसड़ा कायर किम हुवा, तन
कज धारौ धीर ॥ २५७ ॥ वार्ता ॥ तरे कँवर
दोहौ वाचने पाछौ उणही पाटी ऊपर लिखने
सुजाण रायरे हात पाछौ उत्तर लिखियौ ॥ कँवर
बायक ॥ दोहा ॥ पान खात सुसकात है बौली
अमृत बैण ॥ सुपनां में दुख देत है, सुंदर तेरे
नैण ॥ २५८ ॥ वार्ता ॥ तरे सब लंगा पाछौ
दोहौ लिखियौ ॥ सब लंगा बायक ॥ दोहा ॥
॥ जलमें बसे कमौदनीं, चंद्रबसे आकास ॥ जौजा
हूके मन बसे, सौ बाहूके पास ॥ २५९ ॥ वार्ता ॥
यौ दोहो लिखनें सब लंगा कँवरकनें पाटी बचा
वानें भेजी, सू कँवर, पाटी वाचनें उभारया, इत-

राकरा समँजौ गमै गुराणी ऊपरकी वारीमें लू
 झाँकी ॥ तो दोहो लिख्यो देखनै वाचलीनों, और
 गुरुजी सूँ हात जौड़ अरज गुदराई ॥ माहाराज,
 कँवारके और इण साव लंगके तौ आपसमें
 मोहोवत, और चसम बाजी छै ॥ इसी नहीं हुवेके,
 नगर सेठ आपाने औलभौ देवे, या बात सुणताँहीं
 गुराँ साहवतौ सौचका समूद्रमें डूबगया, और मन
 रूपी, पवन सँ विचार रूपी लहरां प्रबल हौ
 बालागी ॥ इण तरह गुराँ साहव विचार करकेसुद
 बुदनें कहे छै ॥ गुराँवायक चंद्रायणाँ सुण सूदा गुर
 जीकहै, इधर उधर मत झाक म्हे बरजाँ जानै नहीं
 जराकसंकौ राख ॥ जराक संकौ राख सरसकी बात
 है ॥ परिहाँतू राजाको पूत थे बणियाँ जात है,
 ॥ २६० ॥ सुदबुद वायक ॥ सुण गुरजी सुदबुद
 कहै, नहि साराकी बात पापीनेण पिटौकड़ा झाँक
 यार दिन रातरक राख्यानाँ रहै ॥ परिहाँ, टुकिये

(१००) सुदबुद सब लंगाकीवारता ।

कदरस दिखाय कँवरजी यूँक है, ॥ २६१ ॥ गुराँ
बायक ॥ सुण सूदा गुरजी कहे ॥ साची दाखूं
तौय ॥ औरांके येक कामड़ी थारै माहूं दौय ॥
थारै माहूं दौय, पछे पिसतावसी ॥ परिहाँ, तूं
चावे सौ चीज हात नहि आवसी ॥ २६२ ॥ कँवर
बायक ॥ गुरजी बावै कामड़ी, करकर मन मैरीस ॥
चेलौ इसड़ी बावसी, घड़ सूं न्यारौ सीस ॥ धड़
सूंन्यारौ सीस, गुरांकौ रालदूं ॥ परिहाँ, आला
काँटाँ मांह गुरांथानेजा लदूं ॥ २६३ ॥ गुरां बायक
॥ नाँव लियौ तरवारकौ, उठी बदन में लाय ॥
म्हारै नहीं भणावणें, अण भणियोँ उठ जाय ॥ अण
भणियोँ उठजाय, क धोखौल्यावसाँ ॥ परिहाँ तूं
राजाकोपूत औलभाँ खावसाँ ॥ २६४ ॥ कँवर बाय
क ॥ क्यूं खावौछौ औलभा, कुण मारैछै तौय ॥ सब
लंगारा हातरी, पाटी लिख दो मौय ॥ पाटी लिख
दो मोय कझीणाँ आखराँ परिहाँ बैठा माँणौमौज

पटादूँ लाखरा ॥ २६५ ॥ वार्ता ॥ तरे गुराँ मन
में विचार कियोके अबकाई उपाव करणों चहीजै
कँवरजीतौ हट पकड लीयो सूअवै आपानें तौऔ
लभौनहीं आवै और इणाँरो कारज हुयजावै ॥इण
तरह विचारकीनों के बागाँकी रखवालीकेमिसइण
नें अठासूं भेजदेवणाँ चहीजै ॥ इसी विचारकर गु-
राँ कँवरनें कहैछै ॥ चंद्रायणाँ ॥ बागाँ वारी आप
री सालरूखा लन जाय ॥ लूँवा पाकी दाखकी
बागलचुण चुण खाय ॥ बागल चुण चुण खाय
दिवसहै सातरी ॥ परिहाँ करणी कँवर सुजाण रू
खाली रातरी ॥ २६६ ॥ कँवर वायक ॥ बागाँ
साल रूखालसाँ करदाहूँ मत वार ॥ साथ सुजाणी
आवसीसवलंगा भतवार ॥ सवलंगा भतवारभातले
आवसी ॥ परिहाँदिलकी दौसत जायनरि भरल्यवसी
॥ २६७ ॥ वार्ता ॥ गुराँ विचारकर कँवरजीनें
कहेछै के अब आजसूंहीं आपरी वारीछै ॥सौदिन

(१०२) सुदबुद सब लंगाकीवारता ।

सात रात दिन उठेहीरही ज्यौ ॥ गुराँ वायक ॥
चंद्रायणाँ ॥ दिहाँरुखाले छौकरचाँ कँवर रुखा
लौ रात॥वही बाग वह बावडचाँ वह आँवा दिन
सात ॥ वह आँवा दिन सात खिरै तो चाखज्यौ ॥
परिहाँ काची केरीहौय दिवस दसराख ज्यौ ॥
२६८ ॥ वार्ता ॥ गुराँकँवरजी नैसीख दीनी बाग
मेलिया अंठी सावलंगानेँ भात लेय तयार करेछै
॥ गुराँवायक ॥ दोहा ॥ बाग नवलखौ बणरयौ पा-
की सकल इसाल ॥ तुरत पधारौ पदमणीं लेकंच-
नकौ थाल ॥२६९ ॥ चंद्रायणाँ ॥ दिनकी बारी
थाँहरी कँवररुखा लैरात॥नीर सुजाणीं ल्यावसीथे
लेजावौ भात ॥ थेलेजावौ भात रात दिन जावणौं॥
परिहाँ झटपट जायजिमायसबेलाआँवणौं॥२७०॥
॥ वार्ता ॥ दिनाँ दिनाँ तोथे रुखाल ज्यौ, नैरात
का कँवरजी रहसी, थेतौ भातजिमातीथकी झट-
पट बेगीही आव ज्यौ ॥ चंपे जायनेँ, वेठ ज्यौ,

सूउठे कँवरजी पिण आयनें भात जीमजावसी
 जरां सावलंगा रीस खायनें गुरांनें काँई कहै छै ॥
 ॥ सावलंगा वायक ॥ चौ झड़िया छंद ॥ बल
 जावौ यह बाग बलौ सब वाड़ियाँ, फिरौ हिरण
 अरु रौझ चरौ सब छालियाँ ॥ झिर भिर वरसैमे
 ह बजै नहिं तालियाँ ॥ परिहाँ, नहिं जाऊं गुराँ
 आज बाग रखवा लियाँ ॥ २७१ ॥ गुराँवायक ॥
 वारी थारी आज और कुण जावसी ॥ जलकी
 झारीजाय सुजाणी ल्यावसी, ॥ छीलर नदी-
 निवाँण नरि नहिं पूर है ॥ परिहाँ नेड़ी ठौड़न
 जीक, किती येक दूर है ॥ २७२ ॥ सवलंगा वा-
 यक ॥ चंद्रायणाँ ॥ उठे न काँई मानवी, बौ
 जंगल बेवान ॥ कँवरपचीसा झिल रयौ, हूं बालक
 नादाँन ॥ हूं बालक नादाँन, अकेली म्हेंडह ॥
 परिहाँ क्युं कर पुरसूं भात गुराँ लाजाँ मरूं
 ॥ २७३ ॥ गुराँवायक ॥ आगेवो छै, येकलौ,

(१०४) सुदबुद सब लंगाकीवारता ।

थेछोजणियाँ दौय ॥ चंपैजायर बैठज्यौ, बौलन
सकैकौय ॥ बौलन सकै कौय, भात जीमावताँ,
परिहाँ: लागै कितीक वारक पाछी आवताँ ॥

॥ २७४ ॥ सावलंगा वायक ॥ गुरां न जाऊं ॥
बाग मै, परतनदेसूं पाँव ॥ जौथे मौनें मौकलौ.
हुसी बुलकमें नांव ॥ हुसी मुलक में नांव, औ
लभौ खावसौ ॥ परिहाँ, सुणसी सारौ देस पछे
पिसतावसौ ॥ २७५ ॥ गुराँ वायक ॥ चेलीजावौ,

बागमें हुकम हमारौ माँन ॥ साथ सुजाणीं चालसी
आगे कँवर सुजाँण ॥ आगे कँवर सुजाण, हात
नहिं चालसी ॥ परिहाँ राजरीत मरजाद धरमपर

चालसी ॥ २७६ ॥ सावलंगा वायक ॥ आपहु-
कम म्हाँपर कियौ, जावाँ वागके माँय ॥ मायवाप
भाई सुणें, देवे औलभौ आय ॥ देवे औलभौ आय,
गुराँजी आपनें ॥ परिहाँ. मतभेजौ महाराज, पडौ क्यूँ
पापमें ॥ २७७ ॥ गुराँ वायक ॥ सुदबुद कँवर सुलक्षणौ,

कदेन लेसी नाँव ॥ माली सींचै बावड़ी नीरभरे सब
 गाँव, नीर भरे सब गाम क चंपेवेठ ज्यौ, परिहाँ,
 झाड़ाँ रौउल झाड़ उठे मत पेठज्यौ ॥ २७८ ॥
 ॥ सब लंगावा ॥ आप कहो तौ गुरूजी, ल्युँ सारौ
 सामान ॥ कहूँ रसौई बागमैं, जीमैं कँवर सुजाण ॥
 जमिं कँवर सुजाण, तयारी म्हे कहुँ ॥ परिहाँ
 सखरौ थाल सँजौ यक प्याला हूँ भहुँ ॥ २७९ ॥
 गुरांवायक ॥ चौझडिया ॥ लेसगलौ सामान तुर
 तथे जावज्यौ, करोर सोई त्यार जुगत जीमावज्यौ ॥
 वो छे कँवर सुजाण सौचमति ल्यावज्यौ ॥ परिहाँ
 रहज्यौ जतमत माँहक बेगी आवज्यौ ॥ २८० ॥
 सावलंगा वायक ॥ चंद्रायणाँ ॥ जतमत राखै रामजी,
 परभूरखै लाज ॥ थाँरापुन्य प्रतापसुँ, इज्जत उवरे
 आज, इज्जत उवरे आज कँवर मुखनूर है ॥ परिहाँ, मगर
 पची साँमाँहक जौवन पूर है ॥ २८१ ॥ गुराँ वायक ॥
 नूरपूर है कँवरजी, थे पिण रंभा रूप ॥ याँसुँ

(१०६) सुदबुद सब लंगाकीवारता ।

मिलणों कठिण हैं, कहाँ माहाजन कहाँ भूप॥ कहाँ
माहाजन कहाँ भूप, क औ लख कामरी, परिहां,
मोहोवत मन मिलजाय सहज बिन दामरी ॥२८२॥

साब लंगा वायक ॥ हुकम आपरौ सिर धरूँ, कँवर
करूँ खुसियाल ॥ विध विधरा भोजन बणें, प्याला
पूरूँ थाल॥प्याला पूरूँ थालक, पंखौ ढौल सूं प-
रिहां करै सुजाणी बात बडीसी छौल सूं ॥ २८३

गुरां वायक॥राज कँवरराजी रहै, सब लंगा श्रवजा-
ण ॥ आप अकल रो पौरसौ, घणों गुणोंरी खान॥
घणों गुणोंरी खान, बुद्ध फैलावज्यौ ॥ परिहां करौ
जुगत सूँ बात, कसूँवौ पावज्यौ ॥२८४॥ साब लंगा
वायक॥कराँ तयारी थालरी, कँवर विराजै आय॥
कंचनकीझारीधराँ चौकीपर पधराय ॥ चौकी परप-
ध राय क माजम ल्यावसाँ, परिहां काठ कसूँवौ
भाँग कँवरनै पावसाँ ॥ २८५ ॥ गुरां वायक ॥ न
सौ कराज्यौ कँवरने, थेरहज्यौ हुँसियार तोडौ

चँपौ मौगरौ, हिल मिल गूथौहार हिल मिल
 गूथौहार ककलियां तोड़ ज्यौ परिहाँ, राजी
 रहै नरेस नेहमत मोडज्यौ ॥ ॥ २८६ ॥
 सबलंगा वायक, दासी सुजाणरायने कहैछै ॥
 दासी झटपट चालज्यै, करौ कँवर सूसेंद ॥
 तौडा कलियां कुंदरी, गुंथां गजरागेंद ॥ गुंथां गज
 रा गेंदक वागां जावसां ॥ परिहाँ, करल्यो सुंदरस
 हल कालह मरजावसां ॥ २८७ ॥ रिमझिम बाजै
 गूधरा, सूँधे भी नों गात ॥ मृघनैणीं सिर लेचली
 कँवर जिमावणभात ॥ कँवर जिमावणभात, घरा
 सूनीसरी ॥ परिहाँ गुरजी दीन्ही सीख उठासुँईवी
 सरी ॥ २८८ ॥ वार्ता ॥ सावलंगा सारी तयारी
 लेयकर, बागमें गई, तो आगे कँवरनिजर आया
 नहीं, तरे मालीका बेटाने काँई कहैछै ॥ चद्रायणा
 मालीकेरा डीकरा सींचतहै वणराय ॥ इण वागां
 में मानवीतैदीठा हकनाय ॥ तै दीठाहक नाँयक

(१०८) सुदबुद सब लंगाकीवारता ।

छिणगा रालता पीरहाँ पागलपेटे पेच साल रख
वालता ॥ २८९ ॥ बनमाली वायक ॥ इण
दिसवाटां जावतो पलपल पंथ निहार ॥ म्हेंदी
ठौयेक राजवी, पातलियो सिरदार पातलियो सिर
दारकळ भौवागमें ॥ परिहाँ, तडतड तौड़े फूलकटां
के पागमें ॥ २९० ॥ सावलंगा वायक ॥ किणदि
स वागरुखालता, माली मनें भताय ॥ भातलियाँ
भारचाँ मरुं, खवर करीज्यै जाय ॥ खवर करी
ज्यै जाय सीसपर भारहै ॥ परिहाँ कठेबिलुंधाजाय
बडा सिरदारहै ॥ २९१ ॥ बनमाली वायक ॥
कडचाँ कटारौ बाँकडौ सूवटडी तरवार
षांचूँ ससतर षांधिया दीखे राजकँवार ॥ दीखे
राजकँवार कगौसालालहै ॥ परिहाँ, कमरबँधी
मजबूत कलाल रुमालहै ॥ २९२ ॥ सावलंगा वा
यक ॥ ॥ हे लाभारुं कँवरजी किण दिस ऊभा जा
य ॥ भात लियां हाजर खड़ी बौझ उतारौ आय

बौद्ध उतारौ आय ॥ सीस पर भारहै ॥ परिहाँजी
 मौगरमाँ गरम रसौई त्यारहै ॥ २९३ ॥ हेलौ सु
 ण कर दौड़िया चंपे ऊभा आय ॥ सब लंगा मुख
 मौडकर सैन दिवी समझाय ॥ सैन दिवी समझा-
 य सुजाणीं झाकियो ॥ परिहाँ प्रेम भरचौ सौ बैण
 ककड़वौ भाकियो ॥ २९४ ॥ बार्ता ॥ तरे कँवर
 जी सुजाण रायने कहैछै केमौड़ा तौ आप पधा
 रियाने किरियावरम्हारे ऊपरे करौछै ॥ म्हे तौ
 बाट जौय जौयने थाका सूवामौर उडावता भूखीं
 मरगया ॥ कँवर बायक चंद्रायणाँ ॥ सूवा मौर
 उडावताँ लागी भूख अपार ॥ फिर फिर जौई वा-
 टडी आखर बैठा हार ॥ आखर बैठा हार नदीठा
 आवता ॥ परिहाँ श्रवणाँ सुणीं अवाज अठीने जा
 वता ॥ २९५ ॥ सावलंगा बायक ॥ भोजन छती
 सूँ किया तिणसूँ लगी अवार ॥ बहुविध स्याक
 वणाइया जीमौ राजकँवार ॥ जीमौ राजकँवार

(११०) सुदबुद सब लंगाकीवारता ।

उडाऊं म्हैं सुवा ॥ परिहां बागाँ कारख वाल दुखी
थेक्युं हुवा ॥ २९६ ॥ तरकारचाँ तीखी बणीं भा
त भाँत आचार ॥ केर कहुंदा काकड़ी आँवा
फाड अपार ॥ आँवा फाड अपार जिमाऊं प्रीतसूं ॥
परिहाँ जाजम जुगत विछाय भली सी रीतिसूं ॥
॥ २९७ ॥ रतन जड़ित झारी भरी प्याला अंत
न पार ॥ मिसरूका पगपांतिया कंचन धरियो
थार ॥ कंचन धरियो थार जिमाऊं हातसूं ॥
परिहाँ हसहस देरुपां तालअचूकी बातसूं ॥ २९८ ॥
सूवा और उडावताँ लागी भूख अपार ॥ गुराँ नथानें
भौकल्या बागाँका रखवार ॥ बागाँ कारख वारक
आया चूँपसूं ॥ परिहाँ लालच राजकँवार क रीझ्या
रूपसूं ॥ २९९ ॥ म्हैं पुरसूं चितचूँपसूं, जीमौ
राजकँवार ॥ करी रसौई जुगतसूं, तिणथी हुई
अँवार ॥ तिणथी हुई अँवार उडाऊं म्हैं सुवा ॥
परिहाँ बागाँका रुखवाल दुख्यारा क्युं हुवा ॥

॥ ३०० ॥ कँवर वायक ॥ दुख सुख हरिके हात
 है, जीमत चाली बात ॥ कलम विछेवौ करम में,
 लिख्यौ विधाता नाथ ॥ लिख्यौ विधाता नाथ,
 हर्यौ दिन होवसी ॥ परिहाँ, किरपाकरसी राम,
 विरद दिस जौवसी ॥ ३०१ ॥ सावलंगा वायक ॥
 मिल विछड़न विछड़न मिलन, सकल दर्दके हात
 ॥ साझन सुपनों आवियौ' पुरव जनमकी बात ॥
 पुरव जनमकी बात, पडीरस रूपमें ॥ परिहाँ ॥
 नृपतले गयो मौर्य, लुभायौ रूपमें ॥ ३०२ ॥
 साझन सुपनों आवियौ, हंकूदी रसकूप ॥ धगमा
 नव तन पावियौ, थेरया बंदर रूप, थेरया बंदर
 रूप, खिलाड़ी लेग्यौ ॥ परिहाँ, घणाँ दिनासूं
 फेर आण मे लौथ्यौ ॥ ३०३ ॥ नृप कोप्यौ कर
 खड़गले, झुरचा झरौखाँ जाय ॥ हाड फाँसली
 वीखरचा, आप कँवर हुवा आय ॥ आप कँवर
 हुवा आय, अनसनाँ म्हैं भई ॥ परिहाँ वरसदवाद

(११२) सुदबुद सब लंगाकीवारता ।

समून, भूखप्यासी रही, ॥ ३०४ ॥ कासी करवत
म्हें लियो, सखी सुजाणीं साथ ॥ दइव मिलाया
फिर मिला, कहूँ सुपनारी बात ॥ कहूँ सुपनारी
बात यादकर लीजिये ॥ परिहाँ, पुरबजनमरी प्रीत
पीठ नहिं दीजिये ॥ ३०५ ॥ वार्ता ॥ सबलंगा
कँवरजीनें पूरब भवरी बातयाद अणावे छै ॥ न
कँवरजी क्यूं हीकतौ भूलेछे नें क्यूंहीक याद आ-
वेछै ॥ इतराक मैंतौ जीसचूका ॥ जरां सुजाण
राय पान सुपारी केसर किसतूरी, लबंग इलायची,
कथा चूना लगायनें वीड़ादीया ॥ इतराकमें सब
लंगा सुजाण रायनें क्यौ, कँवरजीके वासते
सहज तयार कर भौजन कीयौछै ॥ अवे थौडी
सीवार सुखफर मावे जरे सुजाण राय केलांरा न
रम नरम पत्ताफाड चीर कर पूरव पत्र सहित
प्रजंक रची और कँवरजीसुं बीनती करी तरे कँ-
वरजी सबलंगाने क्यौके आप पिण पधारौ ॥ जरे

सबलंगा उत्तर दीन्हौ ॥ सबलंगा बायक ॥ चंद्रा-
 यणाँ ॥ सात जनमरी साथ छूं प्रभूउतारे पार ॥
 कँवरौ हटकीज्यौ मती हूँ छूं अकन कँवार ॥ हूँ
 छूं अकन कँवार माफ अब कीजिये ॥ परिहाँ थौ
 डादिनके माँय परणवा दीजिये ॥ ३०६ ॥ कँवर
 जी बायक ॥ गंग जमन तुलसी विचे चंदसूरकी
 साख शिवब्रह्मां विस्नु सपत म्हानूँ सौगन लाख ॥
 म्हानूँ सौगन लाख विषै नहिं सेवसां ॥ परिहाँ
 पीछे करसाँ संग परणवा देवसाँ ॥ ३०७ ॥ सबलं
 गाबायक ॥ काढ खडग विचमें धरचौ कँवरौकी
 यौ कौल ॥ पौढचायेकण साथरे हासी खुसी किलौ
 ल ॥ हासी खुसी किलौल प्रेस रस पाविया ॥ प
 रिहाँ सखी सुजाणीं गीत रिझालू गाविया ॥
 ३०८ ॥ वार्ता ॥ अठी तौ सुदबुद कँवर सबलंगा
 येकण साथरे पौढियाछै ॥ नेंउठीनें गुराँ साहरा
 हुकमसूँ देखवाने छौकरा दौड़ियाछै ॥ चंद्रायणाँ

(११४) सुदबुद सब लंगाकीवारता ।

गुर कह चेलकडा सुणौ बागाँ पहुँचौ जाय ॥
कि सुं कमावे कँवरजी खबराँ दीज्यौ आय ॥ ख-
वराँ दीज्यौ आय ठेटथे जावज्यौ ॥ परिहाँकीज्यौ
मती अवार दौडकर आवज्यौ ॥ ३०९ ॥ चेलाँ
बायक ॥ गुरजी थारा बागमें चंपौ येक सथल्ल ॥
दोनुँ इसडा आवड्या जाण अखाडे मल्ल ॥ जाण
अखाडे मल्लक सूती बाघणीं ॥ परिहां चंनण केरे
रूँख लिपटी नागणीं ॥ ३१० ॥ साल रुखाला
वे गया सूवा साल चुगंत ॥ केल सुचंगे सा-
थरे सूतादौय निचिंत ॥ सूतादौय निचिंतक
ऊंचा मालिया ॥ परिहाँ, केल झवरके वार
झवूके लालिया ॥ ३११ ॥ गुराँ वायक ॥ अण
देखी झूटीकही थे विचमेंड आयादौड ॥ छौराजा
वोसम जणां, अबके जौडाजौड ॥ अबके जौडाजौड
देखकर आवज्यौ ॥ परिहाँ, बोरजाकौ कँवर, संक
मत खावज्यौ ॥ ३१२ ॥ छौकरां वायक ॥ गुराँ

जदीठा दोयजणाँ, तल ऊपर भर बथथ ॥ जंगाँसे
 ती जंगमिल, हताँसेतीहत्त ॥ हताँसेती हत्त
 अखाडे जूटिया ॥ गंधी तणीं दुकान जवा
 नाँ लूटिया ॥ ३१३ ॥ गुराँवायक ॥ गुराँकहरे
 छौकराँ, इसडी हुई नहौय ॥ सुदबुद कँवर सुलक्ष
 णाँ हातन वाले कौय ॥ हातन घाले कौय काय
 दौराखसी ॥ परिहाँ रीत भांत मरजाद बचन मुख-
 भाखसी ॥ ३१४ ॥ चुपक्यारहज्यौ छौकराँ, मती
 करज्यौवात ॥ बोरजाकौ डिकरौ मारे तमाचा
 लात ॥ मारै तमाचा लात करौके भागसी ॥ परिहाँ
 राजालेसी डंडक झगडौ लागसी ॥ ३१५ ॥ वार्ता
 फेर गुराँ विचारकर, आपरापाटवी चेला हेम
 विजे जीने हुकुम दीयौ केथे जायनें देखकरआवौ
 और सारी हनीगत बागांरी ल्यावौ ॥ गुराँ बायक
 चंद्रायणाँ ॥ चेलानें आग्या दिवी, हेमविजे
 हुंजाव किसूकरैछै कँवरजी, निजरचाँ देखरआव

(११६) सुदबुद सब लंगाकीवारता ।

निज रचाँ देखर आव संकमत ल्यावजे ॥
परिहाँ सबलंगाकी रीत देखकर आवज्ये
॥ ३१६ ॥ वार्ता ॥ जरे पाटवी चेलाहेमविजे
जी, अपरागुराँरौ हुकुम पायने बागमें पधारिया, नें
आँवराझाडऊपर चढने आछी तरह सूंचौकसीक-
री तरे सुदबुद सबलंगांदोनूं सूतातौ येकण साथरे,
पिणबीचमे नागी तरवार साखीधरीछै ॥ इतरी
हगीगतदेखने पाछाआय, गुराँ सावसूं अरज गुद
रावैछै ॥ चेलाजी वायक ॥ ॥ चंद्रायणाँ ॥
सूता येकण साथरे, विचखांडौ विनम्यान ॥
करे वात मरजादसूं, सुदबुद कँवर सुग्यान ॥
सुदबुद कँवर सुग्यान, कजारीनाँ करै ॥
परिहाँ, राखै पूरवरीत, नीतसूं पगधरै ॥ ३१७ ॥
अली कलीकी वासले, पंखनवाले दंत ॥ नैन
कटौरां मधुपिये, कँवर रूप निरखत ॥ कँवर रूप
निरखंत, द्रगनसर संधिया ॥ परिहा, नेह जाल

उरझाय प्रेमरस फंदिया ॥ ३१८ ॥ झमक मिले
 द्रगदूरसूं, रुकेन झीणें चीर ॥ हरखे फौज हरौ
 लकी, सियलचढे इतभीर ॥ सियल चढे इतभी
 रक बंधिया नेमरा ॥ परिहाँ, कँवर रसीला नैनक
 प्यासा प्रेमरा ॥ ३१९ ॥ वार्ता ॥ अठीतौ कँवर
 के और सबलंगके आपसमें, कुसीकिलौलाँ हुय
 रहीछै नें उठी गुरांसाने चेलाजी खवर गुदरावे
 छै ॥ इतराकरा समा जौगमें कँवरजीनें पाणी
 री तिरखालागी, तरे सबलंगाने कहै छै ॥ छंद
 चौझड़िया ॥ सुंदर पुरसण हारक, भौजन म्हे
 किया ॥ पीवलुभाना रूप, नीरभी नाँपिया ॥
 लागी प्यास अपारक खाली झारियाँ, नैनकटोरा
 प्रेम पिलादो प्यारियाँ ॥ ३२० ॥ सबलंगा बाय-
 क ॥ चंद्रायणाँ ॥ किणदिस कूवा बाबड़ी, किण
 दिस नदी निवाँण, हूं नहिं जाणूँ कँवरजी, राजग-
 लारी आण ॥ राजगलारी आण, साथथे आवज्यौ

(११८) सुदबुद सब लंगाकीबारता ।

॥ परिहाँ. ल्याऊँ ठंढोनीर पंथ भत लाव ज्यौ
॥ ३२१ ॥ कँवर बायक ॥ धुर उतरादी बावड़ी,
गंगानिर मलनीर ॥ गुराँ खिणाई बागमें, आई
अमृतसीर ॥ आई अमृतसीर, नीरभरल्या वज्यौ
॥ परिहाँ, म्हेछाँ चंपेडार कवेगा आवज्यौ।३२२।
सवलंगा बायक ॥ कँवराँ डरपूँ अकली, ऊंडी
बाव अथगग ॥ छाती धडके मनडरे, पिसल पडे
लोपगग॥पिसलपडे लोपगग कऊंडौ नीरहै॥परिहाँ,
सालूजावे भीज क चंगौचीरहै।३२३॥सुद बुद बा
यक॥साथे चालाँ सुंदरी देसाँ पंथ बताय॥नैनकटौ
राप्रेम रस, प्यारी म्हाँनें पाय ॥ प्यारी म्हाँनें पाय
सुगंधी देहरी ॥ परिहाँ, उँमगी फौज अनंग, घटा
वन मेहरी ॥ ३२४ ॥ सब लंगा बायक ॥ चंपो
मरवो मोगरौ, और सुगंधी जाय ॥ हात जौड़ अर
जी करूँ, पहली लागूँ पाय, पहली लागूँ पाय,
कँवर मन वात है ॥ परिहाँ, आप बडा भौपाल,

बचनकी बात है ॥ ३२५ ॥ सुदबुद बायक ॥ छंद
 चौझड़िया ॥ अंब फलया बहुभाँत, सुरंगी डारियाँ ॥
 नीबू पकी अनार, खुली गुल क्यारियाँ ॥ बाड़ी
 वन फल होय सुतौड़ चखाइये ॥ राख्याँकाँई गुण
 होय अंतगल जाइये ॥ ३२६ ॥ दासी सुजाण राय
 बायक ॥ चंद्रायणाँ ॥ सब लंग्या सिर बेवड़ौ, औठ
 णनवलो चीर, ॥ झारी लीन्हीं हातमें, भरणनी
 सरी नीर ॥ भरण नीसरी नीर, अकेली क्यूँ गई ॥
 छेल मरौड़ी वाँह रूसकर थूरही ॥ बौले दादुर
 मौरक गूजे बावड़ी, परिहाँ छेल वाँहयो छौड
 कँवारी डावड़ी ॥ ३२७ ॥ सुदबुद बायक ॥ हसती
 चढणाँ छौडधूँ छोडूँ राजरी चाय ॥ घरनारी अन
 जलतजूँ, इणविनरयो न जाय ॥ इणविनरयो न
 जाय प्रीतके कारणें ॥ परिहाँ, सूरतपर कुरवान,
 सीस धड़वारणें ॥ ३२८ ॥ दोहा ॥ दासी सुणइण
 विध दुहौ, हुमतर रही दुराय ॥ सब लंगा सौधत

(१२०) सुदबुद सब लंगाकीबारता ।

सखी, छिपगइ निजर चुराय ॥ ३२९ ॥ कँवर
बायक ॥ छंद चौझड़िया ॥ पातलड़ी पणिहारक जौ
वन जौरहै ॥ हंसाँ चलण सुवासक चितरचा मौर
है ॥ नाक सुवाकी चंच भँवाराँ वंक है मदमातौ
महमंतक चीता लंक है ॥ ३३० ॥ सब लंगा
बायक ॥ इण सरवरकी तीर अंब दोयरावला, काची
कली मत तौड़ कँवरकाँई बावला ॥ पाकण दौ
दिन च्यार झुकण घौडारियाँ ॥ हिवड़े हात न
वाल कँवर धूंगारियाँ ॥ ३३१ ॥ सुदबुद बायक
॥ चंद्रायणाँ ॥ हिवड़े हात जवालियाँ, थाने आवे
रीस ॥ काची कलियाँ तौड़ रूपाँ गालीघौ दस
बीस ॥ गालीघौ दसबीस क हिवड़े राखस्याँ ॥
परिहाँ सीस कराँ कुरवान क येफल चाखस्याँ ॥
३३२ ॥ सबलंगा बायक ॥ साथण तौ बैरणहुई
कठे छिपाऊँ जीव आप निराली हौगई सूँपपराये
पीव ॥ सूँप पराये पीव क सूरज उगताँ ॥ परि सूहाँवे

पकडीदाखक माली कूकताँ ॥ ३३३ ॥ चोझडियाछंद
 अकन कँवारी बाल क हिवडो हातहै ॥ आप ब-
 डा भौपाल नीतकी बातहै ॥ लौटे गालौ लूणदई
 के हातहै ॥ थाके म्हांके बीचक पारस नाथहै ॥
 ३३४ ॥ सुदबुद वायक ॥ इण सरवर की तीरक
 चंपा वावडी ॥ नीर भरै पणिहार अनौखी डावडी
 गलटेका बलहार अँगूटे आरसी ॥ बिन माणी उ-
 ठ जायक धोखौ मारसी ॥ ३३५ ॥ सबलंगा वा-
 यक ॥ चंद्रायणाँ ॥ कँवरानेकी राख ज्यौ लोटे
 गाल्यौलूण ॥ म्है अबलाथे नरपती बरजण वाला
 कूण ॥ बरजण वाला कूण बचनकी बातहै ॥ प-
 रिहाँ अकन कँवारी वाला ॥ सरमतुज हातहै ॥ ३३६ ॥
 परएयाँ पहली कँवरजी नैणाँरखज्यौ नेह ॥ मुजवा-
 प्याँकी आखडी तुजकूँ अरपी देहतु जकूँ अरपी देह
 दाग नहिं लागसी ॥ परिहाँ राजीहोसी राम अंदे
 सौ भागसी ॥ ३३७ ॥ सुदबुद वायक ॥ छंद

(१२२) सुदबुद सब लंगाकीवारता ।

चौझाडिया ॥ अलबेलीसी नारक फिरै उछाछली
पाकी दाडम दाख ढकी क्यूं काँचली नींबूके उन
मानक आवै हातमें परिहाँ ॥ गज गैवरकी चाल
क मावै बाथमै ॥ ३३८ ॥ दासी बायक ॥ इण
सरवरकी पाल अमौलक बावडी ॥ नीर भरै
पणिहारक नाजुक डावडी ॥ गल टेकावल हार
पगां विच पावटौ ॥ परिहाँ देख पराई नार ॥ छेल
क्यूं आवटौ ॥ ३३९ ॥ सुदबुद बायक ॥ सुंदर
जौवन झिलरया माणक मौती रंग ॥ ज्याँ नित
पूजी गौरज्या ज्याँसूं भिडसी ॥ अंग ज्याँसूं भिडसी
अंगक मौजाँमाणसी ॥ परिहाँ मास दिवस पख
पहर भली पुलमानसी ॥ ३४० ॥ वार्ता ॥ कँवर
सुदबुदके और सबलंगाके आपसमें हास्पविनौ
दहौताँ हौताँ सांझपडी ॥ ता समयमें येक आँवा
केझाड ऊपर चकवीने चकवी आय बैठा ॥ इतरा
कमें सूर्य अस्तहौताँहीं चकवा चकवीरे आपसमें

विछौवौ पडगयौ ॥ तरै चकवी बौली हे चकवा
 दिन तौ कटणों सहजहै परंतु रात कटणीं मुस-
 कल हुवै सू कोई अपूरब बात कहौ ॥ दोहा ॥
 इण विधचकवौ चक्कवी बागाँ उतरचा आय ॥
 रैण विछौई चक्कवी कह कोइ बात सुणाय ॥
 ३४१ ॥ वार्ता ॥ अब चकवो बोल्यौ घर बीती
 बात रोकाँई कहणों यातौ ठेट सूई यादहै पण
 पर बीती बात कहौ ॥ चकवा बायक ॥ सौरठा
 पर बीतौडी बात सुण चकवी चकवौ कहै कहूं
 पुरातम ख्यात यह अपछर यह सेठ सुत ॥ ३४२ ॥
 चंद्रायणाँ ॥ इंद्रसरापी बनचरी धर कुम्हारघररूपा ॥
 फिर बंदर ओर बंदरी विछड पडी रसकूप ॥ वि
 छड पडी रसकूप नृपत येक लेगयौ ॥ रह्यौ अकेलौ
 पीव विछे वौह्येगयौ ॥ वादीगर केहात बंधायौ सहल
 में ॥ परिहाँजदको विछडौ कंथ मिल्यौ फिर महलमें
 ३४३ मौलखरीद्यौ बाँदरौराख्यौ नृपसें गौप ॥ खवर

(१२४) सुदबुद सब लंगाकीवारता ।

पडीपायौमरमराजा कीयौकौप॥राजा कीयौ कौप
नाह संग गिरमुँई ॥ पडदासीके पेट अनसना
हुयगई ॥ अनसन थन तज दियौ येक जुगपार
णै ॥ परिहाँ भूख प्यास सब सही पीवके कारणे
॥ ३४४ ॥ ॥ कासी जायकरौ तडी लीन्ही दासी
साथ ॥ अवै सेठवर औतरी सात जनमकी बात॥
सात जनमकी बात कहतहूं तुज्जकूं ॥ अब मिलि
याहै आय खबरहै मुज्जकूं ॥ फेर विछौवा हौय सु-
गौरी सखियाँ परिहाँ हौसी कँवर फकीरडारसिरख
क्खियाँ॥३४५॥मंदिरमाँहि मिलापहुयनिद्रावसपुनि
जग्र सूवां वचन सँदेस सुण जासीपारा नग्र॥जासी
पारानग्र मिलेगी बागमें कौयलडारै अंबविछैवो
भागमें॥दंपतवे मरकँवर सतीसंग होवसी ॥परिहाँ
जनम सातकर पूर इंद्रवर जौवसी ॥ ३४६ ॥ सुण
चकवाकी बातदोउँ जनम किया सबचीत फिर
सवलंगा भवनकूँ च्यारवडी निसवीत ॥च्यारवडी

निसवीत गुराँपै आइयाँ ॥ करविनती बहुभाँत
 लगी गुरपाइयाँ ॥ गुरदीन्ही आसीस सीसकर
 धारियाँ ॥ परिहाँ लेआयुस सखिसाथक वराँपधा
 रियाँ ॥ ३४७ ॥ वार्ता ॥ सबलंगा गुराँसावकनेसूँ
 सीखलेयने पीछी वराँ पधारी ॥ आगे सबलंगारी
 माता पूछियो वाई आज मौड़ाघणाँ आया तरेक
 योकै गुरासावने सारी पढियाँ पढियाँरीहाजिरी
 दीन्ही जिणसूँ अवार हुयगई ॥ इतराकमें सब
 लंगारी भौजाई चौनिजर हुयने हसकर बौली
 वाईजी आज आपरा दिलऊपर उदमादने खुसी
 मालम पडैछै जाणें कामदेवरी फौज उमडीछै ॥
 इतरी बात सुणताई सबलंगा मुसकाथकर सरमंदी
 हुयने पाछीबौलीनहीं ॥ नैआपरेठिकरणें जायनें
 रजंकपर पौठी परंतु सारी रात निद्रा
 नाई नहीं औरकंवरकीबात यादकर करनें आपरा
 रव जनम चितवन करवोकरी ॥ इतराकमें

(१२८) सुदबुद सब लंगाकीवारता ।

महलान्नीचिसूं नीसरे छै ॥ जद सब लंगाके और
माहाराज कँवरके चौ निजर हुई, ॥ तबे माहावत
षिण ऊंचौ देखवालागौ जरां सब लंगानें देखकर,
मुरछागत हौयने हाथी सूं नीचो पड़ गयो ॥ जरां
सब लंगारी भाभी काँई दुहो कहे छै ॥ भाभी
वायक ॥ सुण नणदल भाभी कहै, अखियाँ थारी
जेहेर ॥ येकज मावत मारियो, रखौ कँवर परमे
हेर ॥ ३५० ॥ वार्ता ॥ माहावत घड़ी दौय सूं सा
बचेत हुवोनें मुरछा खुली ॥ तरे महावतरी लुगाई
सब लंगानें काँई दुहौ कहे छै ॥ चंद्रायणाँ ॥ हेहि
तियारी पापणीं, हितिया लागी तौय माहावत
मारयो रावलौ, बेठी छी घरखौय ॥ बेठी छी घर
खौय बड़ी हिति यारियाँ ॥ परिहाँ नैणाँ हंदा
चौट चलाई नारियाँ ॥ ३५१ ॥ छंद चौझ
डिया ॥ गौरी गौखाँ ऊभ अंग नहिं मौड़िये ॥
देख पराया छेल निजर नहिं जौड़िये ॥

जौ दीना करतारसु अंगलगाइये ॥ परिहाँ ॥ दी-
न्हॉ दान कथीर कंचन कहाँ पाइये ॥ ३५२ ॥

॥ वार्ता ॥ अठीं सबलंगारी गौदमें सबलंगारो भ-
तीज बेठो छो, इतराक मेंतो कँवरजी साह, सामों
जोयौ जरां सबलंगा भतीजानें छातीके चिपाय
करभींच्यौं ॥ जद सबलंगाकी भाभी कांई दुहो
कहेछै ॥ नें सबलंगाकांई सुणेछै ॥ भाभी बायक ॥

॥ दोहा ॥ क्यांनैभीं चौवालनै, क्यूं पावौछौ दूखा ॥
बाला नणदल कँवर विन, कदेन भागे भूख ॥

॥ ३५३ ॥ सबलंगा बायक ॥ सुण सबलंगा यूंक
ह, भाभीसूं अणखाय ॥ पर पुरसाँसूं मोहौ बत,
बहारीकरे वलाय ॥ ३५४ ॥ वार्ता ॥ इतरीवात

चीत नणद भौजाईरी आपस में सुणताथका,
सवारी आगेवठी सू सिरे बजार हौ ताथका, पाछा
महलां दाखल हुवा, ॥ अठी सेठजीरा गुमासता,
जाय, सेठजनिं सालमकरी, सेठजी साह, सबलंगा

(१३०) सुदबुद सब लंगाकीवारता ।

रेझरौखां नीचे, माहाराज कँवारकी असवारी घडी
दौय ठहरी, ॥ यावात साहजी सुणकर हजूरमें
गया, जायनें कही, श्रीहजूर पातस्या वौंकी फौज,
आभूगठ ऊपर चढीछै, ॥ सूमाहाराज कँवारनें,
दौ हजार आदमीं लेय साम्हाँ पेसकसीमें भेजौ,
नहीं तौ सहरनें खेंचल करसी ॥ जरांसाहजी तो
पाछा आया ॥ और माहाराज कँवारका डेरा
हजूरका हुकमसूं, मोहोम पधारण साख्वारे बागों
में हुवा ॥ फौजसारी हाजर खडी, उणसमाँमें सब
लंगा सात खंडे महल जाय संपाडो करणनें चढी,
जरां फौज देखनें सुजाण रायनें पूछेछै ॥ सबलंगा
बायक ॥ दोहा ॥ किणरा डेरा रावटी, किणरा
घौडा ऊठ ॥ फौज चहांदिस फरवरे, रोक्या च्याहूँ
खूँट ॥ ३५५ ॥ सुजाणराय बायक ॥ असवारीसुदबुद
तणीं, कँवर पधारें म्हुँम ॥ जिणरा डेरारावटी, गजघुड़
लौरी लूम ॥ ३५६ ॥ वार्ता ॥ तरे सबलंगाकहीसुजाण

राय कँवरजीरा हलका रानें बुलायल्याव जराँसु-
 जाण राय जायने कँवरजीरा हलकरानें ल्याय
 हाजरकीयौ ॥ तरे सवलंगा रुकौ लिख हलका रानें
 दीयौ ॥ दोहा ॥ पांच मोहोर घूपेसगी थौकागद
 लेजाय ॥ हारगलाकौ बखसदूं पाछौ ज्वावसंगाय ॥
 ३५७ ॥ सिद्ध सिरी सुभ औपमाँ सुदबुद कँवर
 सुजाँण ॥ महरकरौ म्हाँ ऊपरे जदम्हाने दासी
 जाँण ॥ ३५८ ॥ हलकाराँसूँ थूक्यौ मुख सूँ कह
 ज्यौ जाय ॥ सुदबुद कँवर सुजाण विन गौरी अंत्र
 नखाय ३५९ ॥ वार्ता ॥ जराँ हलकारे जायने
 कागद चनणिया खवासनेदीन्हौ ॥ और चनणि-
 यौ जायने माहाराज कँवारके नजरकीन्हो ॥ मा-
 हाराज कँवार वाचने नाराज हुवा और फौजतो
 विदाकराने आपरा कामदारने मुसायफ बणाय
 कर सारी फौजरी भोलावणदेविदा कीया ॥ अठी
 आप पाछा महलाँ दाखल हुवा ॥ अवे सेठजी सब

(१३२) सुदबुद सब लंगाकीवारता ।

लंग्यारो लगन पूछने व्याव मांडियोछै पारानगर
सूं रूपा साहपरणवा पधारसी॥ अबै सबलंगा बाने
बैठी बानो सब लंगारो सेठजी आपरेघहू कीयो
जिणवानाने सवा लाख रुपइया लागी बडागाजा
वाजा हगाम ठाटसूं पालखी में बैठायनें सबे वजार
नौपत निसाण कौतल मुरातवांसूं चंवरारे फट
कारे बानों महलां दाखल हुवो ॥ घणीं रौसनियाँ
नें आतस वाजियाँ हुई ॥ माहाराज कंवार बानों
देखवा पधारिया पांचमोहौर अमौरनें चनणियां
खवासनें दीन्हीं ॥ माहाराज कंवार पिण पाछा
महलांदाखल हुवा आयने कइयो सेठजीरी बेटी सा
बलंगा रोव्यावछे सूवानों देवौ जरां कंवराणीजी
कइयो काहाल वडी फजर नोतौ दिरावसाँ॥जदवड
फजर हौतांही ॥ सेठजीरे घरे बानाको नोतो धाय
साथे दिरायो पछै दासीनें बुलावणनें भेजी जरां सब
लंगासौला शृंगार कर छतीस आभूषण पहर हातमें

हजरियाँ (हमाल) लेय दासी सुजाण रायने साथे
 लेयनें रावले जावणनें तयारहुईछै जठे भाभी आ-
 य आडी फिरीछै ॥ भाभी वायक ॥ दोहा ॥ राव-
 लदेवल मत फिरौ वाइजी चढिये तेल ॥ हूंथाने
 नहिंजाणघूं घरमें राखूं ठेल ॥ ३६० ॥ वार्ता ॥
 इतरी वात भाभीकी सुणकर सबलंगा पाछो दो-
 हो कहै छै ॥ सबलंगा वायक ॥ कर लोहो हंदौ
 पीजरौ जड छुरियाँ तरवार ॥ कँवर बुलायां नाँर
 हूं भावे गरदन मार ॥ ३६१ ॥ छंद चौझड़िया
 मँहदीरा चीहातक काँकण डौरडा ॥ सुदबुद राज
 कँवार वाण्याँतो छौरडा ॥ सुण भाभीजी वात
 कँवर सूं सरिहै ॥ सुदबुद सिरको मौडक वाणियों
 वरिहै ॥ ३६२ ॥ वार्ता ॥ सबलंगाभाभीनें कहती
 थकी उठासूं रथमें बैठकर सुजाण रायने साथे
 लेयनें राजमहलां रणवासमें दाखल हुई ॥ आगे
 कँवरजी पिणरणवासमें छा जठे सुदबुद कँवरके

(१३४) सुदबुद सब लंगाकीवारता ।

नें सबलंग्याके चौनिजर हुई तरे सबलंगा नेणां मूं
मुजरो करने कंवराणी जीके पास जाय बैठी तरे
कंवराणीजी सुजाण रायमूं दोहो कहैछै ॥ कंवरा-
णी बायक ॥ दोहा ॥ बात कहूं सुजाणियाँ सुण
जे येक सुबाय ॥ सबलंगा समझायदे पिवराख्यौ
भरमाय ॥ ३६३ ॥ सुजाण राय बायक ॥ सब
लंगा सूलक्षणीं समझै नहीं अयाँन ॥ थेक्यूं
भूल्या भरममें चातुर चतुर सयाँन ॥ ३६४ ॥
वार्ता ॥ सुजाण राय कंवराणींजी सूं हात जौडनें
कहैछै केम्हारा बाई सावतो भौलाछै क्यूंहींसमझ
नहीं इणारे तौ अकेण पौशालरा पठणां सूं हेत
इकलास मंमत इरादोराखैछै और दूजी काँई बात
छैनहीं ॥ आप इण बातरो काँई अब रोसौ राखौ
छौ ॥ इतराकमें तौ सब लंगा कंवराणींजी सूं
हात जौडनें अरजकरी के रसौवडामें धूवौघणौंछै
सूहुकम करो तौ बारे जाऊँ ॥ जरां सबलंगा

हुकम लेयनें वारे आई ॥ और कँवरजीसूं काँई
 दोहो कहैछै ॥ सबलंगा बायक ॥ दोहा ॥ काच
 महल तौ कचकचौ, रतनां जड़ित किंवार धूँवारे
 मिसनीसरी, नैणां कियौ जुँहार ॥ ३६५ ॥ वार्ता ॥
 जरां कँवरजी बोल्या, महलमें गणपती जीरां मिंद
 रछै, जिणमें जाय बेठौ ॥ तरे सबलंगा मिंदरमें
 दाखल हुवा ॥ इतरे कँवरजी पिणलारांसूं जाय
 भेला हुवा ॥ और कह्यौके गणेशजीनें पूजा, ॥ तरे
 सुजाणराय हात जौड़नें अरज गुदराई प्रथीना-
 थ गणपतीरी पूजा ॥ आपपिण करनें कांकण
 डौरड़ा वँधाया चाहीजै ॥ तरे माहाराज कँवार
 और सबलंगा, दोनूँ जणां गणपती री पूजाकर,
 कँवरजी पिण कांकणडौरड़ा बांधलीया ॥ और
 मँहदी उवटणां कर तयार हुवा, जठे सुदबुद कँव-
 र, नें सबलंगा री जौड़ी किसीहेक दीखेछै ॥
 ॥ सुजाणराय बायक ॥ दोहा ॥ सिर पचरंगो मौ

(१३६) सुदबुद सब लंगाकीवारता ।

लियो, माणक जडियो मौड़ सुदबुद दूला हदव-
ण्या, सबलंगाके जौड़ ॥ ३६६ ॥ सबलंगा तेरा
तरुण, मगरपचीस कँवार ॥ रूपरंग जौवन जड़ी
करता घड़ी संवार ॥ ३६७ ॥ बार्ता ॥ दौनारी
जौड़ी इसी जुड़ीछै, जाणें रेसमकासा लच्छा,
कनाकुरजकासा वचा, जौवनमें भरपूर, कनाकाम
देवको सोनूर, इसड़ी जौड़ी वणीजाणेंहूर कनज
हूर, जिणने देख्यांसुंई दालिद्रियाँ का दालीद्र
दूर, ॥ इण मुजब दौनारी जौड़ी वणीछै, ॥ इतरा
कमें रसोंवडौ तयार हुवौ, तरें दोनूजणाँ पांतिये
पधारिया, नेंसारी तयारी सहित सामगरीका थाल
भरभरने कंचन मणमाणक रीजड़ी हुई चौकियां
ऊपर थालल्याय मेलिया, अवे आपसमें मनवा-
रांने घणाठाट बाटसूं जीमने पानवीड़ा, केसर
लवंग इलायचीयांरी मनवारां करैछै, इतराक में
सबलंगा हात जौड़ने कँवरजीसूं अरज करी,

प्रथीनाथ, काल परणीजणरौ दिनछैसू आपपिण
 जानमें ताकीदी सूं पधारसौ नेंमने हुकम होयसौ
 म्हें पाछी जाऊं ॥ तरे कँवरजी कथौ साराही काम
 आछावणसी आपतो पाछा पधारौ ॥ तरे कँवरा
 णीजी सूं सुजाण राय अरज गुदरावे छेके अवेबा
 नाने सीखदिराईजे तरे कँवराणीजीरो वानौं विदा
 कीयौसू कँवराणीजीरो वानौंघणों आछो नीसरियो
 घणाहमांससूं चंवरारै फटकारे गाजा वाजाँसूं सिरे
 बजार हुयने सेठजीरी हवेली वानों पाछो दाखल
 हुवौ ॥ अठी बरात रूपा साहरी आय वागमें डेरा
 दिया ॥ तरे वधाई दाराँ जाय पदमाँ साहरे घरै
 वधाई दीन्हीं ॥ दोहा ॥ ठाठी सेवगनेवगी दिवी
 वधाई आय ॥ जान पधारी गौरवें सन सुख लेवो
 वधाय ॥ ३६८ ॥ घणाँवमँड सूं आविया छत्रपती
 छे लार हाथ्यां रेहलके चले चुड़लौं अंतनपार
 ॥ ३६९ ॥ वार्ता ॥ वधाई दारां वधाई देयने

(१३८) सुदबुद सब लंगाकीवारता ।

पाछा बरात उतरी जठे वागमें आय दाखल हुवा ॥
॥ दोहा ॥ कर भोजन पौसाख कर हुय घुड़ ले
असवार ॥ तौरण बाँदण कारणे चाल्या सिरे बजार
॥ ३७० ॥ सरसत गणपत ध्याविया देवी देवम-
नाय ॥ चढ घौड़ी परणी जवा हालपा रूपा साह
॥ ३७१ ॥ साहाजी चालपा परणवा ले सारौपर
वार ॥ आगे गावे जाँगड़्या अमलारी मन्हुवार
॥ ३७२ ॥ अड़ा भीड़मावे नहीं खवाँ खसी चहुँ
और ॥ पगपग नौछावर करे दे रुपियाँने मोहौर
॥ ३७३ ॥ वहे कलावत गावता रंभा निरत करेह ॥
आगल ढाढी औलमे जाचक सिंधू देह ॥ ३७४ ॥
नगर नार निरखण चली अली झरौ खाँ झाँक ॥
मदछाकी मुख मुलकती चटक मटक पौसाख
॥ ३७५ ॥ रंग बधाई सहरमें गली गली उछरंग
आई जाँन बजारमें कँवर मिल्या उण संग ॥ ३७६ ॥
॥ वार्ता ॥ इण मुजब बरात सिरे बजार होयने

पदमाँ साहरे घरे दाखल कुई अठी कंवर सुदबुद
 पिण जानरा सिरदारामें आय साँमलहुवा ॥ दोहा
 कँवरचढ्या येक अस्वपर, तिणकर लंबीकाम,
 सबलंग्याकर जोडके निवकर करी सिलाम ॥
 ॥ ३७७ ॥ वार्ता ॥ अठी रूपासाह मनमें विचार
 करैछै और देवीदेवता मनावेछै ॥ रूपसी कँवर
 वाथक ॥ चंद्रायणाँ ॥ सरसत गणपत ईश्वरी
 भूलाँ हर फभताय ॥ पदमणने परणी जस्यां, पह,
 लीलागा पाथ ॥ पहली लागापाथ, मनावां ईश्वरी
 परिहां देस्याँ थारीजातभात मतवीसरी ॥ ३७८ ॥
 तडदे तौरण वानस्यां, भडदेचंवरच्याँवीद ॥ चंदा
 वदनी परणस्याँ सुखभरलेस्या नीद ॥ सुखभर
 लेस्यानीं द पलंगपर पौठस्याँ परिहां अंगसूं अंग
 भिडाय दुसालो औठस्याँ ॥ ३७९ ॥ हीरासोती
 सेवरे ; कंचनकी कलियाँ ॥ चीतालंकी परणस्या
 करस्याँ रंगरलियाँ ॥ करस्याँ गरलियाँह कसंबाछाँ

(१४०) सुदबुद सब लंजाकीवारता ।

णस्याँ ॥ परिहाँ, तरुणा पनके मांहक मौजा मांण
स्याँ ॥ ३८० ॥ वार्ता ॥ इण तरह देवता मना-
विया नेंतोरण वानण आय ऊभा रया ॥ जठेसवलं-
गाझरौ खारी बारीमें विलापकरैछै ॥ चंद्रायणाँ ॥
किसतूरी काली करी निरफल नागरबेल ॥ हींण
पुरुषघर पदमणीं, यौकरताको खेल ॥ यौकरता को
खेल कभूलानीदमें ॥ परिहाँ, बाडौसो विडरूप
लक्षण नहिं बीदमें ॥ ३८१ ॥ हेविधना कैसेदियो
रांका हातरतन्न ॥ कौयलवांधी कागकेजिणरौ
काँई जतन्न ॥ जिणरौकाँई जतन्न ककरता क्या
किया ॥ परिहाँ, हींण पुरुष घरवास हरीमौने
दिया ॥ ३८२ ॥ केसरसिंधू कुमकुमाँ और
सुगंधीवास ॥ हेविधना कैसेदियो गुवूसूं घरवास ॥
गुवूसूं घरवास हिया बिचसालहै ॥ परिहाँ
बाडौ अतिविड रूपक बैठागालहै ॥ ३८३ ॥
॥ छंद चौझडिया ॥ श्रीफल कौन सवाद कहा

जानें बनचरौ ॥ विनआदरकौ व्याह ॥ हीरो तोहि
 कंकरौ ॥ लिखिया लेख अलेख विधाता क्याकिया
 मरज्यौ मायरबाप जिणां बर हेरिया ॥ ३८४ ॥
 ॥ चंद्रायणां ॥ काली मिरचकौ झूमकौ लूंगडौडां
 कौहार ॥ कड़का झौडे कांभणीं कदमरसी भर
 तार ॥ कदमरसी भरतार सुखी जदहौवसी ॥ सुद
 बुद राज कंवार निजरभर जौवसी ॥ ३८५ ॥
 भाभी वायक ॥ दोहा ॥ बाप बरि सगपण कियो
 घरवर येकण साज ॥ अँखियाँ आँसू आवटे कहो
 नणदल किणकाज ॥ ३८६ ॥ लिख्या लेख कैसें
 टले विधना लिष्या विचार ॥ मन दिलगीरी मत
 करौ भोगे सौभरतार ॥ ३८७ ॥ वार्ता ॥ अठी
 सबलंगातौं मनमें विचार करैछै नें भावज समझावै
 छै ॥ इतराकमें तो तौरण वानणरी बखत हुईतरे
 तौरण वांदवा रूपासाह सवै दरवाजै घोडौ खडौ
 कीथौ उणरे बरौवर कंवरजीपिणजाय ऊंभा रया

(१४२) सुदबुद सब लंगाकीवारता ।

तौरण ऊंचौ घणों राखियों जिणसूं बींदसें तौरण
वानणीं नहिं आयौ ॥ तरे माहाराज कंवार आप-
री लाँबी काँमसूं तौरणरे फटकारनें एक चिडी उ-
डाय रूपासाहरे हातमें छडी सूपदीनी कयौकेयूं
तौरणवानीजेछै ॥ पछै रूपासाहनें तुरत घोडासूं
उतारनें चवरियाँमें लेगया जिणवखत सबलंगाकी
भाभी दोहो कहैछै ॥ भाभी बायक चंद्रायणाँ ॥
चंवर्यां बींद पधारिया नार हुई चौदंत ॥ सरद
चंद ज्यूँ काँमणी केतराह सौं कंथ ॥ केतराहसौं
कंथककालौ कागहै परिहाँ लिखिया लेख अलेख
कफूटण भागहै ॥ ३८८ ॥ वार्ता ॥ रूपसकिँवर
चवर्याँमें पधारिया जठे कंवरजी पिण ब्राह्मण
कौ भेष करनें चवर्याँमे जायदाखल हुवा ॥
अबे हतलेवौ छुडावणरी जुगतइण मुजवकरीके
रूपासाहनें तौ हथलेवौ सुजाणींसूं जूडाय
दीन्हौनें सुजाणीं सबलंगारी पीठमें चिपनें बैठगई

और हात सबलंगारा चीररा बौतामें राखियो ॥
 और कँवरजी, हात सबलंगा को पकड़ हतलेवो
 जोड़लीन्हों ॥ और येक विस्वो साहुधान, दौय
 विस्वा साहुधान, करवा लाग गया, पछेकयो सब-
 लंगा नेतो अंच आवेछै, सोहू पकड़ नैसाव चेत
 राखूंहू, थूकरताँ फेरामें पिण साथै, सबलंगा,
 सुजाणी, और कँवरजी, रूपासाह साथेरा साथे
 फिरगया, पछे हतलेवो छुडायने कँवरजी तो
 चालवा लाग, जराँ सबलंगा, पींपलको पान ले-
 यने खांडौकर, कँवरजीने दक्षिणारे मिस, पकड़ा
 यो ॥ जरे कँवरजी खांडे पींपल जायने पारस
 नाथजीरे मंदिर वेठगया, अवे पींपलको ब्रक्ष, पव-
 नसूं हलियो जराँ पत्तावाजवा लाग, तरे कँव-
 रजी जाण्यो, सबलंगा आई, जराँ दाहूँ रौ सीसो
 येक फेर पी गया ॥ दोहा ॥ असल दुवारादा-
 खरौ, लाख लाखरी छक ॥ घांणी गर माता
 हुवा वैठा मारगताक ॥ ३८९ ॥ वार्ता ॥ कँवर-

(१४४) सुदबुद सब लंगाकीवारता ।

जी छिन बारे छिन मांहनें, आमां साम्हां फिरेछे
फेरपींपलका पाँन बाजिया, तरे कँवरजी जाएयौ
अवके तोसवलंगा जरूर आई, ॥ आगे बारे आय
नें देखेतो सब लंगा आईनहीं, ॥ जराँ कवरजी स
वलंगारीं उमेदको दोहो कहेछै ॥ सुदबुदबायक
॥ चंद्रायणाँ ॥ पींपलपानज रुंणझुणें, रेणअँधेरी
जोय ॥ सायधणतो आईनहीं, किसविध जीवण
होय ॥ किसविध जीवणहोय कसूताथेकला ॥
सिंधसबद बनमांह, चंद्रमाद्वैकला ॥ बैठाजोवाँ वाट
नप्यारी आइयाँ ॥ परिहाँ, सुदबुद राजकंवारक
सुखफरमाइयाँ ॥ ३९० ॥ बार्ता ॥ अवे कँवरजी
तौ सबलंगाकी राहा देखताँ देखताँ निद्राके वस
हुयनें पौठियाछै ॥ अठी सबलंगा परण नें, रूपा
सा हरे डेरे जानी वासे आया ॥ इतराक्रमें रूप
सी कँवरतौ महलाँ दाखल हुयनें पलंगपर
जायनें सूताछै ॥ अठी सब लंगा पिण
महलाँ दाखलहुई ॥ पणबचन पहली मांदिरमें आव-

णरो कंवरनें देवकीछी सू आपरी दासी भुजाण
 रायनें कहैछै ॥ सबलंगावायक ॥ चंद्रायणां ॥
 सुदबुद कंवर मिलायदे दासी बेगी चाल ॥ मन
 उमंग्यौ मिलसूं सही जावतडाँ मत पाल ॥ जावतडाँ
 मतपाल सीखहूं लेवसूं ॥ परिहाँ पूजणपारसनाथ
 रातरकेवसूं ॥ ३९१ ॥ सात जनमकी अस्तरी
 सुदबुदछै भरतार ॥ भावे परणों बाणियों पिवसूं
 राखूं प्यार ॥ पिवसूं राखूं प्यार बाण्यांसूं आखडी
 परिहाँ सुदबुदछै सिर मौड़ सीस की राखडी ॥
 ॥ ३९२ ॥ वार्ता ॥ इणतरह दासीसूं मनसौबौ क-
 रनें अबे सबलंगा रूपासाहकनें जायनें हातजौड
 कर अरज करेछे ॥ दोहा ॥ कंचन थाल सँजौइया
 ऊभीध्यान धराँ ॥ पूजा पारसनाथरी कहोतौ जाय
 कराँ ॥ ३९३ ॥ छंद चौझड़िया ॥ सुंदर जौडचा
 हात महलके बारणें ॥ पूछे रूपा साह कहौ किण
 कारणें ॥ बोली जात सुजात पारसके देहरे ॥
 तुरतहि धोखूं जाय ॥ बंधेही सेहरे ३९४ ॥ चंद्रा-

(१४८) सुदबुद सब लंगाकीवारता ।

जिणझरौखामें पील सौताँ जलैछै जाणें सूमको
सो टापरो, कनाँ दातारकोसौ तेज, सूरवीरको
सोतोसौ, जिण नीचे सूं सावलंगा नीसरेछै ॥
जराँपायल रमझौल, अणवट चिटियाँकौ
झणकार, और झालरा मादलियाँरौ ठण-
कार, खत राणीं सुणकर झरोखा झाकैतौ
सवलंगा, महमंत हातीकी तरह घूमती थकी
चाली आवैछै ॥ जराँ खतराणीं जायनें आपरा खावें
दनें जगायौ ॥ जराँ खतरी झरोखै आयौ खतरी
के ओर सबलंगाके चौनिजर हुई ॥ सबलंगाकौ
रूपदेख कर खतरीनें मुरछा आई और झरोखांसूं
पड़वा लागौ ॥ जराँ खतराणीं बाथामें पकड़ राख्यौ
जराँ सबलंगानें काँई दुहौ कहैछै, नें सबलंगा
काँई सुणे छै ॥ खतराणीं बायक ॥ चंद्रायणाँ ॥
हेहितियारी पापणीं कुणकी छे तूं जाय ॥ मास्चो
छौमौ बालमौ बैठी छी घर खौय ॥ बैठी छी घर

खौय बडी हिति यारियाँ ॥ नैण चलावै चौट किणी
 चर नारियाँ ॥ मारग वहती नार महोलौ देगई ॥
 परिहाँ नैन कटारी मार कलेजौले गई ॥ ४०० ॥
 ॥ वार्ता ॥ इतरी सुणनें सब लंगा पाछौ काँई कहै
 छै ॥ सब लंगा वायक ॥ चंद्रायणाँ ॥ मौदेख्याँदे-
 वल डिगै उखड़ जाय गज दंत ॥ बाँट वधाई
 कामणीं जीवत पायौ कंथ ॥ जीवत पायौ कंथ
 वधाई बाँटज्यौ ॥ ले गंगाजल हातक मुखड़ौ
 छाँटज्यौ ॥ जंगी ढौल घुराय गीत रंगगान ज्यौ ॥
 परिहाँ दान दियौ भरतार इतौ गुँण मानज्यौ ॥
 ॥ ४०१ ॥ वार्ता ॥ आगे येक सुनारकी हवेली
 रो झरोखौ आयौ जठे सुनारी जाय सुनारनें जगायौ
 सुनार झरौ खे आयौ आयनें सब लंगानें देखनें मोहि
 तहुवौ ॥ इतराक में सुनारी खं खारौ कीयौ जरां
 सुनारीनें सब लंगा काँई दुहौ कहे छै ॥ चंद्रायणाँ ॥
 थारौ वाल मथाँ कनें तूँ वाल मरी जौया ॥ गेले वह

(१५०) सुदबुद सब लंगाकीवारता ।

तासिंघज्युँ मती दकालो मौय ॥ मती दकालौ मौय
पटा झर आवतौ ॥ लँगर तुड़ायाँ तीख गिणें
नाहिं खावतौ ॥ म्हारे सिरको मौँडक जौवन पूर
है ॥ परिहाँ सुदबुद राज कँवार माहाभट सूर है
॥ ४०२ ॥ वार्ता ॥ तरे सुनारी पाछौ काँई कहे छै
नें सब लंग्या काँई सुणे छै ॥ सुनारी बायक ॥
दोहा ॥ हुकमीं चाकर रावला हुकम करौ परबाँण ॥
अरज कराँ बाइ साब लंगा औगुण रती न जाँण
॥ ४०३ ॥ वार्ता ॥ इतराक मैँ तो येक कुत्ती भुस
वालागी जराँ सब लंगा काँई कहे छै ॥ सब लंगा
बायक ॥ चंद्रायणाँ ॥ काला मुखरी कूकरी भुस
भुस लाहौलेह ॥ मौ बीती तोय बीतसी काती
आवण देह ॥ काती आवण देह घरौ घर डौलसी ॥
धुरकाराँ सुँलौग सबी मिल बौलसी ॥ लार लियाँ
दसवीस फिरेली दौडती ॥ परिहाँ जिणतिणनेह
लगायप्रीत नित जौडती ॥ ४०४ ॥ वार्ता सबलंगा कु

तीनें दोहो कहती थकी चली गई ॥ आगे जायर
 सहरके बाहर खडी रही राततौ अँधेरी और
 पीपल छण छणाट करेछै ॥ बनमें चात्रगमौर झि
 गौरेछै ॥ पपइयौ तानतौडेछै ॥ जठे सबलंगा सुजा
 णरायनें कहेछै ॥ सबलंगा वायक ॥ चंद्रायणाँ ॥
 रेण अधेरी पंथमें दासी आगे चाल ॥ आभे चमके
 बीजली पड पावसपर नाल ॥ पड पावस परनाल
 सघन घन मेहकौ ॥ परिहाँ हौसीकोण हवाल नव-
 ला नेहकौ ॥ ४०५ ॥ वार्ता ॥ तरे दासी सुजाणराय
 काँई कहेछै ॥ चंद्रायणाँ ॥ ओपीपल देवल अठे
 डरपौ मती लगार ॥ सुदबुद कँवर मिलावसूं
 वखसोनौ सरहार ॥ वखसो नौसरहार तुरत मिल
 जावसी ॥ परिहाँ हेलौ दे साँजायक साम्हाँ आव-
 सी ॥ ४०६ ॥ वार्ता ॥ अवे सबलंगा मंदिरमें कां
 करयाँ फेंकणीं सरू कीनीं ॥ पण कँवरजी जाग्या
 नहीं तरे सुजाण राय दोहो कहेछै ॥ सुजाण राय

(१५२) सुदबुद सब लंगाकीवारता ।

बायक ॥ चंद्रायणाँ ॥ तड़ तड़ बाव्हाँ काँकरी
बाजे लाल किंवार ॥ ऊठौ मदमाता कँवर साय-
धण ऊभी बार साय धणा ऊभी वारक बहुत बणा
वसें ॥ सुंणज्यौ राज कँवारक घणाँ जड़ावसें ॥
धणरो जौ बन पूरकछौलस मंदसी ॥ परिहाँ लूटौ
राज कँवारक लंकक मंदसी ॥ ४०७ ॥ मदमाता
चेते नहीं दासी करे पुकार ॥ कँवर पौढिया नींदमें
सायधणऊभी बार सायधणाऊभी वार क नाजु
ककाँमणी ॥ परिहाँ ॥ सझसौला तिणगार दिपे
जिमदामणी ॥ ४०८ ॥ वार्ता ॥ तो पिण कँवरजी
जाग्यानहीं तरे सबलंग्या मंदिरमें गई ॥ जायने
कँवरने बाथमें भरने बेठा करलीन्हाँ पण कँवर
जी जागे नहीं ॥ जद सब लंगा काँई कहेछै ॥
सब लंगा बायक ॥ चंद्रायणाँ ॥ पारस पूज्यौ पाँ
चवार चोढ्यो नवसर हार ॥ देवल ईडौचाढ्यौ
सुदबुद राजकँवार ॥ सुदबुद राजकँवार कृपा

अब कीजिये ॥ परिहाँ हाजर ऊभी नार मोहौ
 लालीजिये ॥ ४०९ ॥ हूंआई पिवछौडके पिवसू
 तासुखपाल ॥ पपइयो पिव पिव करे उठी बदन
 में झाल ॥ उठी बदनमें झाल लिपटूं पीवसूँ परि
 हाँ देऊँजीव मिलाय पीवका जीवसूँ ॥ ४१० ॥
 आईछी लखलौलके च्पाहूँ पला उछाल ॥ क्या
 जाणूं कैसी भई सोयरया भौपाल ॥ सोयरया भौ
 पाल कअमलौ आकरा ॥ परिहाँ अनवी हुवा अ
 चेत फुलारा साथरा ॥ ४११ ॥ इसडा अमलन
 कीजिये वसमें रहेन अंग ॥ आधोचिणों अफीम
 को केचुगटी भरभंग ॥ केचुगटी भरभंग कवीं
 याँ म्हेंदिया ॥ परिहाँ वैरण हौगइरात बिछौहा त
 किया ॥ ४१२ ॥ तुज कारण म्हेंनीसरी पूजण
 पारस नाथ ॥ आईछी अध रातकी होय गयो प
 रभात ॥ होय गयो परभात कँवर नहिं जागिया ॥
 परिहाँ कूकड श्रवण अवाज नैनझड लागिया

(१५४) सुदबुद सब लंगाकीवारता ।

॥ ४१३ ॥ दोहा ॥ सब लंगाकी वनिती क्युँ न
हिं जागौ कंथ ॥ ज्युँज्युँ भीडुं बाथमें त्युँत्युँ सु
वे नचींत ॥ ४१४ ॥ वार्ता ॥ कँवरजीनें बाथमें
लेयनेंछातीसू भीडिया पण कँवरजी जाग्यानही
तरे सब लंगा कँवरजीकी पीठ सम्हाले छैरखेज
कुचकी अणियाँ पार नहिं हुयगई है ॥ चंद्रायणाँ
॥ कुच तीखा पिव पातला अणियाँ तीखी धार ॥
पीठ सम्हालूं पीवकी अणीनं हौगइ पार ॥ अणी
नहौगइ पार कांचुकी कौरसूं ॥ परिहाँ सूतीअं
ग भिडाय कमरकाजौरसूं ॥ ४१५ ॥ हूंआई
पिव छौडके पिवसूता सुखनींद ॥ रेंणव
दीती रंग बिन जाग नवछा वींद ॥ जाग नवछा
वींद बादली औसरी ॥ परिहाँ आई लूँवाँ लूँव क
झाड़ियाँ चौसरी ॥ ४१६ ॥ लाल जटा धुन बौलि
यो रेंण गलंती दीठ राज कँवर जाग्या नहीं ऊठी
ब्रहे अँगीठ ऊठी ब्रहे अँगीठ नैन झड़यूं वहै ॥

परिहाँ सावण नदियाँ पूर करा ख्या नाँरहै ॥ ४१७ ॥
 केसर काटूँ कूकड़ा क्यूँ बोल्यौ निरभाग ॥ सूती
 छी सुख सेझ में पीवगला सूँ लाग ॥ पीव गला सूँ
 लाग रही विन रंगमें ॥ परिहाँ खौई सारी रात
 पियाका संगमें ॥ ४१८ ॥ कौल बौल कूड़ाथया
 बचन बुहा सब बाहाल ॥ दाहूँमें विष घौलियो
 कीन्हों कपट कलाल कीन्हों कपट कलाल कम्हा
 रीसौ कड़ी ॥ परिहाँ किण सौकड़दी सूँक करु
 पिया रौकड़ी ॥ ४१९ ॥ आई छी उद मादसूँ
 सहज रमण पिवपास ॥ रंग रसियो जाग्यौ नहीं
 होगइ आस निरास ॥ होगइ आस निरास सुखाँ
 नहिं बौलिया ॥ परिहाँ ऊगा अमल अपार अंतर
 नहिं खौलिया ॥ ४२० ॥ परण्यौ पिववरजी मनै
 विरथा कीन्हों वाद ॥ कँवर मिलण रेकारणें हरख
 कियो उदमाद ॥ हरख कियो उदमाद मिंदरमें
 आवताँ ॥ पाछा पड़े न पाव घराँ दिस जावताँ

(१५६) सुदबुद सब लंगाकीवारता ।

आवतड़ाँ दस पैडक जाताँ कौस है ॥ परिहाँ
म्हांमें नहीं वराज कँवरमें दौसहै ॥ ४२१ ॥ रेंण
बदीती हौगई कूकड़ करी पुकारा॥दारूँ माँह दगौ
कियौ जाज्यौ नासकलाल ॥ जाज्यौ नास कला
लकपटतें क्यूँ कियौ ॥ परिहाँ ले सौकड़री सूंक
कविखड़े तें दियौ ॥ ४२२ ॥ छंदचौ झाडिया ॥
आई मत्त कुमत्तक विड लौम्हे दियौ ॥ जाज्यौ बै
रणरात विछोंबो तें कियौ ॥ आईनींद अपार
अमलका तारमें॥सौय रह्या भौपाल आज इण बार
में ॥ ४२३ ॥ सौयरया भौपाल अमल्लाँ आकरा
जागौ राजकँवार कमदकीछाकरा ॥गल विचन
वसर हारक जंजर बाजनाँ ॥ दई विछौँवा दिया
मिल्या तोहिसाझना ॥४२४॥दोहा॥ एसा नसान
कीजिये; जैसा अंधा धुँध ॥ घरका जाणें मरगया
आपकरै आनंद ॥ ४२५ ॥ बार्ता ॥ इण तरह
सबलंगा विलाप करनें विचारकीयौके अठे कोई

साय दीसहनाण करचौ चाहीजे ॥ नहिंतौ कँवर
जागसीजिराँ मनं झूटी जाणसी॥केवचन दियौऔर
नार आई नहीं ॥ इसीविचारकरनें सबलंग्या अठी
उठी देखै तौयेक पीपलकी डाहली ऊपर, सूवटौ
वेठौछै तरे उणांने दोहो कहैछै ॥ सबलंगा वायक
चंद्रायणाँ ॥ सूवा सूवा सूवटा चूंच मठाऊंहीर ॥
धण मुखपिव जाग्या नहीं ॥ साख भरी म्हारावीर
साखभरी म्हारावीर मिनख नहिंऔरहै ॥ परिहाँ
किणसुँ कहूँ संदेस परेवा मौरहै ॥ ४२६॥ वार्ता ॥
सूवटौ सबलंगाका वचन सुणनें मनमें सोच
कियौ देखौ इणतौ मनं भाई कहनेसंदेसों देवण
रीकही अवेहू संदेसौ वहनरो किस तरहसूंकहूँ तरे
सूवटौ सबलंगाने पाछो जवावदेवेछै ॥ सूवावायक
॥ चंद्रायणाँ ॥ सुण आँवा सुण आमली सुण
दाडम सुण दाख॥वेनडतौ जारीकरै वीर भरै किम
साख वीरभरै किम साखक बौल्याँ पापहै ॥ परिहाँ

(१५८) सुदबुद सब लंगाकीवारता ।

करेकौन बकवाद अठे चुपचापहै ॥ ४२७ ॥
॥ सबलंगा बायक ॥ सूवा सूवा सूबटा नेवर पग
थारेह ॥ धणसूं पिवजाग्या नहीं देवर साखभरेह
देवर साख भरेह कसुखकर जीवनें ॥ परिहाँ संदेसौ
सुख मालक प्यारा पीवनें ॥ ४२८ ॥ वार्ता ॥
इतरी वात सुवाने कही फेरमनमें विचार कीयौके
योतो ज्यानवरछै जाणूंहुं संदेसो तो जरूरदेसी ॥
पिण काई कसहनाण म्हारा हातकोबी करदेवणों
चहीजै ॥ तरे आपका आंखमें काजल आँसुवा सूं
घु लरयोछौ जिणरीतो स्याही करीने आपरा हा-
तरी आँगलीकी कलम करने कँवररे हात ऊपर
दोहौ लिखैछै ॥ सबलंगा वायक ॥ चंद्रायणाँ ॥
मिसि अंजन अँगुली कलम दसखत लिखदूं हात
सबलंगा हाजर हुई लिखी करमकी बात ॥ लिखी
करमकी बात कझीणीं औलियाँ ॥ परिहाँ ऊभी
झुरगइनार मिंदरकी पौलियाँ ॥ ४२९ ॥ जोगीहो

ज्यो बालमाँ कीज्यौ भगवाँ भेस ॥ पारानगर
 पधार ज्यौ कर ज्यौ अलख अलेस ॥ कर ज्यौ
 अलख अलेस बचनतो पाल ज्यौ ॥ परिहाँ धणमें
 औगण लाख कंथ मतिन्हालज्यौ ॥ ४३० ॥ पुरा
 घणों उण नग्रमें घर घर चंपारूख ॥ जिण वरबेग
 पधारज्यौ नारेलाँ का रूख ॥ नारे लाँकारूख भूल
 मतिजाव ज्यौ परिहाँ दीज्यौ वचन निभायक बे-
 गा आवज्यौ ॥ ४३१ ॥ पीव विछोई कामणीनेण
 लगावे डाम ॥ देह विछेवा जद मिटे राजी हौसी
 राम ॥ राजी हौसी राम विरद दिसजोवसी ॥ परि-
 हाँ प्यारी तणों मिलाप पीवसूं होवसी ॥ ४३२ ॥
 वार्ता ॥ कँवरजीरा हात ऊपरयो दोहो लिखनै
 सबलंगा मंदिरमेंसुं पाछी घरों दिस विदा हुई
 सूनिसासा न्हांखती थकीनें बागाँमें चकवाचक
 वीरी बातसुणीछी तिकी यादकरती थकी डिगती
 डौरती पाछी सहरमें आवेछै पगअगाडी धरेछै

(१६०) सुदबुद सब लंगाकीवारता ।

पणपाछा पाछा पडेछै ॥ इतराकमें सुनार कोझ
रोखौ आयो जठे सुनारी काँई पूछेछै ॥ सुनारी
वायक ॥ चंद्रायणाँ ॥ सालू सलवटनाँ पडचा नथ
बलपडचौ न कौय ॥ सोनण पूछे सायधण जौवन
लुटचौ न तोय ॥ जौवन लुटचौ न तोय कहो किण
कारणें परिहाँ पीतम मिल्याकनाँह रह्या किमबा
रणें ॥ ४३३ ॥ छंदचौझडिया ॥ मौती सीपलि-
लाड उसी पर मंडिया ॥ कंचू बंध सुबंधकिअहर
न खंडिया ॥ कुसुम सुपरमल सीस मत्तकौ ऊटिया
केहरके मुख माँस किसी विध छूटिया ॥ ४३४ ॥
॥ बातौ ॥ इतरी बात सुनारीकी सुँणनें सबलंग्या
ऊभी रहकर पाछो जुवाब देवेछै ॥ छंद चौझडि-
या ॥ सखि सौला सिणगार सइचा पिवकारणें ॥
नेणाँ बाँण चढायचली पिव बारणें ॥ हूँ हुयबाध
णरूप कायरको लूटिया ॥ केहरके मुखमाँस इसी
विध छूटिया ॥ थक्यौ सूरकौ रूप पेजकर चंपि-

या ॥ रह्यानसे भरपूर नूर नहिं झंपिया ॥ ४३५ ॥
 चंद्रायणाँ ॥ सखियेक सज्जन म्हें कियो जैसोचंद्र
 अकास ॥ सिरवदनामी मौलगी फल विन बेठाँ
 पास ॥ फल विन बेठाँ पास जगत सब जाणसी ॥
 परिहाँ कुलनें लागे दाग भरम सब आणसी ॥ ४३६ ॥
 मिल विछड्या विछड्या २ मिल्या रिल मिल
 काढी रात ॥ साजन सुखाँन बौलिया लिखी करम
 की बात ॥ लिखी करमकी बात विधाताई सरी ॥
 परिहाँ आलभौलके माँय रात सबनी सरी ॥ ४३७ ॥
 ॥ वार्ता ॥ सवलंगा पाछी महलाँ दाखल हुई ॥
 बड़ी फजर जाँननें सीखहौवा लागी जद सावलंगा
 की आँखमें आँसू आया जराँ भाभी काँई दोहो
 कहेछैनें सवलंगा काँई सुणैछै ॥ भाभी वायक ॥
 छंदचौझडिया ॥ सोनौ रूपौ दत्तदायजो म्हेदि-
 थो ॥ हीरा मौतीलाल माँग मुखथे लियो ॥ रंभा
 राज कँवार सुवड वरपाइयो ॥ नणदल नैणाँ नीर

(१६२) सुदबुद सब लंगाकीवारता ।

किसी विध आइयौ ॥ ४३८ ॥ सबलंगाबायक ॥
व्याकुल चित्त बदन जिसेके कारणें ॥ लौकजाणें
रौवती चले बारणें ॥ मनमें धोखौ रयौ कँवरनहिं
माँणियों ॥ लिख्यौ विधातालेख लेचल्यो बाँणियों
४३९ ॥ वार्ता ॥ इतराकमें येक सखी सबलंगारे कान
में आयनें बोली ॥ सखिबायक ॥ कवित्त ॥ सासरके
चलतेहि विलौकत देखतही अँखियाँ भरआई ॥ जान
तही जिवकी जुसखीतिन काँनमें बातकेयूँ समुझाई
जातिहे जहाँ तहाँ अब सुंदरसूनें मिंद्रघणी उमराही
काहेकों सौचविचार करो सबलंग्या चाहे जासुँ
मौज कराँहीं ॥ ४४० ॥ वार्ता ॥ जब सब लंग्या
रथमें बैठकर विदा होवालागी जितरा कमें
अठि कँवरजीनें नसारो उतार आयो ॥ और पस
वाड़ो फेरियो तरे सूवोकाँई कहै छै ॥ सूवाबायक ॥
॥ चंद्रायणाँ ॥ अरे मुसाफर जागरे सूतौ किमैं
निंसक ॥ तुज कारण धणरुदन कर लिपटी भर

भर अंक ॥ लिपटी भर भर अंक नींद अति
 आइयाँ ॥ पलपल मदन जगायक तौ हिज गाइयाँ ॥
 आखर गई निरास अवे तौ चेतरे ॥ परिहाँ कर
 दोहो लिख नारक अरथ समेतरे ॥ ४४१ ॥ पोहो
 पाटी पगड़ो हुवौ पंथी लागा पंथ ॥ तूँ काँई सू
 तो नींदमें मद छकियो महमंत ॥ मदछ कियो मह
 मंत सिंघ्व ज्युं घौरतौ ॥ परिहाँ जाँण भुजँग बल
 खायक आलस मौड़तौ ॥ ४४२ ॥ वार्ता ॥ तरे
 कँवरजी सावचेत हुवा जद सूवे कँवरजीनें घणीं ॥
 नानत दीवी ॥ अवे कँवरजी आँख्याँ मसलताथका
 चक चूंदी छायोड़ा उवासियाँ लेता पड़ता आख
 डता ऊठिया ॥ नैं मनमें पिसतावा करनें सूवानैं
 पूछवा लागा ॥ उठी वरात विदाहुई सूमारग चाले
 छे और सब लंगा विलाप करे छे नैं घड़ी घड़ीमें
 आँसू भरे छै अठी कँवरजी सूवानैं सँ देसौ पूछेछै
 नैं सूवो पाछो काँई जुवाव देवे छै ॥ कँवर वायक

(१६४) सुदबुद सब लंगाकीवारता ।

चंद्रायणाँ॥तूँ छे भाई धरमकौ सूवा चतुर सुजाँण ॥
पारस पूजण कारणे किसी पुजारी आँण ॥ किसी
पुजारी आँण क कजरौ देगई ॥ परिहाँ हिवडे हात
लगाय कलेजौ लेगई ॥ ४४३ ॥ सूवा वायक ॥
सुण सुदबुद सूवो कहै धण मुख मीठा वैण ॥ गई
निसासा न्हाँखती चौसर झड़िया नैण ॥ चौसर
झड़िया नैण प्रेम सूँ छकिया ॥ परिहाँ रह्या परू-
स्याथाल जीभ नहिं चखिव्या ॥ ४४४ ॥ कँवर
वायक॥सुँण सूवा सुदबुद कहै अब मुजभे दभताय
उडँऊँ चौचढदेखजे धणकिण मारगजाय॥धणकिण
मारगजाय कपंथ भतावजे ॥ परिहाँ, ऊँचौ चढ
आकास खवरतौ ल्यावजे॥ ४४५॥ सूवा वायक॥
सुण सुदबुद सूवो कहै, दूरी गई बरात॥रथविचरू
पासाहकै सबलंगाछै साथ ॥ सबलंगाछै साथ,
निसासा न्हाँखती ॥ परिहाँ चलताँ मिलणन होय
कँवर दिस झाँकती ॥ ४४६ ॥ दोहा ॥ सूवा

मुख संदेसडौ, सुणकर कँवर सुजाँण वँधे बचनरी
 डौरकिय पारानगर पर्याँण ॥ ४४७ ॥
 ॥ वार्ता ॥ कँवरजी पारसनाथजीरा मदरमेंसू
 चाल्यासू पड़ता आखडतानें डिगता डौलता
 आपरा जनानाँ महलाँ नीचे आयनें ऊभारया तरे
 कँवराणीजी काँई दोहो कहैछै ॥ कँवराणी वायक
 दोहा, रुतवसंत आई नहीं, अरुकाँई खेलया फग्ग
 अरजकराँ छाँ कँवरजी, केसर रचियौ अंगा४४८।
 ॥ छंद चौझड़ियाँ ॥ बिनतागे गल हार कंथ कहाँ
 पेहेरियो ॥ नैणाभरव्यौ तँवौल, अंजन कहाँ हेरियो
 रामिया सारी रैण पराई गौरियाँ ॥ दीजे मोहिवताय
 कँवरजी चौरियाँ ॥ ४४९ ॥ कँवर वायक कयौन
 माँनौ नार कहाँ कियकीजियो ॥ साँझे गया कलाल
 तिहाँ मदपीजिये ॥ लेयकलालण पूत कम्हे हुल
 रावियो ॥ तिहाँ विलगौ हार कहे समझावियो ॥
 ४५० ॥ कँवराणी वायक ॥ रहोरहो कंथ अघाण

(१६६) सुदबुद सब लंगाकीवारता ।

असत क्यूं भाखियै ॥ रे पतिहूंतन कंथक उत्तर
दाखिये ॥ जहाँथे रमिया रातक दीठागौरियाँ ॥
पाछेबोलो झूटकरौ क्यूं चौरियाँ, ॥ ४५१ ॥
कँवर वायक ॥ रहोरहो गहलीनार गहेसा मत करौ
फेरकहाँगा बात तोलाजाँ नाँमरौ ॥ अपणें हाथों
नार जंघनाँ उघाडिये ॥ नागोदेख सरिर
चित्त नहिं ताडिये ॥ ४५२ ॥ कँवराणी वायक ॥
पीतम हमकूँ छौड अवरसूं क्यूं करो ॥ मनमाँहैं उद
माद कछयली साँभरौ ॥ वहाँकी वेदनहौय यहाँभी
आखिये रोटेमीठीकोरपराई चाखिये ॥ ४५३ ॥ वार्ता
तरे कँवरजी सिसकारौ न्हाँखनें कहैछै कँवराणीजी
सावकाँई कहूं ॥ मनकी बात मनमेंहीं राखणी
ठीकहै कह्याँसूं आपकी हसी करणी आपकेही
हात हुवेहै ॥ तरे कँवराणी जी हात जौडनें अरज
करी प्रथीनाथ म्हानें तौ मनकी सारी बात कहणी
चहीजै ॥ कँवरजी वायक ॥ उसकी तौ बदनामी

त्रिया मेरे सिरचडी ॥ झूटीथी सौ बात कसाची
 हुयपडी ॥ नैणनच ख्याप्रेमक नाँ मन लज्जिया
 ॥ कंसा वज्जन वज्जरण का वज्जिया ॥ ४५४ ॥
 कँवराणीं बायक ॥ बैस्या होय सरूप तौ नेहनकी
 जिये ॥ परणी होय कुरूपतो छेहनदीजिये ॥
 बैस्या साप सुनार कदुरदुर बंचिये ॥ पथ्थरद
 वियौ हात कलासूँ खंचिये ॥ ४५५ ॥ वार्ता ॥
 कँवराणीजी के और कँवरजीके आपसमें बातों
 होरही छी इत राकमें सब लंगा याद आई तरे
 चनणियाँ खवासनें कही के सब लंगाविदा हुई के
 अठई छै सूखवर लपावौ ॥ तरे चनणियो सेठजीरी
 हवेली नीचे आयौ आगे सब लंगारी भांभी झरो
 खामें खडी छी जराँ चनणियाँनै देखनें काई दोहो
 कहे छै ॥ छंद चौझाडिया ॥ चौवारा दोयच्याइ
 कमेडी काचकी ॥ सभरचो चुडलौ हातक फूँदी
 पाटकी ॥ कोयल कंठ लगाय खडीथी आसरे ॥

(१६८) सुदबुद सब लंगाकीवारता ।

सायधण अठेन आज सिधारचा सासरे ॥ ४५६ ॥
कानकडी गलहार झवाझब मौतिया ॥ डौडी
वंगडी हातक पहरण धौतियाँ ॥ कोयल जैसो
कंठक टुकियेक भासरे ॥ सो सुंदरइण गामन
चालीसा सरे ॥ ४५७ ॥ वार्ता ॥ सब लंगाकी
भाभीकह्यो बेतो विदा हो गया जद खवास पाछो
आयने कँवरजीने खवर दीन्हीं ॥ जब कँवरजी सारो
राज पाट रणवास छौडनेमनमें विलापकरताथका
अकेलाही पारा नग रीने विदा हुवा ॥

इति सुदबुद सब लंगाकी वार्ता मंदिरमें कँवरा
के और सब लंगाके दोयवार मिलाप हुयने
विछड न वर्णन सहाशिवकरण रामरतन
दरक माहेश्वरी मारवाडी मूंडवा
वालाकृत नवम प्रकाश ॥९॥

॥ अथ सुदबुद सबलंगाकी वार्ता दशमप्रकाश प्रारंभ ॥

वार्ता॥ अठे तो कँवरजी मनमें विलापकरता हुवा
 डिगता डौलता अकेलाही पारानगरीनें विदा हुवा छै
 अठी सबलंगा जानकी साथे विदा हुई छै जठे साथ
 एयाँ पुगायकर मिझल्या गावती थकी सबलंगाने
 रथमें बैठायनें रूपासाहरी साथे खाने करी और
 आप पाछी आप आपरे घराने बहीर हुई सारी
 साथ एयाँ सबलंगारी औलूरी वार्ता करे छै ॥ अ-
 ठी सबलंगारे पिण वहीर हुवताँ कँवरसूँ विलाप
 हुवा नहीं सू मनमें विलापकरे छै ॥ नेघडी घडीमें
 आँखियाँ भरे छै (छंद चौझडिया) सबलंगा हुय
 विदा रथमें बैठियाँ ॥ भरभर आवे नेण कँवर
 मन अँठियाँ ॥ जाणें बंधीवान निसाना न्हाँखिया
 प्यारा पीतम सेण प्रेम नहिं चाखिया ॥ ४५८ ॥
 वार्ता सबलंगा विदा होयकर मारग चाले छै कौस
 वाराकी मजल हुई जायकर डेरा वागमै हुवा ॥

(१७०) सुदबुद सब लंगाकीवारता ।

सबलंगा रथसूं उतरनें विछायत पर बैठी ॥ इत-
राकमें बागवानरी लडकी चौसर गजरा छडियाँ
पंखा गूथल्याईनें सबलंगारे पास आयनें छाव नि
जर करी ॥ तरे सबलंगा मालीकी लडकीनें काँई
कहेछै ॥ सबलंगा बायक ॥ दोहा ॥ पाँच मोहोर
दी छावडी कह सबलंगा बात ॥ सुदबुद कँवर
पधारसी कागद दीज्यौ हाथ ॥ ४५९ ॥ सिद्धसि-
री सुभ औपमाँ कँवर सिरौमण स्याम ॥ पारान-
गर पधारज्यौ करज्यौ पूरणकाम ॥ ४६० ॥ नुग
णाँ तौही आपणाँ सज्जन जाणाँ राज ॥ प्रीत भली
परपाल ज्यौ बाँह गहेकी लाज ॥ ४६१ ॥ तुमही
सज्जन मित तुम पीतम तुमपरवाँण ॥ हिवडाभी
तर तुमबसौ भावेजाँण न जाँण ॥ ४६२ ॥ हंस
वर्णी मनमें रही क्यूँहीं पड़ी न पार ॥ केजाणे
मन माँहरौ केजाणे करतार ॥ ४६३ ॥ वर्णी महर
करज्यौ सदा मती विसारौ चित्त ॥ मौँसरखी

लख थाँहरै म्हारै तुमही मित्त ॥ ४६४ ॥
 ॥ मेलो तो लिखियौ हुसी हूँ जाणूं निरधार ॥
 म्हारौ मनतोमें बसे येम कहूँ सौवार ॥ ४६५ ॥
 कागद लिखपूरौ कियौ संदेसौज नरेस ॥ पहल
 हथेली लिख दियो आसन पूरी जेस ॥ ४६६ ॥
 वार्ता ॥ सब लंगा मालीकी लड़कीनें छावड़ी कीनौ
 छावर मोहोर पांच देयनें कयौ अठे सुदबुद कँवर
 पधारसी जिणनें योकागद दीजो और मुख वचनाँ
 कहज्यौ पारानगर जलदी पधारै ॥ इतराकमें
 बरात पाछी खाने हुई ॥ सू कौस वारा ऊपर
 फेर मुकाम हुवौ जठे पिण कागद लिखनें बन
 मालनके हात दीनों ॥ यूँ मुकाम मुकाम सू कागद
 देती थकी नें कँवरजीनें उडीकती थकी सब लंगा
 पारा नगर पहुंची ॥ अठी कँवरजी पिणलारे कालारे
 पारा नगर पधारै छै उठी सब लंगानें रूपसी कँवर
 महलाँ दाखल हुवा ॥ रूपसी कँवर बौल्या पधारौ

(१७२) सुदबुद सब लंगाकीवारता ।

चौपड़ खेलौं ॥ जरां सब लंगा कही म्हारे पारस
नाथजीरी जात बोली छीतिकी मानीजी नहीं सू
अठे मिंदर और नवो महल चिणा बौजद जात
देऊं पछे नवा महलमें आपरेनें म्हारे बात चीत
हौसी तरे रूपासाह कही मंदरनें महल तयार हो-
बोकरसी बातौं चीताँ तौ कराँ जद सब लंगा
कही म्हारे तौ जात दियाँ पहली पुरस सू सपरस
हौवणों तो कठे पण बात करण कोही त्याग है ॥
तरे रूपा साह जाण्यौंके तिरिया हट है जाण्यौं
नवो महलनें मिंदर तयार हौवतां कांई दिन लागसी
॥ जद रूपा साह नवा महल और मंदरकी नीवे
दिराई ॥ अठी कँवरजी पिण पारा नगरीनें विदा
हुवाईछा सू आगे वनमालीकी लडकी वणराय
सींचरही छै ॥ तरे उणांनें कँवरजी कांई दोहो कहै
छ ॥ कँवरजी वायक ॥ चंद्रायणाँ ॥ वनमाली कीडी
करी सींचतहै वणराय ॥ इण मारग धण नीसरी

हसे कि रौवतजाय ॥ हसे कि रौवत जाय हगी
 गत कीजिये ॥ परिहां जास्याँ पारा नगर संदेसौ
 दीजिये ॥ ४६७ ॥ वन मालन वायक ॥ हसे तो जौबनि
 यों चुवे रौवतो काजल जाय ॥ टौलां विछड़ी मिरघ
 णीं फिर फिर झांकत जाय ॥ फिरफिर झांकत
 जाय कटौलां बीसरी ॥ परिहाँ, गई निसासा न्हांख
 अठासूँ नीसरी ॥ ४६८ ॥ कँवरजी वायक ॥ टौला
 विछड्या मिरघका मिरघीदेगइपूट ॥ दइव मिलावे
 तौमिलाँ प्राँण जावसीछूट ॥ प्राँण जावसी छूट
 जरासी बातहै ॥ परिहाँ देसी नारमिलाय, हरीके
 हातहै, ॥ ४६९ ॥ वनमालन वायक ॥ सरवरियो
 सूलक्षणों ज्याँरी ऊँची पाल, देखी आँसूधौवती गई
 निसासा राल गई निसासा राल कडुसक्याखावती
 परिहाँ साथणियाँदे सीखक मिझल्यौ गावती
 ॥ ४७० ॥ कँवरजी वायक ॥ तैं धणदेखी
 रौवती कियानम्हानूं चीत ॥ पीट फिरचाँसूँपारखी

(१७४) सुदबुद सब लंगाकीबारता ।

याही जगतकी रीत ॥ याही जगतकीरिति प्रीति
संसारकी परिहाँ देवेपलक भर पीठ नारहै पारकी
॥ ४७१ ॥ वार्ता ॥ तरेवन मालन हसकर पाछौ काँई
कहैछै ॥ वनमालन वायक ॥ चंद्रायणौ ॥ कँवर आप
मतजाणज्यौ वाण्यासूं घरवास ॥ पिंजररथमेंमेलियौ
जीव तुमारे पास, जीव तुमारेपास मनापिसतावती ॥
परिहाँ झुरझुर पिंजरहोय मिलणचित्त चावती ॥
॥ ४७२ ॥ कँवर वायक ॥ वचन दियौछौ मिलण
कौ प्यारी वागाँ माँय ॥ कौल बौलसब वीसरी
कागद दीन्हौ नाय कागद दीन्हौ नाँय मनाँमें
वातहै ॥ परिहाँ मुखमीठी मनुहार कपटकी वातहै
॥ ४७३ ॥ वार्ता ॥ तरे वनमालन सबलंगारे हात
रौ कागद कँवरनें देवैछै और मुख वचना समा-
चार केवैछै वनमालन वायक ॥ चंद्रायणौ ॥ यौ
कागद ल्यौ कँवरजी सायधण दीन्हौमाँय ॥ मुख
वचनाँ यूँकह गई तुरत बुलायातोय तुरत बुलाया

तोय कवेगा जावज्यौ ॥ परिहाँ ऊभीजौवे बाट देर
 मत ल्यावज्यौ ॥ ४७४ ॥ वार्ता ॥ इतनी
 सुँणने कँवरजी आगे रवाने हुवा तरे गेलारतूने
 गेलौ पूछेछै ॥ कँवरवायक ॥ दोहा ॥ पंथी
 पारानगरकौ दीजे पंथ भताय ॥ इणमारग
 प्यारी गई हसै करौवत जाय ॥ ४७५ ॥ पंथीवा-
 यक ॥ सुधौ पारानगरकौ मारग राज कँवार ॥
 तुरत बुलाया कामणीं कीज्यौ मती अँवार ॥
 ४७६ ॥ वार्ता ॥ कँवरजी आगे गया इतराकमें
 पाणीं रीतिसलागी ॥ और सरवर पिण नजीक
 आय गयो ॥ तरे सरवरकीतीराँ जायने पाणी पीव
 णवासते हातदेखियो तौ आगे हातरी हथेलीमें
 दोहो लिख्यौछै तरे दोहो वाचने मनमें विचारकरे
 छै ॥ और पाणीं पीवणरो पिण ध्यानधरेछै ॥ ने
 प्यारीरे हातरा दसकत नहीं धौवणौ इस्यौ विचार
 करने दोहो कहैछै ॥ कँवरवायक ॥ चंद्रायणौ ॥

(१७६) सुदबुद सब लंगाकीवारता ।

कागद लिख गइहातमें किस विध पीवाँनीर धौव
तडाँ धीरज नहीं पिंजर ब्यापी पीर ॥ पिंजर ब्या
पी पीर कपाती प्रेमकी ॥ परिहाँ दिनमें सौसौवार
जपूँ नित नेमकी ॥ ४७७ ॥ वारता ॥ कँवरजी
हातरी हथेलीरो दोहोतो लिखियो सावत राख्यौ
नैँ मूँढासूँ झुखकर पाणीं पीवणनैँ लागा ॥ उण
समामैँ सात सहेलियाँरे झूलरे झूमाँ मालण पाणीं
भरणनैँ पेली तीर ऊपर आई ॥ तरे कँवरजीनें
मूँढासूँझुकने पाणीं पीवताँ देखकर अकसखी बौ-
ली ॥ सखिवायक ॥ दोहा ॥ देख्यौ येक अचंबडौ
सरवर पेली तीर ॥ मिरघाज्युँ पाणीं पिवे हातन
झेले नीर ॥ ४७८ ॥ दूजी सखीवायक ॥ कर मौ-
डेकडियाँ ग्रहे पंथी काय अवथ्य ॥ पाणीं पीवे
वहलज्युँ मौड अफूटा हथ्य ॥ ४७९ ॥ पाणींपिवे
पवंगज्युँ इणनर किसी अवथ्य ॥ हूँ तोयपूछूँ हेसखी
नीरन झेले हथ्य ॥ ४८० ॥ चंगामारू हेसही

पाणीं पिवेकुडंग ॥ करराखे मुख भीजवे काँईक
 ऊलूअंग ॥ ४८१ ॥ बहलपवंगज्यूँ जल पिये नहीं
 भिजौवतहथ्य कहो झूमाँकारण किस्सुँ इणरो साच
 अरथ्य ॥ ४८२ ॥ झूमाँमालनवायक चंद्रायणाँछंद
 ॥ नेहवाँध्यौ परनारसुं चलण कियो थौ सथ्य ॥
 वारोई इण पूँछियौ काजल लागौ हथ्य ॥ काजल
 लागौ हथ्य देख जिव जावतौ ॥ सुणौं सखी येक
 बात कनेण दिखावतौ ॥ प्यारीको सहनाँणक ली
 यां जावतौ ॥ परिहां हौकर मनां उदास क चित्त
 डुलावतौ ॥ ४८३ ॥ वार्ता ॥ इतरी बात झूमा
 मालणकी सुणनें चतुर चंपक नाम सखी बोली
 ॥ दोहा ॥ प्रति करी परनारसंग चलणकौल कियो
 सथ्य ॥ धण आई नहिं जागियौ ॥ दोहो लिखियौ
 हथ्य ॥ ४८४ ॥ वार्ता ॥ तरे येक सखी कंवरनें
 दोहो कहे छै ॥ सखि वायक ॥ दोहा ॥ पाणी
 झौल झकौल पी काजल देह बुहाय ॥ तो सुग

(१७८) सुदबुद सब लंगाकीवारता ।

णामैं गुणहूसी फेर मिलेगी आय ॥ ४८५ ॥ येक
सहेली यूं कंहे सुणज्यौराज कँवार ॥ अरज करूं
करजौड़के आप पुरषम्हे नार ॥ ४८६ ॥ वार्ता ॥
सखियाँकी बातसुणनें कँवरजी पाछौ दोहो कहेछै
कँवरवायक ॥ दोहा ॥ सबलंगा सिर सेवरौ दूजी
पगपेजार ॥ उण विन और न आदराँ राम उतारे
पार ॥ ४८७ ॥ झुमाँ मालन वायक ॥ किण अह-
नाणाँ असतरी सबलंगा गुण रूप ॥ छँदगालीछल
बल कियो छलकरमोह्यौ भूप ॥ ४८८ ॥ कँवर
वायक ॥ छल नहिं जाँणे सुंदरी कल नहिं कीन्हीं
कौय ॥ उणसम और न औपमाँ; किणसम दाखूँ
तौय ॥ ॥ ४८९ ॥ सखियाँ वायक ॥ इसड़ी काँई
औपमाँ किसड़ी चतुर सुजाँण ॥ साच भतावौकँ-
वरजी राज गलारी आँण ॥ ४९० ॥ कँवर वायक
चित्र विचित्राँ पदमणीं पनामौरसी पंख ॥ सुख
नासामृध लौचनी जाँण परेवा लंक ॥ ४९१ ॥

जंघरंभका खंभसी प्यारी सुघटे घाट ॥ बाँह्याँवे
लण बेलियाँ नाजुक निपट निराटा ॥ ४९२ ॥ काहा
रूपकौ बरणिये नेहन दूजी ठौर ॥ हित चित्त येम
मिलावियो दायंन आवे और ॥ ४९३ ॥ वार्ता ॥
इसी औपमाँ सुणनें झूमाँ मालण कँवरजी नें
पाछौ दोहो कहनें नानत देवेछै के हे कँवरउण
नारका जौवनकौ रस कस तौ सारौ तें लेलियोनें
अवे फेर क्यूँ झुरेछै ॥ झूमाँमालणबायक ॥ दोहा
आभौटपके रसचुवे म्हें जाणूँ गुलनार ॥ रसक
ससारौ तेलियो अब क्यूँ झुरै गिंवार ॥ ४९४ ॥
वार्ता ॥ झूमाँ मालणकेनें कँवर सुदबुदरे आपस
में बात बत लावण हुई नें अवे कवरजी आगे चा-
लिया सूमजलाँ दरमजलाँ प्यारीको सँदेसौ पूछ
ताथका पारानगर पहुँथा आगे नवलखा बागमें
जायनें उतरिया ॥ तिको बाग किस्यौहेकछै के
जिणरी औपमाँ तो देख्याँ हीजवणआवे ॥ जिणवा

(१८०) सुदबुद सब लंगाकीबारता ।

गमे बाग वान मालन तिकी पिण रूपरी रंभाने
गुणारी खान देहरी सुखमालने चातुरीमें घणी सु-
जाण तिकीवन मालण कँवरजीने देखकर मोहित
हौगईने सेवराहार फूल छडियाँ गूँथकर कँवरजीरे
निजर गुदराई तरे कँवरजी पांच मोहोरनौछावर
की दीन्हों ॥ अवे बनमालण कँवरजीरी हाजरीमें
हाजररहेछै ॥ नेंसारी सरभरारी तयारी कर रसौ
बडौ करावण री कहेछै ॥ प्रथीनाथ आप तौ रसौ
वड़े काँसौ आरौगने सुख फरमावे नें मने हुकमहौ
यसू म्हे गेद गजराम्हारे सेठरे लाडवहू कँवराणी
जी आयाछै जिणवासते तयार करूँ ॥ तरे कँवरजी
पूछियौ केहारं गेंदगजरा किण वासते तयार करो
छौनें किस्या सहूकाररे वरे लेजावसौ ॥ जरावन
माली की लड़की बौली ॥ रूपसी कँवरके कँव-
राणी सबलंगा नाम जिणारे पोहोंचसी ॥ नें गेंद
गजरा हारफूल रौजीनाँ पडुचेछै ॥ तरे कँवरजी

कयो आजल्यावो म्हे गूथाँ ॥ जद कँवरजी गूथ
 वालागा ॥ नेंगजरामे पूस्व पल्ली करने कागद लि
 ख्यौके म्हे बागमें आयाछाँ ॥ अबे मालन हारसे
 वरागजरालेयनें सबलंगके पास आई ॥ तरे सब
 ग्यादेखकर मालीकी लड़कीनें काई दोहो कहेछै
 ॥ सबलगावायक ॥ दोहा ॥ मालीकी तूँडी
 करी सुणजे बैणसमाज ॥ थारा गूथ्या यह नहीं
 औरहिं गूथ्याँ आज ॥ ४९५ ॥ वन मालन वायक ॥
 छंद चौझड़िया ॥ विचविच चंपौकली गुलाब
 सुरंग है ॥ भावज म्हारी गूथ्या नाजुक अंगहै ॥
 सुंदर बहुत स्वरूपक नैन कटारियां ॥ चंचल
 चतुर सुजाणक फुलड़ी पाड़ियां ॥ यह म्हेंल्याई
 आजक चौसर लीजिये ॥ रोझ मौज बखसीस
 खुसी हुय दीजिये ॥ ४९६ ॥ वार्ता ॥ वन माल
 नकी बात सुणनें सब लंगा वणींराजी हुईनें ५ असर
 फियां इनामकी दीनीं ॥ और कह्योके गजरा गूथण

(१८२) सुदबुद सब लंगाकीवारता ।

हार छै जिणनें सौरा सुखी राखजे ॥ इणकनाँसूं
गजरा फेर गुंथायवौ करजे ॥ थारे इनामकी कुमी
नाहिं राखूँ ॥ इतरी भोलावण देयनें बागवानकी
लड़कीनें पाछी विदाकरी ॥ तरे वन मालण राजी
कुसी हसती खेलती आई ॥ जद कँवरजी पूछियौ
केआज तौ हसौ घणाँसौ कारण काँई ॥ जराँ माली
की बेटी बौली कँवर साब आपरा प्रताप सूं इनाम
पायौ ॥ तरे कँवरजी कह्यो फेर गूँथ देस्यौ जरा
कही ठीक छै ॥ इतराकमें रात हुई तरे वन मालन
फूलाँरी सहज तयार करनें कँवरजीसँ अरज गुद
राईके प्रथीनाथ सुख फरमावें ॥ और पगचंपी में
दासी हाजर है ॥ तरे कँवरजी पाछो काँई जुवाव
दीयौ नहीं क्यूँके वहतो जत सतरा राखणवाला
छा और प्रीतका भूखा छा ॥ फेर दूजो दिन हुवो
तरे गजरा गुंथावणरे मिस सबलंगा सुजाण रायनें

बागामें मेली तरे सुजाण राय गजरा हार सेवरारि
 मिस कँवरजी सूं बागमें आय मिली ॥ कँवरजी
 फेर गजरा सेवरा गूथ कर अंकपल्लीमें मिलणरा
 दोहा लिखकर मालणनें दीया ॥ तरे बनमालण
 गजरा लेयकर सबलंगारे महलाँ गई ॥ नफेर
 कयो म्हारी भावज गूथिया छै ॥ जराँ कयो काले
 थारी भावजनें लेती आवजे ॥ तरे बन मालण
 पाछी आई ॥ जद कँवरजी पूछियो कहो काँई बात
 चींत हुई ॥ तरे मालीकी बेटी बौली कँवरजी
 साव काँई कहूं म्हारामें तो बडी मौटी कुवद
 हुई ॥ जद कँवरजी कयौ, काँई कुवद हुई ॥
 तरे बनमालीकी बेटी बौली, कँवरजी साव, म्हैतो
 आपको नांवतो नहीं लीयौ ॥ और म्हारी भावजरे
 हातरा गूथियौड़ा गजरा हार सेवराछै इसी कही,
 जराँ, सबलंगा कुँवराणी कयौ छैकै, गूथणवालानें

(१८४) सुदबुद सब लंगाकीवारता ।

अठेल्यावजे ॥ तरेहू हेंकारौ भर आईहूँ ॥ जराँ
कँवरजी बौल्याँ कांई औरतरह छै ॥ म्हेंचालस्याँ
जराँ तीसरे दिन कँवरजी, जनानों भेष धारनें माल
णरे साथेगया ॥ और सबलंगा रे महलाँ दाखल
हुआ ॥ जराँ सबलंगाकी नणद कांई दोहोकहैछे ॥
नणद वायक ॥ दोहा ॥ पाँव मचड़कौ म्हें सुएयौ
तौसिर कितौक भार ॥ उभी रहज्ये मालणीं पूछै
राज कँवार ॥ ४९७ ॥ अेडी परखी पीठमूं कछभुज
करकौ खाय ॥ भाभी अरजी साँभलौ नारी नांहिं
दिखाय ॥ ४९८ ॥ सबलंगा वायक ॥ दोहा ॥
इसी झूटथे बौलता, इसीनदेखी कौय ॥ परतक
नारी दीखती, पुरुष कहाँसे होय ॥ ४९९ ॥ वार्ता
जद कँवरजीके औरसबलंगाके निजरमेंलोतौ हुवो
पिणबौलणों हुवौ नहीं ॥ अवे सबलंगा सनकारीकरी
के आजतोथे जावौ ॥ जराँ कँवरजी उण दिनतौ निज

रचाँ मेलो करनें पाछाआया ॥ अठा आगे निज
रचाँ मेलौ वीनहीं ॥

इति सुदबुद सब लंगाकी वार्ता पारानगर
प्रवेशवनमालण रूप धारण सावलंगा मिल
विछड़न वर्णन सहा सिक्करण रामर-
तन माहेस्वरी मारवाडी, मूंडवा
वाला कृत, दशम प्रकाश १०स०

अथ सुदबुदसवलंगाकी वारता एकादशप्रकाशप्रारंभः ॥

वार्ता ॥ अबै नवो महल औरमंदिर संपूरण
हुवणनें आयौ क्यूहींक सिखर अधूरो रचाँ और
चेजाराको काम सरूछौ जिणमें फेरकँवरजी मजू
र वणनें माथेछींतरी गाराकी लेकर, चेजा
रानें गारौ देवणरोमिस सबलंगानें दोहा कहेछै ॥
सुदबुद वायक ॥ छंद दीर्घचंद्रायणाँ ॥ इसक कि

(१८६) सुदबुद सब लंगाकीवारता ।

यौ लाखे फूलाणीं बीजा सौरठ नार ॥ सुदबुद ठौ
वे छींतरी लेचेजारा गार ॥ लेचेजारा गार इसक
भर पूरहै ॥ परिहाँ लग्यानैणदा बाँणक चकनाँचू-
रहै ॥ ५०० ॥ इसक किया लेले ओर मजनूँबीजा
सौरठ नार ॥ सिरपरढौवाँ छींतरी ले चेजारा गार
लेचेजारा गार कराँझाहीरके ॥ परिहाँ सेख क-
लंदर स्याहक मुख मल पीरके ॥ ५०१ ॥ इसक
किया लंकापत रावण इंद्र हरी परनार ॥ इसक
कियाकीचक कमला पत लेचेजारा गार ॥ लेचे
जारा गार कवाँ जब्बानसूं ॥ परिहाँ पदमण पड़-
दा माँह सुणें नहिं कानसूं ॥ ५०२ ॥ दीपकजाँत
पतंग ज्यूँ जल मछलीके प्यार ॥ सुदबुद ठौवे छीं
तरी ले चेजारा गार ॥ ले चेजारा गार गरजकी
रीतहै ॥ परिहाँ छिपरहि पड़दामाँह करे कुँणची-
तहै ॥ ५०३ ॥ मस्त परी ज्यूँ मनलग्यौ पडदे
पदमण नार ॥ इसक जहूरी जिंदवे ले चेजारा

गार ॥ ले चेजारा गार ॥ कसिरपर ठौवस्यौ
 ॥ परिहाँ कदेइक नाजुक नार निजर भरजौवस्यौ
 ॥ ५०४ ॥ झुरझुर कर पिंजर हुवा देखे सब संसार
 राज कँवर सिर छींतरी लेचेजारा गार ॥ लेचेजा
 रागार ॥ इस्यौ दिन हौवसी ॥ परिहाँ राजी हौसी
 राम निजर भर जौवसी ॥ ५०५ ॥ पढता येकण
 पाटड़ी रमता राज कँवार ॥ मिलबाका साँसापडचा
 लेचेजारा गार ॥ लेचेजारा गार कौल कियो रात
 डी परिहाँ लौटे गाल्यौ लूण कभूली बातडी ॥
 ५०६ ॥ इसक मोहौ बतमन लग्यौ पिंजर पीरअ-
 पार ॥ हेला देदेहारिया ले चेजारा गार ॥ लेचेजा
 रागार पुकारुं जौरसूं ॥ परिहाँ बैठी पड़दामाँहसु-
 नैं नहिं सौरसूं ॥ ५०७ सुदबुद तुज कारण अठे
 आय खडाछैवार ॥ टुकदरसणदे सुंदरी लेचे जारा
 गार ॥ लेचेजारा गार कृपा अव कीजिये ॥ परिहाँ
 पूरब प्रीत विचार महौला लीजिये ॥ ५०८ ॥ तुज

(१८८) सुदबुद सब लंगाकीबारता ।

कारण घर छौडिया राज पाट ओरनार ॥ तूं छिप
बेठी महल में आडा पड़ दाडार ॥ आडा पड़दा
डार यादबी नाँकरे ॥ परिहाँ ॥ म्हें कुल छौडी काँण
तेरा जिव क्युं डरै ॥ ५०९ ॥ दोहा गांव बसो दीसौं
नहीं नहींज अधिकौ प्यार ॥ दरसणही दुरलभ
हुवो जौमिलते लखवार ॥ ५१० ॥ सज्जन दुरजन
विहुतणाँ असवर बौल चितार ॥ नयण भलक्का न्हॉ
खता दिनमें सौ सौवार ॥ ५११ ॥ सुंदर मृघनेणीं
सही भणताँ भाख्यौ बोल ॥ बचन दियो छो बागमें
कदे निभास्यो कौल ॥ ५१२ ॥ वार्ता ॥ इतरा
करा समा जौगमें नवो महलनें मंदर तयार हुवौ ॥
और महलनें मंदररी प्रतिष्ठा होवणरी तयारी
हुई ॥ जराँ जात परसूं देवणरी ठहरी ॥ जद आज
परवा बँटावणीं सरू करी ॥ अवे सबलंगाका
हात सूं येक येक कटौरीतो गूवरीनें येक येक
खाजौ दिरावे छै ॥ सब लंगा आपरे हात सूं बाँटे

छै ॥ इतराकरा समाँजौगमें रातपड़ी तरे कँवरजी
 जोगीको भेष करने अलख जगाव ताथका परवाले
 बणने गया ॥ तर दोहो कहे छै ॥ कँवर बायक ॥
 दोहा ॥ जेण कुरंग सुरंग धण, मुख उज्जल वरसंत ॥
 से सुंदर इणगौखमें कोको कौन कहंत ॥ ५१३ ॥
 वार्ता ॥ इतरी बात जौगीका मूँठाकी सुणने सब
 लंगाकी नणद बौली नणद बायक दोहा ॥ किण
 कारणरे जौगनाँ पर अँगणें भरमंत ॥ स्वसनेहीकौ
 विछड़नाँ सौ फिर फिर चाहंत ॥ ५१४ ॥ कँवर
 जौगी बायक ॥ खावो पीवो बीद्रमो मकरोमाँहरी
 तात ॥ जिण देसाँमें म्हेवसाँ सोभिक्षा माँगे रात
 ॥ ५१५ ॥ वार्ता ॥ सबलंगा इतरीबात सुणकर
 वारे आई और कटौरी भरकर ऊपर सूँ सिखर
 उतारने मौडी कर दीन्हीं ॥ और आँखमें सूँ
 काजल लेकर खाजाके लगाय आधौ खाजो दीन्हीं
 ॥ कह्यो आधी रातका आपणें मौडे मिंदर मिलाप

(१९०) सुदबुद सब लंगाकीवारता ।

हौसी पछे लेकर हातमें मौती दिखाया ॥ तरे सब
लंगाकी नणद काँई दोहो कहैछै ॥ नणदल वायक
॥ दोहा ॥ पारस पीपल, सजल जल, सूवासाल
चरंत ॥ येकयेक सूं मिलरह्या, कोको कौन क-
हंत ॥ ५१६ ॥ इण नगरी नुगुरा वसै सुगरावसे
नकोय ॥ कर ऊपरकागा चुगै, कोको
कहैन कोय ॥ ५१७ ॥ वार्ता ॥ तरे सबलंगा
पाछो दोहो कहैछै ॥ सबलंगा वायक ॥ दोहा
इण नगरी सुगरावसै नुगरावसेनकोय ॥ कर ऊपर
हंसा चुगै, कोको कह सीसौय ॥ ५१८ ॥ इण नगरी
चातुर वसै मूरख बसैनकोय ॥ वालसनेही सायवौ
निजरन खंडे सोय ॥ ५१९ ॥ नणदल वायक ॥
दोहा ॥ हात लकुटिया, पग चाखटिया, मौरपंख
सिरभारौ ॥ कूड़ कपठकरजौगी आयो, भावज
मित तुमारौ ॥ ५२० ॥ वार्ता ॥ तरे सबलंगा पाछो
कहैछै ॥ वाईजी मनै झूटौ कलंक क्यूं लगावोछौ ॥

जौगी पाँणी माँग्यौ तरेहूं तौ मोती दिखाया,के
जठे मोती निजपजेछे जठे जायपीवौ ॥ कहताँ
मोती सरोवरमें निपजैछें जठेथे पिण प्राणीं सरो-
वरमें जायपीवो ॥ म्हारे इणसूंबौलणें सूई काँई काम
छै इणतरह सबलंगा मुकरगई ॥ तरे नणद पाछो
काँई कहैछै ॥ हाँभाभीजी साची वातहै ॥ माडाँई
नेणइणारे बाथे पडगया, थेसाचाछौ ॥ नणदल
वायक ॥ दोहा ॥ हेज हियालूमिलगया सुखान
बौल्या वेंण ॥ जौगिनें जल पावताँ, बाथेपडगया
नेण ॥ ६२१ ॥ वार्ता ॥ जिणदिन सबलंगाघणों
उछावमे आई ॥ और सुदबुद सूंचौनिजर हुई ॥
तरे सबलंगा नणदके मिस कँवरनेंकाँई दोहौकहै
छै ॥ हर कँवर काँई सुणैछै ॥ सबलंगा वायक ॥
दोहा, नणदल तुजमन कहाँ वसै सौमोहिदेह भता
य ॥ इतरत चित डौलत फिरै किणदिसरो
प्यौजाय ॥ ६२२ वार्ता ॥ सबलंगा, नणदनें विचे

(१९२) सुदबुद सब लंगाकी बारता

लेकर कँवरजीनें पूछेछेकै डेरौ कठेछै और कठे
मिलस्यौइणतरहमौगमसैनसूं समझायनें ठिकाणों
पुछियो ॥ तरे कँवरजी पाछो दोहो कहेछै ॥ कँवरजी
बायक ॥ दोहा ॥ धुर दिस डेरौवागमें मिलस्यौ अंबे
डाल महलसँ पूरण हुय गयो लीज्यौ सार सँभाल ॥
५२३ ॥ गौरी बेठी गौखडा विंदी भाल दियो ॥
वागौ बेगा आव ज्यौ लोचन लाल कियो ५२४ ॥
वार्ता ॥ तरे सबलंगा समझ गईके उतरादी बाजू
वागमें कँवरजी आँवा नीचे लाधसी ॥ इतरी बात
चींतसैन पारसीसूं करने कँवरजी तो पाछागया
सूजौगीको भेष उतारनें पाछी आपकी पौसाखप
हर राज कँवर वणकर वागमें आँवारा झाडकेनी
चेसहजकी सारी तयारीकरनें बेठगया ॥ अबे सब
लंगा आधीरात रेसमें उण नवा महलमें होमरो
अगन कुंडछौ जिणमें घणी सीकतौ रूई नेयेक दौ
य सीधडा ब्रततेल रा पटकनें धपलको करदीनों

और महलमें लाय लगायदीनी ॥ और आपभी तरका कपाट जडती थकी झरोखामेंसँ उतरनें बागमें जाय पौची ॥ और लारे लौगाँनें इसी मालम पडीके सबलंगातो महलमें हींरहगई ॥ और महलरी अगन बुझाई नहीं बुझी ॥ कारण घ्रततेलनें हूईको धपलको भारी उठियौ जिणसूं महलरेकनें कोई नहिं जायसक्यौ ॥ अठी सबलंगा आधी रात शसमामें बागमें आई ॥ और बागमें उतरादीका नीं आँवारा झाड रेनीचै गई ॥ आगे कँवरजी बैठा छै ॥ तरे सबलंगा हातजौडनें ताजीम बजाय सुजरीकीनों ॥ जद कँवरजी ऊठकर हात पकडनें आपरे पास जाजम ऊपर बिठाय लीन्हों ॥ और दोनुं मिल कुसलात पूछी ॥ अठे कँवरजी आगे सहज बिछायत कर राखीछी तिकीतो तयारहीछै नेजाजम ऊपर बैठा बैठा कुसी किलौलरी वार्ता करेछै ॥ नेलारली वार्ता सात जनमारी यादकरेछै ॥ और

(१९४) सुदबुद सब लंगाकीबारता ।

कहेछै देखौ आपॉरे कितरी जगाँ मिलाप हुयहुय
ने विछवौ पड़ियौ सब लंगा वायक (दोहा) मिल
विछड़े विछड़े मिले कँवरॉके तीवार ॥ सातजनम
दुख सुख सह्याविछड मिल्या भर तार ॥ ५२५ ॥
वार्ता।कँवरजीने सबलंगा कहेछै।देखौ आपणे भाग
में काँई लिखी छीसूं कितरी वारतो मिलाप हुवौने
कारज सरियाँ विना पाछो विछेवौ हुवाँ गयो पह-
ली तो इंद्रसराप दीनों तरे वंदरारा न्यारा रकटक
में जनमलीयौने विछैवो भुगत्यो ॥ पछे मिलाप
हुय ने कटकरा डरसूं कारज सरियो नहीं नेकुम्हा
र कुम्हारी हुयगया पछे पिण सूम सिरौमण नगर
जल गयो तरे आपॉ असौक वनमें गयाने उठे
चकवारा वचन सुण आपरा हुकमसूं म्हैंतो कूवा
में पड़गई नेदेवांगणाँ रूपहुई तरे राजा लेगयौने
आप वंदर रयासू खिलाडी लेगयौ जठे आपणे
फेर विछेवो पडगयोछौ ॥ पछे राजा जक्ष सेणरा

महलमें फेर मिलाप हुवौ पणराजारा डरसूं आ
 पणोकारज सरियो नहीं नेंपछे राजाका कौपसूं मह
 लमेंसूं पड़कर सरगया तरे आपतो माहाराजकँवार
 हुवानें हूं दासीरी कूखमें जनम लेयकर अनसनाँ
 हुयनें बाराबरस विछवा भुगतिया फेर कासी कर
 वत लेयनें उजीणरा नगरसेठरे घरे जनम लेयनें
 नाम सबलंगा पायौ जठे पिण आप पंडित बणनें
 आयाछा और मिलापहुवो पणभावज राडरसूं उं-
 ठे पिण आपणो कारज सिद्ध हुवो नहीं पछे पठ
 णरविखत बागामें मिलाप हुवो तौ पिण कँवारीछी
 जिणसूं कारजहुवौ नहींनें पाछो विछवौ पड़गयो॥
 पछे परणीजती वेलौ वानामें आपणो राज महलां
 फेर मिलापहुवानें पाछो विछवो पड़गयौ पछे
 परणीजी जठे आपसें मुजरो हुवानें हूं पारसनाथ
 जीरे मंदिर आई जठे आपनें निदरा आय गई उठे
 म्हें सारी रात विलाप करवौकरी पण आप जाग्या

(१९६) सुदबुद सब लंगाकीवारता ।

नहीं जठे फेर मिल कर बिछदो पड़गयौनें कारज
सरियौ नहीं ॥ पछे आपपारा नगर पधारिया जठे
मालणरी साथे आप आयातौ पिण नण दलका डर
सूबातहुई नहीं ॥ पछै आप जोगीवणकर आया
जठेपिण नणदल वैरसाजियोसू बातही करणपाई
नहीं, ॥ अबे आपणें विधातामेल मिलायौछै, सू
आज आनंद पुरवक, सारामनरा मनौरथ, सिद्ध
हुसी, इतराकरा समाजौगमें कौयल आँवकी
साग कतरी सौ आयनै कँवरजीरा माथा ऊपर
पडी सो पड़ताँ इंप्रवाण कँवरजीरा प्राणतौ मौक्ष
होगया, नें सबलंगा रुदनकरवा लागी ॥और उण
आँवानें और कौयलनें सरापदियौ ॥ सबलंगा वा-
यक ॥ दोहा ॥ आँवा निरफल जावज्यौ कोयल
भखज्यौ वाज ॥ घर लाखीणाँ हौमियाँ तोहिन
सरियौकाज ॥ ५२६ ॥ पीव बिदूक्यौ घरदह्यौ,
कारज येकन सीज ॥ कौयल आँवे कापुरुष तीनाँ

पड़ज्यौबीज ॥ ५२७ ॥ वार्ता ॥ इण तरह विसूर
 गाँकरतीथकी, काठ भेलौकरनेँ कँवरजीनेँ गोदमें
 लेयकर अगनलगायलीनी और सती हौगई।दोहा।
 सतीहुई संग कँवरके,सवलंगासेँ देह सातजनमपूरा
 किया लिया अमर पुरतेह॥५२८॥प्राणतज्यौ नेह
 नाँ तज्यौ प्रेमप्रीतकी बात ॥ दुख भोग्या सुख
 त्यागके सात जनम रहिसाथ ॥ ५२९ ॥ सातज
 नम संग संचरया लाछन लग्यौ नलेस ॥ भेलाइ
 दुखसुख भोगकर, इंद्रलोक परवेस ॥ ५३० ॥वार्ता
 इण तरह बागमें कँवरजीनेँ गोदमें लेयने सवलंगा
 सतीहुई और सातजनम भोगकर आपरा सील
 संजमसूं पाछी इंद्रलोकमें पहुंची॥ओर इंद्रसूं ताली
 मवजायनेँ हातजोड़ कर हाजर हुई ॥तरे इंद्रसंतु
 ष्टहुयनेँ वर दियौ ॥ के जावोथे संसारका सुखदेखौ
 नेँ थारा मनरामनौरथ पूरणकरो ॥ जदमदन चंद्र
 बोलियो केम्हेतौ अवे कठेई जावाँ नहीं, ॥ हेसुर

(१९८) सुदबुद सब लंगाकीवारता ।

पती म्हाँनें तो अबै आपकी हजूरमिईज राखौ ॥
पछै उणहीं समाँमें सपत रुषी इंद्रलोकमें
आय गया ॥ तरे इंद्र आदलेर सारा देवता
साम्हाँ गया ॥ जठे मदन चंदपिण गयौ सू
मनुष्य रूप नरदेह पंच तत्वादि सरीर इस्यौ जाय
नें सपत रुष्याँके पगाँ लागौ ॥ तरे रिषे स्वराँ बडो
अचं भोकीयो ॥ के मृतलो करो मानवतन मनुष्य
इंद्र लौकमें कठासूं आयो ॥ तरे मदन चंद पांछली
सारी हगीगत कही ॥ जदरुषे स्वरां सुणकर संतुष्ट
हुवा नें परम वैराग सहित अद्धेत ग्यान सुणायौ ॥
जब मदन चंदकौं श्रवण ग्यान हुयकर संसारको
मिथ्या जाँणके वैराग धारण कर लीयौ ॥ और
तपस्या करणकों नंदन बनमें चलयो गयो ॥ अठी
रंभा पिण सत संजमसें अपणें सरीरकों दमन
करके अेकांत वेठनें हरी सु मरण करणेंको स्थित
हौंगई ॥ और समय पायकर आप आपकी आयू

धूरी करके मुक्तीकों प्राप्त हुवा ॥ और इनके सातही जन्मताँई पाकमोहोवत और प्रीति रही प्रीतीके कारणसें जन्म जहाँ जहाँ लेकर संग रहे इसी तरह प्रीति जोकोई ईश्वरमें रखेगा उनका अय लौक और परलौकदोनू सुधरकर मुक्तीकों प्राप्त होंवेगा.

इति सुदबुद सबलंगाकी वार्ता सात जन्म

वर्णन सहा शिव करण रामरतन दरक माहे-

श्वरी मारवाडी मूंडवे वाला इन्दोर नि

वासी कृत्त. छंद बंद. व. वार्ता बंद.

एकादश प्रकाश ॥ ११ ॥

पुस्तक मिलनेका ठिकाना.

इन्दौर—सहाशिव करन रामरतन दरक रामसागर
छापखाना.

मूँडवा—(मारवाड) शिवकरन रामरतन दरक

भीलवाडा—(खेवाड) रामरतन कासीराम बुक-
सेलर

मुंबई—सर्व पुस्तकालयमें मिलेगा.

